


MBWELELU PANKACÌ PÀÀ
BIKONDO MWANDAMUTEKÈTÈ
BYÀ ÈKÈLEEZÌYÀ NÈ
BÌTAMPÌ MWANDAMUTEKÈTÈ

 Mwoyi wènù awu dilòòlò edi, balundà bàànyì. Ndyèsè dinènè dyà—dyà kwikalakù baalùkile mu nzùbu wa Mukalenge emu, dilòòlò edi, mu disangisha, nè bacìkàlè ànu nè mwoyi ku—ku manà à mu dindà edi, mùvwà misùùkà yètù miikalè mibènèshùbwe bikolè kùdì Bwikadi Bwèndè bunène. Nènku mpindyewu, dilòòlò edi, tudi nè . . . tubanga cyena-bwalu cyà nè: *Mbwelelu Pankaci Pàà Bikondo Mwandamutekètè Byà Èkèleeziyà nè Bitampi Mwandamutekètè*.

² Nènku mwà nyiikilangana, mu mapingaja emu, nè mulundà wanyì kampànda. Nènku pàmwàpa, bu Mukalenge mwà kwanyisha, mîngà misangu mu movù wà luuyà lukolè ewu, Yèyè kàyì mungalùje Kumbèlu to, anyì—anyì, mémè mufikè ku dyalukila, nciyi muyè dyàmwàmwà dyà mbù anyì cintu kampànda, ndi muswè kulenga cyàkàbìdì Mpungi mwandamutekètè yà ndekeelu ayi, nwamònu's. Nè byònsò bìdì biswikakana pàmwè. Nè—nè pashùshe kùdì Bipùpù mwandamutekètè byà ndekeelu mu cyòci eci. Nè byònsò bìdì bisambakanangana pàmwè mu mùshindù mujaalàme, mutwàmòna patwikalà twenda tuya apu.

³ Pa nànkù, dilòòlò edi, patùcidi mu mùshindù kampànda tutuuyishakù cilunji apa . . . Ndi mwà kuleepeshakù ndambù dilòòlò edi. Nànsha mene . . . Mpindyewu, pàndì ànu ngàalukila kaaba aka . . . Kuyiisha kwònsò kùndì mwenzè mu Phoenix aku, musangu nànsha wùmwe dìyì kadyenà nànsha ndimpàtekù to, nwamònu's. Ncyà bushùwà. Nènku, kaa, ekèlekèlè, mùshindù mwìnè wùmvwà muyiishè bikolè's wè! Nè bwalu, mùndì ngèèla meeji, kùvwà kwenzèke masangisha makùmi àbìdì nè mwandamutekètè, dìyì kadìyiku dimpàte to. Kàdì's mbwà mùdì kuulu muneemu, nudi numòna's. Bìdì ànu nè, kuulu nkùdì ànu kubì mùnwemu emu, s'ncibandabanda ànu pa cyòci. Cidi ànu nngiikàdilù mubì udi mùnwemu, nè, wa bìdì bitàngilà bukolè bwà mubidi, nudi bamanyè's, cìndì njinga kwamba aci's, yèyè ngudi—ngudi—ngudi mubì. Nènku muyiishi kanà yònsò ewu ùdi ne . . . udi wakula, ùdi ne muminu mubì, bangabanga.

4 Ngàngàbukà mulundà wanyì kampànda—kampànda wàkantàngila pa muminu, mungà musangu, bwà kumòna nè ncinyì cìvwà cìtácishà. Yéyè kwamba nè: “Mpatupù.” Yéyè nè: “Cyùdi udi ànu nè bikudì pa kamina-bidyà pààpa.” Yéyè nè: “Mbifumine ku kuyiisha.” Èè, ntu—ntu—ntu mu mùshindù kampànda munangè aci, nudi bamanyè’s. Aci kàdi kwenzaci bwà ntambèku kudyùmvwà bîmpè, bu mùvwàci cilamakane ne kuyiisha, nudi numòna’s. Mbifwànyinekù kwikala bîmpè, bwà Bukalenge bwà Nzambi.

5 Mpindyewu, tudi bafwànyine kupanga kwambula mu mubidi wètù cimanyinu cyà Ye-...cyà Yesù Kilistò, bu mwàkacyàmbulà Pòlò, byumùkila ku mutuutu. Kàdi twètù tudi bafwànyine kwambula cyètù cimanyinu byumùkila ku diyiisha nè ku difilà dyà díyì dyètù bwà kulwishangana nè bintu bidì bibì. Pa nàнку twètù tudi nè kusàkidila kwà nè kabicyèna kàbidì bìkèngela bwà twètù kutuuciibwa nànsha, nangàngà díbà ditùkaadi edi. Pa nàнку twètù—twètù tudi . . .

6 Mbanganyì mwab’ewu bàkaadiku babalè *Tudi Dìbà Kaayi, Bakalenge?* Anyì bàkaadiku bacitèèlèje, nudi bamanyè’s: *Tudi Dìbà Kaayi, Bakalenge?* Aci’s ncintàcishe bikolè byà dikèma. Wèwè kùyi mucibalè to, ndi njinga, mu mùshindù kampànda anyì kansanga, bu wèwè mwà kufikakù ku dicitèèleja, anyì mùshindù kampànda anyì kansanga. Ncyenzè bu cintàcishe. Mvwà muswè kusàkidila eci nùнку kumpàlà kwà kubanga disangisha. Kùkaadi bu—bu lumingu lujimà anyì matukù dikùmi nàнку awu, mvwa mutàcishìibwe bikolè be. Ncyèna ànu . . . Ncìvwà—ncìvwà—ncìvwà ànu, ncìvwà muswè kwenza masangisha anyì cintu kanà cyònsò eci nànsha, bwalu ncìvwà—ncìvwà mumanyè nè ncinyì to. Bivwa bimwèke bu nè cìvwà cìfwànyine kwikala cintu kampànda cìvwà cibì, nè ncìvwà mumanyè nè cìvwà ncinyì menemene to. Pa nàнку mémè . . .

7 Dìndà kampànda bwebwebwe, mémè kujuuka, bwà kubànda mu Sabino Canyon. Kwòkò aku, bwà ntàntà wa kuumukila kumbèlù kwànyì, kùdi ànu ntàntà wa wendesha kàshinyì tusunsa tutwè ku makùmi àsàtù nàнку too nè ku . . . anyì makùmi ànaayi, too nè ku lusongo lwà Sabino Canyon, pashìishe kùdi njila munèna wa ùya ntàntà wa kilòmèètà makùmi ànaayi nè mwandamukùlù too nè mu mukùnà amu.

8 Citùpà cyà buloba cyà cikèmesha, kuulu aku. Ndi mwà kwikala apa mu cipèlè emu, mùdi kuulu kwikàle degrés makùmi àbidì nè mwandamutekète anyì makùmi àsàtù ne ìbidì, patùdi twakulangana apa, nè mu katanci kàà tusunsa makùmi àsàtù nsanganyiibwa mu mupimbu wà nèjè wà mètres àbidì nè citùpà, nwamònu’s, ku lusongo lwà mukùnà aku. Tuvwa tusanganyiibwa ku Phoenix, ànu àbidì àdì panshì aa, mùvwà kuulu kwikàle degrés bu isambombo mwinshì mwa cijèngù, degrés ìbidì mwinshì mwa cijèngù. Bàvwa babàndishe luya mu ciinà cyà màyi à dyowela, nè bantu bòòwelamù. Mu ntàntà bu

wa tusunsa makùmi ànaayi nàнку twà wendesha kàshinyi paùdi umukila kwòkò aku, kuulu kùvwa kwà degrés makùmi ànaayi mwinshì mwà cijèngù, ku Flagstaff kwàka. Nwamònu anyi? Adi's ke dishiilangana pankacì pàà mpeepèlè yà kuulu aku nè yà mu cipèèlà. Nènku mbìmpè bikolè bwà makàndà à mubidi bwà beena lukoso lwà mfwènke ne bikwàbò.

⁹ Kàdi, mpindyewu, mèmè kubànda ne lupòngò alu, nè mèmè kubànda kuulu menemene nè mwànyì mwònsò. Ke mèmè—mèmè—mèmè kukonka Mukalenge, pâmvwà musòmbe mwòmò amu apu, cìvwa byònsò ebi byùmvwija, nè bikwàbò byònsò. Mvwa mutàcishìbwe mu mùshindù kampànda, nè mupangè ànu cyà dyenza.

¹⁰ Nè pa nàнку pâmvwà munkacì mwà kusambila apu; cintu kampànda cyà kaciyì cyùmvwika kwenzekacì. Ndi—ndi—ndi muswè kwikala nè meeji matòoke. Mpindyewu, mbifwànyìne kwikala nè mvwa muyè mu tulù. Mbifwànyìne kwikala nè divwa ndibwela dyà mu nyumà, anyì mbifwànyìne kwikala nè cìvwa nci—nci—ncikèènà-kumòna. Mèmè ndi nè meeji matàmbe kutùma ku kwitabuuja nè cìvwa ncikèènà-kumòna. Piinè apu, mvwa nè byanza byela muulu, ngamba nè: “Mukalenge, edi dikùbàkùbà ndiswè kuumvwija cinyi? Nè Banjèlò mwandamutekètè mu kasumbù kàà—kàà mmwèneskelu wa cipaapu cyà musàkà, bàdi bantùntùmùne kunguumusha pa buloba kàdi kukùdimuka kutàngila ku esètè aba, cidi cyùmvwija cinyi?”

¹¹ Mvwa mwimàne mwaba awu, mwikàle nsambila, ke cintu kampànda kwenzekacì. Nènku, mpindyewu, cintu kampànda kummacilacì mu cyanza. Nè ndi mumanyè nè, wèwè kùyì umvwa bintu byà nyumà to, cidi mwà kumwèka ànu menemene cyà pabwàcì. Kàdi cintu kampànda cyàkatuuta mu cyanza cyànyì. Kàdi, ndi mwenzè ànu ntàngila, wùvwa mmwelè wà mvità. Nè cilabì cìvwa cyenza cyà dibwe dyà busàngà, dibwe dyà busàngà ditàmbe bulenga dindì nciyikù mwanjì kumòna to. Nè ci—cikùbi, nudi bamanyè's, mwaba wùdì. . . Ngèèla meeji nè cidi mbwà kupangisha byanza byèbè bwà kutàpikabì, nudi bamanyè's, paùdi munkacì mwà. . . ba—bantu bàvwa bàlwangana mvità yà bàbidi; cìvwa cyà ngòlò. Nè luseke lùdì lusàkisha lwà mwelè wà mvità kalùvwa lutàmbètàmbe bule to, kàdi lùvwa ànu lutwè bu kapaaya; nè lùvwa lwà cyamù cyà argent cyà cibàlakana. Nè cìvwa ncintu cyà citàmbe bulenga cindì nciyikù mwanjì kumòna to. Cìvwa cìkùmbanangàne nè cyanza cyànyì ànu menemene. Nènku mvwa muwùkwàte. Mèmè kwamba nè: “S'mmulenga kumòna's!” Mèmè kuwùtàngila. Ki mèmè kudyàmbidila nè: “Kàdi, udi mumanyè's, mèmè's ntu misangu yònsò nè bwòwà bwà mwelè wà mvità.” Mu mùshindù kampànda mvwa nè disànkà dyà mùmvwà nè mwoyi paanyimà pàà matùkù àvwàbò bàkwàta naayi midimu mamanè kujika, bwalu ntu—ntu ne bwòwà bwà keelè keètù aka. Nènku ke mèmè—mèmè kudyàmbidila ne:

“Ncinyi cîndi mufwànyine kwenza ne wôwò awu?”

¹² Nènku pâmvwà mukwàte apu, mu cyanza cyànyì, Dìyì kampànda dyà difùmina ku mwaba kampànda kwambadi nè: “Mmwelè wà mvità wà Mfùmù awu.” Nè dîbà adi kunguumukawù.

¹³ Èè, mêmè—mêmè kudikonka civwàci cyùmvwija nè: “Mmwelè wà mvità wà Mfùmù awu.” Ki mêmè kudyâmbidila nè: “Bu nè Dìvwakù dyambè nè, ‘mwelè wà mvità wà mfùmù kampànda,’ nùnkù’s ndikù mucyùmvwè. Kàdi Dyôdi dyâmbi nè, ‘mmwelè wà mvità wà Mfùmù awu.’” Pa nàнку bîdi mwà kwenzeka nè nciikadi mucyùmvwè bîmpè to, kàdi mêmè kudyâmbidila nè: “Kùdi ànu Umwèpelè, Mfùmù awu, n’Nzambi. Nè mwelè Wèndè wà mvità ng’Eci nùnkù: ‘Musàkisha kutâmba mwelè wà mvità wà nseke yîbîdi,’ nwamònu’s. ‘Nènku shâalaayi munda Mwànyì, nè Mèyì Àànyì. . .’” Nwamònu anyi? Ki mêmè—mêmè kudyâmbidila. . .

¹⁴ Mu dilwangana dyà mvità yà bàbîdi, nudi numòna’s, nè mûndi mêmè ngumvw-. . . Ncyèna ngumvwa mwâkù wàci nànsha wùmwe to, kàdi, anyi kanungu nànsha kàmwe kàa dilwangana dyà mvità yà bàbîdi to. Kàdi, bwà ku dyànyì pàanyì dyumvwa, keelè kàdi kàtuuta luseke lukwàbò. Nènku pashiishe, ndekeelu wa byònsò, myelè yà—yà mvità, yôyi mikâlâminàngàne, mwena lukunà awu nè wèwè nukâlamiya myelè yà mvità, mùshindù ewu, dîbà adi bîdi bikèngela dikànda dyà muntu udi ulwangana mvità yà bàbîdi awu. Bwalu, nwamònu’s, mwelè wèndè wà mvità mmufwànyine kwikala muludikila pa mwoyi wànyì, nè wànyì muludikila pa wèndè mwoyi, kàdi mikâlâminàngàne, pàdi twelè twètù tûtutakanangana kàa muntu nè kàa mukwèndè apu. Nènku dîbà adi yîdi yîtuutakana, nè pashiishe myelè yà mvità ayi yîdi yîlwa pàmwe. Nènku ewu udi mwà kusàkila mukwèndè kumubyànkula paanshì awu, mwelè wà mvità mmuludikila buludì pa mwoyi. Pa nàнку bîdi bikèngela. . .

¹⁵ Nànsha biikàle nè mwelè wà mvità awu n’Dìyì, bîdi bikèngela cyanza cyà diitabuuja dyà makànda bwà kuWùkwàta mwaba awu, bwà kuWùfikisha ku mwoyi wà mwena lukunà awu. Mpindyewu, nciyi mumanyè bintu ebi to, kàdi ànu. . . Byònsò bîndiku mêmè mupetè kùdiYe, bîndi mwà kunwâmbila abi, ngânwâmbidîbi. Pa nàнку, aci nàнку, nudi bamanyè’s, ndi ngèèla meeji nè civwa. . . Mukalenge wetù kî ngwàkambakù nè, byònsò bìvwàYè mupetè kùdi Taatù, ki cyàkambàYe, kàyi mulamìnyine kantu nànsha kàmwe anyi? Nè—nè pa nàнку twètù tudi baswè kwenza bintu abi ànu menemene mùdibi bilwa amu. Mpindyewu, bu nwênù mwà kwikala bàà lungènyì lwà menemene, nè nusambila, ndi mutwishibwe ne nenùmvwè cintu kampànda kàtààtakà menemene, mpindyewu, ncintu kampànda cîndi ntèkemena nè ncibuulula.

16 Mpindyewu, mu Mukàndà ewu, túbùlulààyaaku mpindyewu ku—ku nshapità mwi5 wa Mukàndà wùdi wubiikidiibwà nè n'Dibuuludiibwa dyà Yesù Kilstò awu.

17 Mpindyewu, màalabà dilòlò neciikalè Cìtampì cyà Kumpàla. Bìdi nè, Bìtampì binaayi byà kumpàla mbibuulùdiibwe, kùdi babàndi bàà pa tubalù bànaayi, umwe ku Cìtampì cyònsò udi ukùma buloba. Nè pashiishe, pàmwàpa, kabyàkwangata ntàntà mule nànsha, too nè paanyimà pàà twètù bamanè kupicila lwà pa. . . Mu òmwè, mu diibìdi, mu diisàtù, patwàmbà kufika ku diinàyi. Pashiishe, ndi ncinka nè, pa Cìtampì Cìisambòmbò nè. . . Cìitànù, nè Cìisambòmbò, nè cyà Mwandamutekète, míngà misangu byòbi nebiikalè bileebile. Pa nàнку, pàmwàpa necinùpèèshèku ndambù wa díbà bwà kupetululakù diikisha ndambù.

18 Tudi nè kiipàcilà kàà kukùtula masangisha kaaba aka, ngèèla meeji, pa díbà mwandamutekète, mu malòlò à mu lumingu. Nè bìdi bikèngela bwà mèmè kwikala pa cibumbà cyà ku cyambilu pa díbà mwandamutekète ne tusunsa makumi àsàtù, ànu menemene. Nènku díbà adi aci necitùpèèshè mùshindù wà kupàtuka patwàmbà kufika mundankùlù. Pa nàнку—pa nàнку, ndi—ndi mupicishe nè díbà òmwèpelè, mu dìndà emu. Ncivwa mucyènzè ku bukòlè to, mvwa ànu. . . Ncyèna mumanyè nè ndibà kaayi to.

19 Bwalu, ncyèna mumanyè cidi mubàndi wa pa kabalù wa kumpàla awu to. Ncyèna mumanye Cìtampì Ciibìdi, Cìisàtù, Cìinàyi, Cìitànù, Cìisambòmbò, anyi cyà Mwandamutekète to. Mèmè, bwà díbà edi, ncyèna mumanye to. Nwamònu anyi? Ndi ànu muMweyèmene Yèye. Pa nàнку ki bwà cinyi, ndi nteeta lumingu elu, ku dyambulwisha dyà ngàsà wa Nzambì, ngiitabuuja ne, bu nwènù mwà kuumvwaku mu ndòndò. . .

20 Nudi bamanyè's, mu bikèèna-kumòna, kwèna mwà kubuulula bintu to ànu pawùdi upeta dyanyisha dyà kubuulula. Mmisangu búngì kaayi yinùkaadiku nwènù bwònsò aba bangumvwè ngàmba nè: “Ndà mu nzùbu kampànda, pàmwàpa cifulu neciikalè citèèka *apa*. Nè mwànà kampànda ewu, anyi nè bikwàbò abi, kàakondopiibwa to pàdi cyòci aci kaciyi citèèka *apa*.” Ncyèna mwà kubàmbila, anyi kí mmèmè udi mwà kucyùmusha mwaba awu nànsha. Bìdi bikèngela ciikalè, cyumùshiibwe, mu mùshindù mukwàbò kampànda. Bikèngela bwà muntu kampànda mukwàbò àcyàngatè nè àcyùmushè. Nènku, bintu byònsò mu bulongame, díbà adi cidi mwà kubuuludiibwa.

21 Pa nàнку mpindyewu ikàlaayi mu disambila. Mpindyewu, ànu kumpàla kwà twètù kulenga Mukàndà awu, twànji twàkulààyikù Nendè, nè mitù yètù miinyika.

22 Mukalenge Yesù, twètù ne bwònsò bwètù katwèna bakumbàne to. Katwèna bafwànyine kuteeta to, nànsha

byà munyi, bwà kulenga Mukàndà munsantu ewu, mu dîbà dyà edi dyà ditambe cijila didi misùukà milembeleja mu kùyaayayi kwà cikondo, katùyikù tulòmba, Mukalenge, bwà nè, Umwèpelè udikù mwà kubuulula Mukàndà ewu awu, Àseemenèku mpindyewu, bwà kubènesha diditácisha dikesè dyà musadidi Webè. Bèneshàku Dìyi pàdìDi dipátuka apa. Swákù bwà Diye mu bukòlè bwà Nyumà. Nè swákù bwà buloba bwà nyumà bwà...aba bàdi nè nzala nè nyòòtà yà kumanya bwakàne nè kumanya diswa dyà Nzambi abu, swákù bwà Dìmatèmu nè òvulanganè bilondèshìle mùshindù wàDi. Enzàku nàнку, Mukalenge. Disaamuna dyònsò nediiikalè Dyèbè. Swákù bwà bàdi nè nzala nè bàdi nè nyòòtà bàpetè cyàkudyà nè cyàkunwa, dilòòlò edi, byùmukila mu Dìyi. Tudi tulòmba nùнку mu Dìnà dyà Yesù, Mwena dibuulula adi. Amen.

²³ Mpindyewu, mpindyewu netùbuululè ku nshapità mwi5. Mpindyewu, eci kí m'Bitampì Mwandamutekètè nànsha. Mmbwelelu paankaci pàà bikondo byà èkèleeziyà nè Bitampì Mwandamutekètè. Mpindyewu, kùdi kàbìdi nshapità mwi6 wa...

²⁴ Nè kùvwa nshapità mwi4's wè, èyowà, wa Bwàkabuulwibwà, nè, mwòmò amu, mu mùshindù kampànda ncibuulùle cintu kampànda civwà mwà kwenzeka paanyimà pàà Èkèleeziyà mumanè kubànda. Mbwenà kwamba nè, Èkèleeziyà ùdi ùbànda mu nshapità mwi3 wa Bwàkabuulwibwà, nè kèna wàlukila to ànu too nè ku nshapità wa 19 wa Bwàkabuulwibwà. Nwamònu ànyì? Ki bwà cinyi, Èkèleeziyà ùdi ùpanga kupicila mu Dikènga dinène. Ndi mumanyè nè aci cidi cibèngangana nè—nè pàmwè menemene nè mulongeshi yònsò ùnkaadiku mèmè ewu mwakùle nendè. Kàdi ncyèna—ncyèna—ncyèna nè meeji à kubènga kupetangana nànsha. Ndi—ndi nè meeji à kwikala mwanèènù, kàdi ndi—ndi ne cyà kulongesha ànu mùndi mèmè mwà kuCimòna amu. Mèmè ncìyi ngenza nàнку to, ncyèna mwà kuCibùmbakaja pàmwè to, nudi numòna's. Nèнку mpindyewu, nànsha Yèyè ùbànda kumpàlà kwà Dikènga dinène anyi paanyimà pàà Dikènga dinène, cìndi mèmè muswè nkubànda pàmwè Nendè. Ki cintu cidi nè musinga ncyòci aci.

²⁵ Pa nàнку, bintu abi tudi ànu tucinka cyanààna, bwalu, bu mùndi ncìyi nè kàlaasà kalonga, ndi nkwàta mudimu nè bifwànyikijilu. Ndi ntàngila nè mmòna cidiku, anyi civwàku mu Dipungila Dikùlukulu, cidi ciikàle cifwànyikijilu anyi mùndidimbi wa Dipyadipya aci, dîbà adi ndi nè cingènyingenyi kàmpànda cyà cidi Dipyadipya adi's. Nwamònu anyi? Cileejilu bu...Noà wàkabwela mu bwàtù kumpàlà kwà dikènga dinène kubangadi, cifwànyikijilu; kàdi nànsha kumpàlà mene kwà Noà, nwamònu's, kubwelayè mu bwàtù, Henòkà wàkabànda, nwamònu's, kumpàlà kwà ní ncinyi cyònsò kwenzekaci. Nè Lotà wàkabiikidiibwa bwà kupátuka mu Sodomà kumpàlà kwà kantu nànsha kàmwè kàà dikènga dinène adi kubangakù, kàà kabùtu

aku; kàdi Abraham yéyè, ùvwa díbà dyònsò adi, pambèlù pàadi. Nwamònu's, bifwànyikijilu.

26 Kàdi mpindyewu netùbalè mvensà wa kumpàla. Nèmbalè mvensà Yàci yibidì anyi yisàtù yà kumpàla ayi.

Nè nàkamòna mu cyanza cyà dyàbalùmè cyà ewu uvwa musòmbe pa nkwaswa wa butùmbi mukàndà mufunda munda nè paanyimà, mukànga nè bitampì mwandamutekètè.

Nè nàkamòna mwanjèlò wa dikàndà ùkòbola nè díyì dikolè nè: Nganyì udi mwakànyine bwà kubuulula mukàndà, nè kusùulula bitampì byàwù?

Kàdi muntu nànsha umwe mu dyulu, anyi pa buloba, nànsha mwinshi—nànsha mwinshì mwà buloba, kàvwakù mukùmbànyine bwà kubuulula mukàndà awu to, nànsha bwà kuWütàngila. (Mukàndà kaayi's wè!)

Nè nàkadila bikolè, bwalu muntu nànsha umwe kàakapeteka wa mukùmbànyine bwà kubuulula nè kubala mukàndà awu, nànsha bwà kuwütàngila.

27 Mpindyewu, nudi nwamba bwà dipanga kukùmbanyina anyi? “Nànsha mene mukùmbànyine bwà kuWütàngila; muntu nànsha umwe, mwaba nànsha wùmwe.”

Nè umwe wa ku bakùlù wàkangambila nè: Kùdidi nànsha, mòna, Ntambwe wa cisàmbà cyà Yudà, Muji wà Davìdì, wàcìmunu bwà kubuulula mukàndà awu, nè kusùulula bitampì byàwù.

Nè nàkatàngila, nè, mònaayi, munkaci mwà nkwaswa wa butùmbi nè mwà bifùkùbwa binaayi, . . . munkaci mwà bakùlù amu, mwimàne Mwànà wa mukòòkò byenzè bu nè ùvwa mushebeya, mwikàle nè nsèngù mwandamutekètè nè mèsù mwandamutekètè, àdi Nyumà yà Nzambì mwandamutekètè mitùma pa buloba bujimà.

Nè yéyè wàkalwa nè wàkangata mukàndà awu mu cyanza cyà dyàbalùmè cyà ewu uvwa musòmbe pa nkwaswa wa butùmbi awu.

28 Netwǎnjì kwikisha mwaba awu bwà katancì kakesè cyanaànà, ku dibala dyà Bwàkabuulwibwà 5, tupweka kwìnshì too nè ku mvensà wa 7.

29 Mukàndà wà Bitampì Mwandamutekète ewu wùdi wùbuuludiibwa pa díbà dyà Mikungulu Mwandamutekète yà Bwàkabuulwibwà 10, mpindyewu, panwikalà nucifunda. Tùbuululàayi ku Bwàkabuulwibwà 10, bwà katancì kakesè cyanaànà, bwà nwamònakù mwà kupeta dyumvwa kampànda kumpàla kwà twètù kubwelamù. Mpindyewu, eci nku cikondo cyà nshìkidilu. Bwalu, tèelejàayi:

*...nâkamòna mukwàbò mwanjèlò wa bukolè
ùtùuluka ùfùmina mu dyulu, muvwàdika ditutu,
nè mwanzankòngòlò... pa mutù wèndè,...*

30 Bu nwênù mwà kumòna, awu n'Kilistò, nwamònu's. Bwalu, Yèyè, mu Dipungila Dikùlukulu, wàkabiikidiibwa ne m'Mwanjèlò wa Cipungidi. Ne Yèyè ùdi ùlwa buludì kùdì beena Yudà mpindyewu, bwalu bwà Èkèleeziyà mbujike. Nwamònu anyi? Eyo.

*...ne kwisù kwèndè... bu mùvwà díbà, ne makàsà
èndè bu makunji à kapyà:*

31 Nudi bavùlùke Mwanjèlò awu mu Bwàkabuulwibwà 1 anyi? Cintu cìmwècìmwè aci. *Mwanjèlò* ùdi "mùsànjeela." Ne Yèyè ke Mùsànjeela bwà Izàlèlèlè. Nwamònu anyi? Èkèleeziyà ùkaadi mwambwibwe, nwamònu's, mpindyewu, anyi pabwípì ne kwambwibwa. Yèyè ùdi ùlwa bwà Èkèleeziyà Wèndè. Mpindyewu tàngilàayi.

*Nènku wàkadì nè mukàndà mukesè mukàngula mu
cyanza cyèndè:...*

32 Mpindyewu, *apa*, Ùvwa mukànga *apa* ne mutwà citampì; kàdi's *apa* m'Mukàngula. Mmukàngùdiibwe. Kubangila ànu ku cikondo cyà ditwibwà dyà citampì aku, tudi tubwelamù dilòdòlò edi, mpindyewu Mukàndà awu mmukàngula. "Mukàndà mukesè mu cyanza Cyèndè, mu Cyèndè... Ùvwa mukàngula. Kaa, mùshindù mwinè ùvwa díbà, bu makunji..." Indilaayibi katanci. Lekèlaayi mbangulule mwab'ewu bwà kubala's.

*Nènku wàkadì nè mukàndà mukesè mukàngula mu
cyanza cyèndè: nè wàkadyata dikàsà dyèndè dyà
dyàbalùme pa mbù, nè dikàsà dyèndè dyà dyàbakàji pa
buloba,*

*Ne kwelayè lubilà nè dîyi dikolè, ànu bu pàtù ntambwe
ùkungula apu ne:...*

33 Tudi bamanye ne Yèyè ke Ntambwe wa cisàmbà cyà Yudà. Lwà *apa* nùnkù Yèyè ùdi Mwàna wa mùkòòkò; kàdi *apa* Yèyè ùdi Ntambwe. Nwamònu anyi?

*...nènku pàakeelàye lubilà apu, mikungulu
mwandamutekète kujìkulayi mèyi àyi.*

34 Mpindyewu, Yone wàkapèeshiibwa mudimu wà kufùnda cìvwàye mumòne, pa nànkù ki mùpostòlò, ne mupròfetà awu, kwambula kasàlà kèndè bwà kuCifùnda.

*Nè pàakamana mikungulu mwandamutekète kujìkula
mèyi àyi, nkààvwa nè mfunde: ke mèmè kuumvwa dîyi
difùmina mu dyulu dîngambila ne: Twàkù citampì ku
bintu bìvwà mikungulu mwandamutekète mijùkùle abi,
kàdi kubifundi to.*

35 Mpindyewu, ke citùdì twètù katùyì bamanyè aci's. Aci cìcìdì ne cyà kubuuludiibwa. Kacyèna mu Mifùndù yà Cijila to, cìdì Mikungulu ayi myambe aci.

Ne mwanjèlò ùmwà mumòne mwimane pa mbù ne pa buloba awu wàkajuula byanza byèndè mu dyulu, (tèèlejàayi mpindyewu)

Ne kudìcipayè kùdì ewu udi ne mwoyi kashidi ne kashidi, wàkafùka maulu, ne bintu bìdìmu awu, ne buloba, ne bintu. . . bìdìmu, ne. . . kakùwà ne cyà kwikala kàbìdì cikondo nànsha:

36 Tàngilàayi! Mvensà nyèyè ewu ùndì muswè kufikakù.

Kàdi mu matùkù à díyì dyà mwanjèlò wa mwandamutekète, pàabangàye kwela mpungi, bwalu busokoka bwà Nzambì bùdì ne cyà kujika, bu mwàkambilàye basadìdì bèndè bapròfetà.

37 Mpindyewu, nwamònu's, bwalu busokoka bwà Mukàndà wà Bitampì Mwandamutekète ewu nebùbuuludiibwe ku dyela dyà mpungi wa Mukenji wà mwanjèlò wa mwandamutekète wa èkèleeziyà. Nwamònu anyi? "Mwanjèlò wa mwandamutekète ùdì ùbanga kwela mpungi," nènku kùdì Mayiisha mafùnda mwaba awu, ne tudi naaWù pa mikàbà yà mēyì ne mu mmwènekeli wa mikàndà. Mpindyewu: "Ku ntwàdijilu wa dyela dyà mpungi wa Mukenji, bwalu busokoka bwà Nzambì bùdì ne cyà kujika, nwamònu's, pa dībà adi's." Mpindyewu netùmòne. Mukàndà awu, wà bwalu busokoka bwà Nzambì, kī mmubuulula to ànu too ne pàdì Mukenji wà mwanjèlò wa mwandamutekète mukòbòdìibwe.

38 Mpindyewu, maalu aa neikalè ne mushinga mu Bitampì, ndi mutwishìibwe, bwalu Bìdì ne cyà kudìswika pàmwè, kantu ne kantu kàaci.

39 Mpindyewu, nCifùndìibwe mu mùshindù wà kawùyì ùmwika to, bwalu muntu nànsha umwe, mwaba nànsha wùmwe, kī mMucimanyè to. Nzambì nkààyèndè, Yesù Kilstò, nwamònu's. Mpindyewu, kàdi ùdì. . . M'Mukàndà, Mukàndà wà kawùyì wùmwicka to. M'Mukàndà wà Bupikudi. Netùbwele mu cyòci aci, mu katanci kakesè emu. Nènku mpindyewu tudi bamanyè ne Mukàndà wà Bupikudi ewu kawàkumvwibwa kantu ne kantu to; Wùtu mukenkèciibwa, munda mwà bikondo bisambòmbò byà èkèleeziyà. Kàdi ku ndekeelu, pàatwàdijà mwanjèlò wa mwandamutekète kukòbola bwalu bwèndè busokoka, ùdì ùkùngwija byònsò bìvwà bishààle palepale bìvwà bakwètù aba bankenkète abi. Ne maalu masokoka àdì àpweka àfùmina kùdì Nzambì, bu Díyì dyà Nzambì, ne àbuulula dibuulula dyònsò nkòong dyà Nzambì, dībà adi Bunzambì ne bikwàbò byònsò abi bwalu bwàbì bùdì bùjika. Maalu masokoka wònsò, dimiinu dyà nyòka, ne bikwàbò byònsò, bìdì ne cyà kubuuludiibwa.

⁴⁰ Mpindyewu, nudi numòna's, mèmè ncyèna ànu nkわたkaja aci to. Ke cidi...Cidi ng'EMU MMÜDÌ MUKALENGE WAMBÀ. Nènnùbadilèci mu Mukàndà ne: "Dikòbola dyà Mukenji wa mwanjèlò wa mwandamutekète, bwalu busokoka bwà Nzambì bùvwa ne cyà kujika, mwàkambiwbàbù patòòke kùdi bapròfeta Bèndè bàà cijila abu," abu's mbapròfeta bàdi bafunde Dìyì adi. Ku dikòbola, dyà cikondo cyà mwandamutekète cyà èkèleeziyà, cikondo cyà ndekeelu cyà èkèleeziyà, byònsò bìvwà bishààle palepale, byàkakenkeciibwa munda mwà bikondo byà èkèleeziyà abi, nebikungwijiibwè byònsò pàmwè.

⁴¹ Nèнку pàdi Bitampì bicìbudiibwa, ne bwalu busokoka busokolòdiibwe, ke Mwanjèlò udi upweka ewu, Mùsànjeela awu, Kilistò, wàmrika dikàsà Dyèndè pa buloba bùme ne pa mbù, mwikàle ne mwanzankòngòlò kumutù Kwèndè. Mpindyewu, vùlukàayi ne, mwanjèlò wa mwandamutekète ewu ùdi pa buloba mu cikondo cyà Dilwa edi.

⁴² Ànu mùvwà Yone munkaci mwà kufila mukenji wèndè amu, musangu wùm wèwùm wè awu ke Maasiyà kulwa mu matùkù awu. Yone ùvwa mumanye ne ùvwa mwà kuMumòna, bwalu ùvwa ne cyà kuMuleeja ku bantu.

⁴³ Nèнку tudi bamanyè aci, mu Mifundu, lwà mu Maalàki 4 ne, kùdi ne cyà kwikala kampànda mufwànàngàne ne Yone, Eliyà kampànda—kampànda udi Dìyì dyà Nzambì mwà kulwa kùdiye. Ne yèyè ùdi ne cyà kubuulula, ku Nyumà Mwìmpè, maalu masokoka wònsò à Nzambì, ne kwalujulula Diitabuuja dyà bânà ku diitabuuja dyà baataatù bàpostòlò, kwakajulula maalu wònsò masokoka aa àvwà makenketa, munda mwà bidimu byà cyena màngumba ebi. Mpindyewu, ke cidi Dìyì dyàmbè ncyòci aci. Mèmè ndi mwambùle bujitu ànu bwà cidiDi dyàmbè. Nwamònu anyi? Nci—Ncifunda, ncyà bushùwà. Ke cidiCi ncyòci aci.

⁴⁴ Mpindyewu, tudi tumòna ne Mukàndà wà Bitampì Mwandamutekète ewu, mpindyewu, ke bwalu busokoka bwà bupikudi. M'Mukàndà wà Bupikudi, wà kùdi Nzambì.

⁴⁵ Mpindyewu, maalu masokoka wònsò awu, pa díbà edi, àvwa ne cyà kujika ku dikòbola dyà mùsànjeelà ewu. Mpindyewu, s'ke mwanjèlò ewu pa buloba; ne "mukwàbò" Mwanjèlò, Mùsànjeela wa makàndà, ùpweka. Nwamònu's, ewu mwanjèlò ùvwa mwanjèlò wa pa buloba, mùsànjeela; kàdi ke Kampànda udi utùuluka mu Dyulu ewu, ne cipungidi cyà mwanzankòngòlò, nwamònu's, ùvwa mwà kwikala ànu Kilistò nkàayèndè.

⁴⁶ Ànu menemene mwàkadibi mu Bwàkabuulwibwà, nshapità 1: "Mwimàne munkaci mwà Bitèekedi byà myèndù byà Ngòlò Mwandamutekète, mwikàle ne mwanzankòngòlò, ùmwèka ne mmwènekèlu wa dibwe dyà yasapà ne sardwanà."

⁴⁷ Nèнку's ki Yèyè ewu wàlukila, mu nshapità wa 10, paanyimà pàà cikondo cilwalwà cidi maalu masokoka wònsò aa ne cyà

kujika ne Bitampì ne cyà kucibuludiibwa, ne kukòbola ne “Kakwèna kábidi cikondo to.” Ke Yèyè kwamba ne: “Pààbanga mwanjèlò wa mwandamutekète kwela mpungi, díbà adi bwalu busokoka bùvwa ne cyà kujika, ne cívwa díbà dyà Mwanjèlò kumwènekayè.” Tukaadi pabwípì, mwaba kampànda. Cyà bushùwà. Mpindyewu mònaayi.

48 Bitampì Mwandamutekète mbilamè bwalu busokoka bwà Mukàndà awu. Too ne patwàmòna cìdì Bitampì Mwandamutekète abi bikàngilemù, nàka tudi ànu tudicinkila bintu cyanààna. Bwalu, ànu mùngǎnwǎmbìdì, mu dindà emu, pa Diyíisha dyànyì dikesè dyà mu dindà emu adi, dyà Nzambi ùdisokoka mu bupwekéle. Nudi numòna’s, twètù—twètù tudi . . . Tudi batwìshìibwe bwà kupangila cintu aci kakùyì mpatà to, ànu Cyòcì cibiulula mu bushùwà kùdì Nyumà Mwímpè, ne cishìndika mùshindu ùmwèùmwe awu. Nwamònu anyì? Mupròfetà yèyè mujuukè ne munwǎmbile ne Eci cìdì ànu Cyòcì aci, ne Nzambi kàyi ùshìndika cintu cimwècimwè to, nùcipwè mwoyi. Nwamònu anyì? Kàdi Nzambi, mu díyi dyònsò, mu kantu ne kantu, bikèngela àCishìndike, bwà kuCìvwija cijaaalàme. Nwamònu anyì? Pa nàнку, bǎna Bèndè nebàtangilè bintu abi, nwamònu’s, ne nebìikalè ne mbàbì, mònaayi.

49 Bitampì Mwandamutekète pa Mukàndà, bìdì ne . . . Bitampì Mwandamutekète ebi bìdì bitwa Mukàndà ewu cìtampì. Nwamònu anyì? Kakùyì mpatà to Mukàndà mmutwìbwe cìtampì. Nudi nucimòna anyì? Mukàndà awu kakùyì mpatà to m’Mukàndà mutwa cìtampì too ne pàdì Bitampì Mwandamutekète bicibudiibwa. Mmukanga ne Bitampì Mwandamutekète. Mpindyewu, aci’s ncishìilàngàne ne Mikungulu Mwandamutekète. Nwamònu anyì? Eci m’Bitampì Mwandamutekète pa Mukàndà. Ne Mukàndà awu kawàkwikala, Bitampì kabyàkusùuludiibwakù to too ne ku Mukenji wa mwanjèlò wa mwandamutekète. Nwamònu anyì? Pa nàнку tudi—tudi tudicinkila; kàdi dibuulula dishùwashùwàlè dyà Nzambi nedyenzeke diikale dipwàngàne mu dyela dyà mpungi adi, Bulelèlè bushìndika abu. Mpindyewu, ki cyòcì aci menemene cìdì Díyi dyamba ne: “Bwalu busokoka bùdì ne cyà kujika pa díbà adi.”

50 Ne Mukàndà wà Bitampì Mwandamutekète ewu, vùlukàayi ne, Wùvwa mukànga kaaba aka, mu Bwàkabuulwibwà nshapità mwi5, ne mu Bwàkabuulwibwà nshapità wa 10 Ùdi mukàngula.

51 Nènku mpindyewu netwikalè mwà kumòna cìdì Mukàndà wamba bwà mùshindu wùdiWu wùlwa mukàngula. Ne kí ncimanyìshìibwe to ànu pàdì Mwàna wa mùkòòkò wàngata Mukàndà, ne ùlamuna Bitampì, ne ùkàngula Mukàndà. Nwamònu anyì? Bìkèngela bwà Mwàna wa mùkòòkò àngate Mukàndà.

52 Mmusokoka. Mpindyewu vùlukàayi ne: “Muntu nànsha

umwe mu Dyulu, muntu nànsha umwe pa buloba,” paapà, mwèpiskòpò, kàrdinalè, mukùlù mutangidi wa ditunga dijimà, anyì ní nganyì yònsò udikù awu, “kènà mwà kucibula Bitampì abi to, anyi kubuulula Mukàndà awu nànsha, kàdi ànu Mwànà wa mùkòòkò.” Nènku tudi bakenkète, ne bacinkile, ne batètuke, ne badikonke, nènku—nènku aci’s ke cìdi cyenze nè tudi bwònsò mu cimvundu cyà bwena eci.

⁵³ Kàdi ne mulayi wà Nzambi wà nè Mukàndà wà Bupikudi ewu newùkangudiibwè ànu menemene kùdi Mwànà wa mùkòòkò, ne Bitampì byàwù nebìsùludiibwe kùdi Mwànà wa mùkòòkò, mu matùkù à ndekeelu mutùdi ne mwoyi mpindyewu emu. Ne kí mmumanyishiiibwe to ànu pàdi Mwànà wa mùkòòkò wàngata Mukàndà ne ùcibula Bitampì. Bwalu, vùlukàayi ne, Mukàndà wùvwa munkaci mwà kulamiibwa mu byanza byà Ewu uvwa musòmbe pa Nkwasa wa butùmbi awu. “Ne Mwànà wa mùkòòkò ùdi ùlwa kùdi Yèyè udi musòmbe pa Nkwasa wa butùmbi awu, nè wàngata Mukàndà mu cyanza Cyèndè cyà dyàbalùme.” Wàngata Mukàndà’s! Kaa, aci’s ncyà ndòndò. Netùteetè bwà kucisùulakaja bu twètù mwà kupeta mùshindù, ku dikwàcisha dyà Nyumà Mwimpè. Mpindyewu tudi munkaci mwà kuMweyemena. Nènku netùmòne, pashiiishe, ne cìdi nku cikondo cyà ku nshiiikidilu: “Pàdi cikondo cìjika.”

⁵⁴ Kakwena màngumba adi ne bukenji bwà kuumvwija Mukàndà awu to. Muntu nànsha umwe kèna ne bukenji bwà kuWùmvwija to. Mwànà wa mùkòòkò Yèyè ng’Udi uWùmvwija awu. Nènku Mwànà wa mùkòòkò Yèyè ke Udi uCyàmba, ne Mwànà wa mùkòòkò ùdi wènza nè Dìyi dimanyike, ku dishindika ne difikisha Dìyi ku Mwoyi. Nwamònu anyi? Menemene! Mònaayi. Ne kí ncibuulula to too ne . . .

⁵⁵ Mukàndà ewu kí mmubuulùdiibwe to too nè pàdi bikondo byà èkèleeziyà ne bikondo byà cyena-màngumba bijikè nkòong: “ne kakùciyi kàbìdi cikondo to.” Nwamònu bwalu abu anyi? Ùdi ùbuuludiibwa ànu paanyimà pàà bikondo byà èkèleeziyà ne bikondo byà cyena-màngumba bimanè kujika nkòong.

⁵⁶ Ki bwà cinyi cintu aci cìdi mu cibwejàkàjì cyà bwena aci dilòlò edi. Nwamònu’s, bàdi bàbàkula kaadilongesha kakesè, ne bàkùtula lubilu *mwab’ewu* batàngile ku luseke lukwàbò, bàmba ne: “Ke Cyòci eci’s!” Mukwàbò ùbàkula dikwàbò dilongesha, ùkùtula lubilu mutàngile *elu* luseke, wàmba ne: “Ke Cyòci eci’s!” Ne muntu yònsò wibakilapù dingumba, too ne mutùdi bapete nkàmà yà màngumba. Kàdi nànsha nànkù, mu biinè byònsò abi, pa kumòna cibwejàkàjì, bantu bàdi munkaci mwà kudikonka ne: “Bulelèlè ncinyi?” Aci ne kí ngiikàdilù awu leelù ewu to’s wè!

⁵⁷ Kàdi pashiiishe Yèyè ùdi ùlaya, ne: “Pààjika cikondo aci, nekwikale dikòbola dyà mpungi wa dìyi dyà mwanjèlò wa mwandamutekète, ne pashiiishe Mukàndà awu newùbuuludiibwe, nwamònu’s, pa diine díbà adi.”

58 Mpindyewu, kwàmbi ne, muntu nànsha umwe: “Bantu abu kî mbasungìdiibwe kale wàwa to.”

59 Kàdi, maalu masokoka awu, àvwàbo kabàyiku mwà kuumvwa to! Mùshindù ùdi Nzambi mwà kwikala isàtù ne, nànsha nànkù, Umwe! Mùshindù wùdi Mifùndu mwà kwamba ne: “Bàtiizàayi mu Dîna dyà Taatù, Mwànà, Nyumà Mwîmpè,” kàdi kukùdimuka kwamba ne: “Bàtiizàayi mu Dîna dyà Yesù.” Nwamònu anyi? Kaa, bintu byàbùngì be! Mmunyi mùdiku Evà mwà kudyà cimuma cyà pomme kàdi kufikishabì buloba bujimà ku—ku kabùtù? Nwamònu anyi? Bintu ebi bìdi mwà kwenzeka bishi? Kàdi maalu masokoka awu mmalayìibwe bwà kubuuludiibwawù ku cikondo cyà ku nshìikidilu.

60 Ntuntu tukesè, tushàadile mu njila kàdi . . . Balwanganyi banène bàà mvità aba bàkabwela mu cyalu, bu mùdi Irénéé, nè Martin, Martin Munsantu, nè Polycarpe, nè bakwàbò bashiilèshìilàngàne abu, ne Luther, ne Wesley, ne bwònsò aba. Nwamònu anyi? Ànu mwàkalwàbo ne kushàalabò ne mwoyi ntàntà bule bukumbàne bwà—bwà kutwàla bukênkè ne kucikenkesha, kàdi mbashìye bintu byàbùngì mu—mu mîdimà. Pashiishe kulwakù Cikondo cyà Mpenta, bu mùdi Cikondo cyà ba-Luthériens, ki kupàtukabò lubilu bènda bàlonda tutàmbà. Kàdi nànsha nànkù, èyo, kwambi ne kabàvwa babinge to. Bàvwa babinge. Kàdi kùdi bintu bishàadile mu njila, bìdi kabìyi mwà kumvwijiibwakù to. Kàdi pashiishe mu . . . Bwà cinyi? Bîtampì kî mbicibùdiibwe to, bwà kubuulula ànu kantu ne kantu kàdi bintu ebi aku. Nwamònu anyi?

61 Kàdi pashiishe, mu cikondo cyà ndekeelu, maalu masokoka wònsò aa adi ne cyà kusùulakajiibwa ne kwediibwa patòòke. Ne bìdi bikèngela bwà Bîtampì kukàngudiibwabì kùdi Mwànà wa mùkòòkò, ne kubuuludiibwabì kùdi Èkèleeziyà, nènku dîbà adi cikondo kacicyenakù kabìdi to. Nwamònu anyi? Bilenga byà dikèma! Dîbà adi, Mukàndà awu, dîbà adi, m’Mukàndà wà Bupikudi. Bwalu, pashiishe Wùdi wùtùngunuka . . .

62 Nènku netùtwalemù, pashiishe, mùshindù ùdi binunu lukàmà ne makumi ànaayi ne binaayi abi bibwejiibwa, ne bikwàbò. Èyo. Ke mwena Yuda awu’s.

63 Mpindyewu, mpindyewu, Pòlò. Tùbalàayikù ndambù mukesè. Ndi mupetè ndambù wa Mifùndu eyi, ne ndi ngèèla meeji ne bìvwa bikèngela bwà—bwà twètù ku Yibala. Mpindyewu tùbuululàayi bwònsò; Pòlò, mu Efèsò 1.

64 Bààbùngì bàà kùdìbo bàndì mmòna munkacì mwà kufùnda. Bàdi ne mikàndà yàbò ne munkacì mwà kufùnda Mifùndu, bàyifùnda mu Bible wabò, bwà yikwàtakane. Pa nànkù, aci’s—aci’s ncilenga. Mémè ntu muswè bwà nwênù kwenza nànkù, ne pashiishe kwalukila kumbèlu bwà kuCilonga. Nwamònu anyi? Nènku—nènku wèwè uCilonga, wèwè mwinè, dîbà adi neù—neücyùmvwè bîmpè menemene. Nwamònu anyi? NùCilongàayi

ànu cyanààna, ne nùlombè Nzambi bwà kunùkwàcisha bwà kuumvwa.

65 Mpindyewu túbalaàyi Mufundu kampànda—kampànda wùndì mufunde kaaba aka ewu. Efèsò 1:13 ne 14, mpindyewu.

Mu yéyè tudi kábìdì beeyèmène, paanyimà pàà nwènú bamanè kuumvwa díyì dyà bulelèlè, ne evànjeeliyò wa lupandù lwènú: mu yéyè . . . paanyimà pàà nwènú bamanè kwitabuuja, nwènú nwákatwìbwa citampì cyà Nyumà Mwímpè wa mulayi,

Udi mwikale cyeyà cyà bumpyànyì bwètù too ne ku bupikudi bwà bìdì bisumbùbwe, ku disaamuna dyà butumbi bwèndè. Nwamònu anyi?

66 Mpindyewu, patùcìdì ne Mifundu mikàngula apa, tù- . . . Nwamònu's, Nyumà Mwímpè kaaba aka, Yéyè mwinè, ùdì Cítampì. Nyumà Mwímpè n' Cítampì. Ne Cítampì cìdì cyùmvwija (cinyi?) mudimu mujikija, Nyumà Mwímpè mwikàle Cítampì kùdì muntu-nkààya. Ne bwà muntu-nkààya awu, pàdiye ùpeta Nyumà Mwímpè, dìbà adi cikondo cyèndè cyà ditwà dyà mikèmu aci ncijikè, nwamònu's, bwalu mmudimu mujikija.

67 Bu mùvwàbì ne, mvwa ne ciibidilu cyà kwenza mudimu bwà kùmpànyì wa njila wa njanja, nènku tuvwa tupàya màkaadikà ne bintu byà mu màkopo ne bintu bishiilàngàne byà mu cyàpù cyenji cyà bintu byà mu màkopo. Nènku, kàdì, dìbà adi, kumpalà kwà dikaadikà adi kutwìbwa citampì, mukòntononyi ùvwa ùlwa mwaba awu, bwà kumòna nè dikaadikà adi ní òvwa dipàya bimpè menemene. Kabìyì nàнку to, [Mwanèètù Branham ùdì ùtuutakaja byanza—Muf.] musangu wà kumpalà wànyukishiibwàci ku cintu kampànda, ncifwànyine kutangalaja bintàkanyì abi ne kubicìbula, nènku—nènku kùmpànyì wa njila wa njanja ùvwa wàmbula bujitu abu's. Nènku mukòntononyi awu ùvwa mwà kupima cintu cyònsò, bwà kumòna ní cìvwa mu kaaba kakumbànyine. Kabìyì nàнку to, ùvwa ùpiisha dikaadikà adi. Dìbà adi bìvwa bikèngela bwà twètù kucyènzulula cyònsò, too ne pàvwa mukòntononyi usànkishiibwa. Ne pashiishe pàdì mukòntononyi musànkishiibwe, ùdì ùkànga ciibi. Mukòntononyi ùdì ùkànga ciibi aci. Ne mukòntononyi ùdì ùtèèkapù cítampì, ne dìbà adi muntu nànsha umwe kèna mwà kukòsa cítampì eci pàdìci kaciyì cikafikè kùyaayàci to.

68 Ke cìdì Nyumà Mwímpè mudìtwe mu kwenza ncyòci aci. Nwamònu anyi? Ùdì ùya ne Ùdì ùkòntonona. Kì bwà cinyì kwèna mwà kwikala ne bintu ebi ne. . . Wèwè udi wamba ne: “Mémè's nkaadi mwakule mu myakulu, ne nkaadi mwelè mbila, ne nkaadi muje maja mu Nyumà.” Aci kaciyèna ne dipetangana naaCì to. Nwamònu anyi? Nyumà Mwímpè ùdì ùkòntonona muntu awu too nè pàdìYè usànkishiibwa ànu menemene ne ùmanya cìdìbo.

69 Dìbà adi, bàdì bàtwìbwa cítampì bwà kwàbò kùyaayàbò kwà Cyèndèlèlè. Kakwèna cintu nànsha cimwè cìdì mwà

kucibula Cìtampì aci to. Bible . . . Nudi nufùnda Mufùndu wènù awu's. Efesò 4:30, mmwàmbe nè: "Kanùbungamiji Nyumà Mwímpè wa Nzambi, unùdi batwibwe nendè cìtampì too ne ku Ditùkù dyà Bupikudi bwènù to." Kwàtaayi mwákù awu nè: "bupikudi," nwamònu's. Too ne ku ditùkù dyàbuuludiibwà Mukàndà wà Bupikudi, ne Mupikudi ùlwa bwà kunana bìdi bu Byèndè's! Kakwèna cìdi mwà kucyenza to. Nwamònu anyi? "KanùMubungàmiji to." Shààla . . . Enzà bintu bìdi bisànkisha Nzambi, bwalu Mukàndà mmutwibwe cìtampì, mpindyewu, ne wèwè udi mutwibwe cìtampì. Nyumà Mwímpè, Yèyè mwine, ke Cìtampì's.

⁷⁰ *Cìtampì* mbwena kwamba . . . Mpindyewu, eci's ke myàkù yìmvwà mwangàcìle mu nkòngamyàkù. *Cìtampì* cìdi cyùmvwija "mudimu mujikija." Nènku pàdi Cìtampì cyà Mwandamutekètè cìcibùdiibwe, bwalu busokoka bwà Nzambi bùdi butwibwe cìtampì mu Bitampì bìdi kabìyi byùmvwika ebi bwajikì's. Too ne ku ditùkù didi Cìtampì aci cìlamùnyìibwe, nènku dìbà adi cìdi cìbuulula cìdi munda mwàCì amu aci.

⁷¹ Muntu yèyè ùdìkonka cìdi mu dìkaadìkà amu, wàmba ne: "Kùdi ne cyà kwikala *cikampànda-cikansanga*. Kùdi ne cyà kwikala." Ùdi munkacì mwà kucinkila. Kàdi pàdi cìtampì cìlamùnyìibwe, ne ciibi cyùnzuluka, tudì tumònàmù dìbà adi ne tumòna ànu menemene cìdi munda amu.

Nudi nucimòna anyi? Nènku aci necyènjiibwè ànu ku cikondo cyà nshìikidilu.

⁷² Cìkwàbò cintu cìdi Cìtampì cyumvwija, cìdi ne "bwena cintu." Nwamònu's, Cìtampì cìdi ne cimanyinu pa Cyòci, cìleēja bwena cintu. Paùdi musùmbiibwe kùdi Mashì à Yesù Kilistò, ne mutwibwe cìtampì kùdi Nyumà Mwímpè, kùcyèna kàbìdi wa pa buloba anyi ní ncinyi cìdi cìtàngilà maalu à pa buloba to. Udi wabendè wa Nzambi.

⁷³ Cìkwàbò cintu, cìdi ne, Cìtampì cìdi "dikùbiibwa." Cìtampì mbwena kwamba ne wèwè udi mukùbiibwe. Mpindyewu, nwènù bàdi kanùyì nwitabuujà dikùbiibwa dyà Cyèndèlèèlè abu, ncyèna mumanyè to, nwamònu's. Kàdi mpindyewu, kàdi, Cìtampì cìdi cyùmvwija dikùbiibwa bwà kwàci kùyaayàci. Dyàkabi kùdi muntu wàdìdinga kuteeta kulamuna Cìtampì aci's! Ne Cìtampì cyà Nyumà Mwímpè kacyèna mwà kucìbudiibwa to.

⁷⁴ Nwènù bwònsò nukaadi bangumvwè ngàmba ne bantu bàvwa bàmba ne: "Dyabùlù ngudi mungenzèje *cikampànda*." To, to, kì ndyabùlù udi mucyenze to. Wèwè kùvwà ànu mutwibwe cìtampì munda amu to. Bwalu, paùdi mutwibwe cìtampì munda, yèyè mmukàngila pambèlu. Èyowà. Nwamònu anyi? Mpindyewu, wèwè ke uvwa mupàtùke pambèlu muyè kùdiye. Uh-huh. Yèyè kì mmufwànyine kubwela munda kulwa kùdi to, bwalu mùshindù wùmwepelè wà kubwela munda kufika

kùdi nkupicila mu njila umwèumwè ùdi mupicile awu. Bìwva bikèngela bwà kusùngidiibwayè, kujidiibwayè, ne kuujiibwa ne Nyumà Mwîmpè, díbà adi yéyè's ùwva mufwànyine kwikala mwanèènu. Pa nàнку, nudi numòna's, pa nàнку yéyè—yéyè kàakacyènta to. To, to. Wèwè udi muyè ànu ne ku mukalu kàdi kwalukila, wenda walakana bintu byà pa buloba. Kacya kùtukù mwànji kuya too ne mu Kaanààna nànsha, nudi numòna's, musabùke dyàmwàmwà dyà Yadènè, lufù lwinè to. Nwamònu anyi?

⁷⁵ Mpindyewu mònaayi ne, mpindyewu, Mukàndà ewu mmutwibwe citampì. Ne—ne wèwè udi mutwibwe citampì, ne Mukàndà awu, too ne ku Ditùkù dyà Bupikudi.

⁷⁶ Kàbìdi, mu Loomò 8:22 ne 23. Twàngatàayi aci, nènku netùfilè cishimikidi eci, pashùshe ngèèla meeji nè netùCyumvwè bìmpè ndambù bu muntu yònsò mwà kudibadilaCi. Ndi nnùpèèsha ndambù wa Mifùndu mwab'ewu, bwà twamòna mwà—twamòna mwà kuYitàngila, ne pàdi díbà dicikàle ànu ku mbilangila apa. Mpindyewu, 8, Loomò 8:22, bwà kubanga.

Bwalu tudi bamanyè ne bufùki bujimà bùdi bùtwa mikèmù ne budìnyènga mu bisaamà byà pa lulèlu pàmwè too ne mpindyewu.

Nènku kì ng'ànu bóbò nkààyabò nànsha, kàdi twètù pèètù, bàdi ne mamuma à ntwàdijilu à Nyumà, nànsha twètù biinè pèètù tutwàtwa mikèmù munda mwètù, bindìle ditèèkiibwa, mbwena kwamba ne, bupikudi bwà mubidi wètù.

⁷⁷ Kaa, ekèlekèle! Kaa, ekèlekèle! Aci kacyènakù citùfikisha twètù bakùlàkàjè aba ku didyùmvwa bilenga anyi? Bìwva bikèngela bwà twètù bwònsò kudyùmvwa bìmpè, munkaci mwà kwindilà díbà edi. Tudi tuumvwa ne eci necyènzekè ku dibìikà dyà ku lufù dyà kumpàla. Nwamònu anyi? Bufùki bùdi bùtwa mikèmù. Twètù tudi munkaci mwà kutwà mikèmù. Byònsò bìdi munkaci mwà kutwà mikèmù, bwalu tudi bamanyè ne kùdi cintu kampànda cidì kacyi cijaalàme to. Ne mùshindù wùmwèpèlè wùdiku mwà kutwà mikèmù, ne kucindila, mbwalu kùdi Mwoyi mupyamùpyà mubwele munda *emu*, ùdi wàkula bwà Buloba bupyabùpyà.

⁷⁸ Byenze mùdi mukàjàànyì mwaba ewu, ànu matùkù mashààle aa, tuvwa bayè lwà kuntweku ku supermarché. Ki mèmè kwamba ne: “Tudi bapete cintu cyà pabwàci; inàbànzà kampànda muvwàle nkanzu.” Kàdi's ciwva cyà pabwàci be, nwamònu's. Bwòbò, bàdi. . . Pàmwè ne bwònsò bwàbò kabàtu bàvwàla nkanzu to, nudi numòna's. Nènku, mu mùshindù kampànda, bàdi bàpwa mwoyi; bàdi bàpàtuka kabàyi naabi to. Nàнку díbà adi tudi. . . Bàdi bàpwa mwoyi ku bukolè.

⁷⁹ Ke nàнку, díbà adi, Meda kungambilyè, wàmba ne: “Bill, mbwà cinyi abu?” mwàkambàye.

⁸⁰ “Kaa,” mûngàakambà, “cidi ànu nyumà wa ditùnga.” Ki mêmè ne: “Paùdi uya ku Allemagne, bàdi ne nyumà kampànda. Uya ku Finlande, bàdi ne nyumà wa cyena ditùnga. Ulwa mu Àmèrikè, s’tudi ne nyumà wa cyena ditùnga.”

⁸¹ Wetù nyumà wa cyena ditùnga ngwa bilèlè, ne minèkù. Nudi bamanyè ne mbwà cinyi anyi? Twètù aba’s tuvwa bashimikila pa Dilongesha dyà bàpostòlò. Tuvwa bashimikila pa bulombodi bwà bantu banène, bu mùdi Washington, Lincoln. Kàdi tudi buumùke ku cishimikidi aci, ne tudi bamanyè ne kùdi kutùlwila ntàtu. Tudi bamanyè ne bômbè bwà mushindà bùdi ne dîna dyètù difundapù’s. Tudi bamanyè ne bupika bùdi búsanganyii bwa kumpàlà kwètù. Kabyena ne dikwàcisha bwà kudidinga to.

⁸² Bidi bîmvùlwija, byenze bu bàmwè bàà ku beena bikàsà abu, benda bàpweka ne—ne bènza minèkù, ne bènza maalu à lukutukutu’s, ne bakàjì bènza bintu byà lukutukutu mùshindù ùdibo benza awu, ne balùme, cyàpàmwè. Bidi ànu bîmvùlwija kànà kàà balùme kakesè kènda kàpìcila mu nkita, kènda kèèla mwònzù, kàteeta kudifikisha ku didyèlela meeji ne kakèèna ne bwôwà nànsha. Bushùwà, s’ùdi ne bwôwà. Nwamònu anyi? Yèyè kèna ne udiyè ùshima nànsha umwe to. S’ke bwà cinyi ùdi wèla mwònzù. Nwamònu anyi? Ùdi ùteeta kwamba ne kèna ne bwôwà to, pèndè naabù’s. Nènku’s ke lutàtù lùdiku, leelù ewu alu’s.

⁸³ Kàdi, kaa, ditèkemena kaayi dibènèshùbwe bwà mwena kwitabuuja’s wè, udi wèla byanza muulu, bwalu bupikudi bwètù bùkaadi bwènda bùseemena. Pàdiye ùmòna bintu ebi bîmwènèka, ncikondo cyà butùmbi bwà mwena kwitabuuja.

⁸⁴ Mpindyewu, bintu ebi, byà nè, mikèmù mu mibidi yètù. Nukààdikù bamòne mucì, mùdiwu wùlwanga bwà kwikala nè mwoyi anyi? Mmuswè bwà kwikala nè mwoyi. Nè mònaayi nyama, mùdiye mu—mu lufù, mùdiye ùkèngakana. Mònaayi muntu, byònsò, bufùki bùdi bütwa mikèmù. Twètù, mu twètù biinè, s’tudi tuwà mikèmù. Nwamònu anyi? Tudi bamanyè nè kùdi cintu cidi kaciyè cyènda bîmpè to. Tudi tumòna, ku mvensà eyi nè, cintu kampànda ncijimìne, nè kùdi bantu nè kùdi buloba. Bufùki bwà mùshindù kanà wònsò, mbujimìje cintu kampànda, bwalu tudi tumwèna ku Dìyi disonsola edi nè bùdi bütwa mikèmù bwà kabingilà kampànda. Wèwè, kwèna utwà mikèmù pàdiku kakùyì kabingilà bwà bwalu abu nànsha.

Bu mûmvwà ngàakula bwà mâyi à mukàndà, s’cidi nkabingilà.

⁸⁵ Ke mùshindù ùdibi awu mu kusambidila kwà babèèdi; paùdi kùyì mupètè ciledi cyà disaamà to! Ndi mumanyè bwanga, kàdi bidi bikèngela mpetè ciledi cyà disaamà. Ke bwà cinyi bikèèna—kumòna bidi bikèngedi bwa bikolè menemene nè biikàle ne mushinga wàbùngi; bidi bisokolola mùnsokòntù wà mu mwoyi, byàmbila muntu mwaba wùdiye mwenzèle cilèma, nè cyà dyenza. Nwamònu anyi? Bwanga bùdi unwà nànsha bwikàle

búngì bishi, anyì búngì munyì bwà màfutà búdi ubàpongolwela pa mitù, anyì mùdi ní nganyì ní nganyì mufwànyine kwela mbilà mikolè pambidi pèèbè; kwòkò cintu cyà kaciyi cyènda bimpè to, yéyè's neàshaalè ànu mwaba awu. Ngámbi nè “yéyè,” n'Sàtaanà's.

⁸⁶ Mònaayi, leelù ewu, mutùkaadi bayè kumpàla mu manga à lwondàpù, katwèna ànu banji kumanya kantu nànsha kàmwè pa biinè bintu ebi to. Wèwè udi wamba nè: “Ùdi nè kànsèrè.” Èè, aci kaciyèna ne bwalu to. Aci, aci—aci cidi cyàmba ànu dìnà dyà cidici. Aci cidi cifila dìnà dyà mu mamanya à baamingàngà, kànsèrè. Aci kaciyèna nè bwalu nànsha bùmwe nè cidici nànsha. Aci's ndinà ditùdi tucibiikila's. Tudi tucìnyika ànu dìnà cyanàànà nè, kànsèrè. Kàdi, mu bulelèlè, cidici, ùcisùnsùlè, ndémon.

⁸⁷ Mpindyewu, tudi twamba nè “mpèkaatù.” Tudi tucibiikila ànu nè mmpèkaatù. Cisùnsùlùlaayibi. Mpèkaatù ncinyi? Bantu bààbúngì bàtu bàmba nè: “Kunwà kwà maalà, kwenda kwà masandi.” To, to. Abi's mbyambiibwà byà mpèkaatù. Nwamònu anyi? Abi's mbidi mpèkaatù ùtwàla, nwamònu's. Kàdi mpèkaatù mulelèlè mbupidyà. Apu's ke pàdici—apu's ke pàdici cìnyikiibwa dìnà nè citèediibwa mu dìnà. Wèwè mwikàle mwena kwitabuujà, kwèna wenza bintu abi nànsha. Kàdi nànsha wèwè uteeta kudìvwija wa cijila bishi, nè nànsha wèwè uteeta kwikala mutèndeleeedi wa bishi; wèwè wenza bintu abi, udi mwena bupidyà. Aci's ncyà mu Mifundu.

⁸⁸ Mpindyewu, cintu kampànda ncijimìne, nè cidi citwa mikèmù. Cidi citeeta bwà kwalukila, bwà kwalukila ku ngiikàdilù waci wa ku cibangidilu.

⁸⁹ Nudikù mwà kudìfwànyikijila muntu kampànda mudishinde pa buloba, mu dijimbà dile mwaba kampànda, nè mwikàle ùdisuba, ùbànda, ùdikòka anyi? Yéyè ùdi, mu mùshindù kampànda anyi kansanga, nè cyà kupàtuka mu dijimbà amu. Kèna mu ngiikàdilù wendè wa ku cibangidilu to. Nènku, nè dibìnduluka dyònsò, wèla mbilà mikolè. Wèla nzàdi mu bimanu amu, wènza mutooyi, anyi wènza mùshindù kampànda. Ùdi—ùdi ùtwa mikèmù bwalu mmuswè kwalukila ku ngiikàdilù wendè wa ku cibangidilu.

⁹⁰ Ke bwà cinyi muntu kampànda, mutuuta kùdi disaamà, ùdi ùsaama nè ùtākanyika. Musangu kampànda kàvwa mùshindù awu to, kàdi ùdi ùtwa mikèmù. Bwà cinyi? Kèna bimpè to. Kùdi cintu kampànda cidi kaciyi bimpè to. Nènku ùtwatwa mikèmù nè ùteeta bwà kwalukila kùvwàye pàvwàye nè mubidi tumatuma apu.

⁹¹ Nènku pàdi bufùki nè bantu, mùdi Bible mwambè, “bàtwa mikèmù,” cidi cileeja nè kùdi cintu kampànda, cyà nè kabèena mu ngiikàdilù wabò uvwabi bikèngela kwikalabò to. Mbadishindile mu mwaba kampànda. Mpindyewu, kabyèna

bitùkèngela muntu kampàndà bwà kutùumvwija aci nànsha. Nwamònu anyi? Bwalu, mu bushùwà bwà bwalu, tudi bamanyè nè civwa m'Mwoyi wà Cyendèlèlèlè, kwàkuumukàbo pàakadishindàbo apu. Ke kujimijabò makenji àbò pa bìdì bitàngilà m'Mwoyi wà Cyendèlèlèlè, ku cibùlà cyà Adàmà nè Evà, bàakadishindà kuumukabò ku Mwoyi wà Cyendèlèlèlè, kuya ku lufù, mu budimi bwà Edènà, nè kufikishabò bufùki bwònsò, ku cyàkenzàbo aci, ku lufù.

⁹² Muci kawùvwakù wùfwa to, kumpàlà kwà Adàmà. Nyama kàvwakù mufwànyine kufwà to, kumpàlà kwà Adàmà. Nènku kùdì cintu ànu cimwèpelè cidì kaciyiku mwà kufwà to, ke Nzambi's, bwalu Yèyè ngwa Cyendèlèlèlè. Nè wòwò awu ke mùshindù wùmwèpelè wutùdiku mwà kudilama bwà kubènga kufwà, bikèngela twikalè nè Mwoyi wà Cyendèlèlèlè munda mwètù, bwà kwikala bàna bàà balùme nè bàà bakàjì bàà Nzambi.

⁹³ Kàdi patwàkafwà, mungàmbì mu Dyiisha mu dindà emu, mu kwenza kwà mpèkaatù, tudi basùmbishe bwanàabutè bwètù nè basambùke cipòngòpòngò eci. Mpindyewu tudi bayè mu ntàntà mupite bule uvwa Nzambi kàyi mwà kwolola cyanza kutùpeta to, ku luseke lwà dyàmùnù dyà cipòngòpòngò aci. Mpindyewu, mu bushùwà bwà bwalu, pàakadishindà Adàmà, kuya mu lufù, yèyè wàkatwàla lufù pa bufùki bujimà.

⁹⁴ Mpindyewu, yèyè wàkapèèshiihwa budishikaminyi bwà disungula. Bwàkabàpèèshiihwa ànu mutùdì pèètù, bwà twamòna mwà kwenza disungula. Mpindyewu, Adàmà nè Evà, ku cibangidilu aku, kùvwa mucì wà maalu mimpè nè maalu mabi kumpàlà kwàbò, nè mucì wùmwèwùmwè awu mmutèèkiihwe kumpàlà kwà umwe nè—nè umwe yònsò wa kutùdì. Nwamònu's, Nzambi kèna wènzela Adàmà anyi Evà . . . Wèwè udi wamba nè: "Èè, s'ncilèmà cyàbò bwòbò." To, kí n'cyàbò bwòbò bwà mpindyewu to. Ncilèmà cyèbè wèwè. Kwèna mwà kucyèla Adàmà pambidi mpindyewu to. Bikèngela ùdyèlèci wèwè mwinè pambidi, bwalu maalu mimpè nè maalu mabi mmateèkiihwe kumpàlà kwèbè. Tudi bwònsò pa cishimikidi ànu cyòci cimwècimwè cyà Adàmà nè Evà aci.

⁹⁵ Kàdi, nudi numòna's, patùdì tupikùdiihwa, katùcyèna kàbìdì tuswà didisungwila dyètù sungasunga nànsha, kàdi tudi tuswà disungula Dyèndè Yèyè. Nwamònu anyi? Nwamònu anyi?

⁹⁶ Mpindyewu, Adàmà nè Evà bàakaswà disungula dyàbò bwòbò sungasunga. Bàvwa baswè bwà—bàvwa baswè bwà kujandula civwà lungènyì nè ncinyì, ki kwenzabò bukèbikebi mwómò amu, kàdi kukèbaci lufù.

⁹⁷ Mpindyewu, pàkaadì muntu mupikùdiihwe, kàcyèna ùcyùka kàbìdì byà dimanya ditwè ngwengwengwe dyà mu tulaasà abi nànsha. Kàcyèna ùcyùka kàbìdì bintu byà pa buloba, lungènyì lwà pa buloba to. Yèyè kí mmuswè disungula nànsha dimwè to

nànsha kakesè. Kilistò ngukàadi dyèndè disungula, nè ki cyònsò cidiku ncyòci aci. Yèyè mmupikùdiibwe. Kàcyèna kàbìdi muswè kudilombola yèyè mwinè to. Kí mmuswè bwà muntu nànsha umwe ànwambile kwà kuyayè nè cyà dyenzayè to. Ùdi yèyè ànu windila nè ùjandula disungula dyà Mumufùki. Nwamònu anyi? Dìbà adi ùyaaya mu Dìnà dyà Mumufùki, pàdi Mufùki awu ùmwambila kwà kuyayè. Nwamònu anyi?

⁹⁸ Kàdi muntu udi wenda ukèbangana nè lungènyi, ùtu muswè kujandula nè: “Èè, ewu pàrwasè mmwimpè bikolè be; kàdi kwàka nàka bàtu bàmfuta kupita apu, nàнку nyàaya kwòko aku.” Nwamònu anyi? Nwamònu’s, lungènyi.

⁹⁹ Mpindyewu, Adàmà pààkenzàye mpèkaatù, mu kutùmà ntèmà ku dilukakaja dyà lungènyi dyà mukàjèndè pamutù pàà kushàala mukwàte ku Dìyi dyà Nzambi, s’ki cyàkafikishà Adàmà ku dyenza dyà mpèkaatù aci. Mukàjèndè wàkalukakaja lungènyi nè Sàtaanà, nè pashiishe kupàtwilayè Adàmà cipeta, nè Adàmà kulekelelayè Dìyi nè kudisùmbishaye dyònsò.

¹⁰⁰ Yèyè kujimija, kàbìdi, bumpyànyi bwèndè, pààkajìmijàye bwobùmwe bwèndè nè bukenji ku Mwoyi. Vùlukàayi nè: “Ditùkù dinwàdyàku, ditùkù adi ndinwàfwà.” Nè pààkajìmijàye Mwoyi wèndè apu, wàkajìmija kàbìdi nè bumpyànyi bwèndè mu nsòmbelu, bwalu ùvwa nè bukòntononyi bwònsò nkòong bwà kumutù kwà byònsò bwà buloba. Yèyè ùvwa nzambi kampànda wa buloba. Nzambi ùdi Nzambi wa cibwàshìbwàshì, myaba yònsò. Kàdi mwan’Èndè yèyè ùvwa nè buloba ebu mu bukòntononyi bwèndè sungasunga. Ùvwa mwà kwakula, ùvwa mwà kwinyika dìnà, ùvwa mwà kwamba, ùvwa mwà kwimanyika bufùki, ùvwa mwà kwenza cintu kanà cyònsò cìvwaye muswè kwenza aci. Nwamònu anyi? Kàdi, pààkenzàye cyòci aci, wàkajìmija bumpyànyi bwèndè.

¹⁰¹ Mpindyewu, Adàmà ùvwa mwà kwamba nè: “Mukùnà ewu, kaaba aka, wùmukè wùye kwàka,” nè wòwò wùvwa mwà kuumuka. Nè Adàmà ùvwa mwà kwamba nè: “Muci ewu, kaaba aka, wùjoomokè nè wùkunyiibwè lwà apa nùnkù,” wùvwa mwà kujoomoka nàнку. Nwamònu anyi? Bwalu ùvwa nè bukòntononyi bwònsò nkòong, bwà kumutù kwà byònsò, yèyè bu nzambi wa kànàkànà mwinshi mwà Nzambi Taatù wetù, bwalu ùvwa mwànà wa balùme wa Nzambi.

¹⁰² Mpindyewu katwènaayikù bafwànyine kwanji kwimana katancì kakesè cyanàànà nè kupetakù ànu diyiiisha dyètù dyà cyà bushùwà edi! Nwamònu anyi? Kaa! Dìbà adi, pìikalàbi nè Mashi mmacikezùle macyàlùje, twàmbè bishi bwà mpindyewu? Nwamònu anyi? Tàngilàayi cìdi Mwànà wa Nzambi, Adàmà mwibìdi awu, mwenzè. Nwamònu anyi? Kàdi mmwambè nè: “Byenzedi bìndi Mémè ngèza ebi, nenùbyènzè pèènu.” Nwamònu anyi?

¹⁰³ Adàmà wàkajìmija bumpyànyì bwèndè, buloba. Mpindyewu, kupitaci kuumuka ku cyanza cyèndè yèyè kuyaci ku cyà uvwayè musùmbìshe awu, Sàtaanà. Wàkasùmbisha diitabuuja dyèndè mu Nzambì, ku dilukakaja dyà lungènyì dyà Sàtaanà. Ki bwà cinyì, Mwoyi wèndè wà Cyendèlèlèlè, bukenji bwèndè ku Muci wà Mwoyi, bukenji bwèndè ku buloba, biinè bivwà byèndè abi, wàkajìmija kantu nè kantu kàà byòbì abi mubifile ku byanza byà Sàtaanà. Wàkabyùmusha ku cyèndè cyanza è kubitùma ku cyà Sàtaanà. Ki bwà cinyì, patùdi twakulangana apa, bikaadi, mbyalùkile nè mbikooyishìibwe. Nè dimiinu dyà Adàmà ndinyangàkàje bumpyànyì bùvwà bùkèngelà bwà Adàmà kwikalayè mupetè abu, mbwena kwamba nè buloba. Ncyà bushùwà, nwamònu's, dimiinu dyà Adàmà.

¹⁰⁴ Ngàkiimana, ditùkù adi, mu Tucson mündi musòmbèle mwàmwa. Nènkù mvwa nyiikilangana nè muntu kampànda, ku lusongo lwà mukùnà kwàka, batàngile kwinshì. Mémè kwamba nè: “Udi pèèbè wela meeji bishi! Ne, kùkaadi bidimu nkàmà yisàtù, kùvwà mukùlumpè Papago mupicilè muntu mwàmwa mubànde pa kaaditempu kèndè kàà tukàtà túbìdi aku, nè mukàjèndè musèla nè bânà basòmbè paanyimà apu, bàvwa bèndakana kuntwaku mu mwaba kampànda nè basòmbèlemù mu ditalala. Kakùvwà masandi nànsha, maalà à wiskì nànsha makesè, nànsha manàyi à mfrangà, cintu nànsha cimwè munkaci mwàbò amu to. Bàvwa nè nsòmbèlu mukezùke. Nè mubwàbwà wùvwà wùpweka nè—nè màyi, bufùkù bwònsò, wùkòsolola mu Tucson emu, wènda wèla mikunda. Nè micì yà meesikità nè yà ntùlu yisampila, mu nyùngulukilu mwònsò ku myelelu yà musulù kwàka. Nè Yèhowàh ùbitàngila nè mwikàle nè cyà kwikala mufùkìshe mimwemwe. Kàdi dyà mutòòke ùpicilakù anyì, kàdi cyènjìye ncinyì? Wùmbùlù ntùlu ayi è kuyìjuula. Wàkooyishi ditùnga, ne tupanjà twà maalà à byèrè ne milàngì yà wiskì. Kukooyishayè nsòmbèlu wa bukàlàngà wa ditùnga dijimà. Mùshindù wùmwèpelè wùvwàyekù mwà kwela Indien awu mfimbù wùvwà ngwà kushebeya bivwàye ùdya, ngombangòle ayi.”

¹⁰⁵ Pàmvwà munkaci mwà kubala ku Tombstone, ditùkù adi, mu—mu nzùbu wa dibandila mpìngù nè bimfwànyì, nè mémè kumòna bimfwànyì byà Geronimo. Nè bààbùngì bàà kunùdi mbafwànyine kwela meeji nè Geronimo ùvwà muntu mupidyè diitabuuja. Bwànyì mémè, yèyè kàdi ke uvwa mwena Àmèrikè mushùwashùwàle. Yèyè ùvwà ùlwangana ànu bwà civwà cijaalàme, civwà Nzambì mumupèèshe: buloba, nè ditùnga, nè mwaba wà disòmbèla. Mémè ncyèna mmudyulakù to. Kàdi bàsàlaayi bàà batòòke abu pàakalwàbo muntwamu, nè ciinè aci ku bukòlè, kukwàtabò buloba abu ku bukòòkeshi bwàbò, bènda bàbàshebeya byenzè bu musùmbà wà njiiji. Kàdi kùvwà fòtò wa ku cikwàcidi wa ciimamwèndè wa bukàlènge cyà maalu à lwondàpu cyà Geronimo awu, anyì lùpitaadi lwèndè. Civwa

ànu mbùlankètè yìbidì anyì yìsàtù mitàndika pa katùpà kàà mucì wà meesikità. Nè ba-Indiens, beena Àmèrikè bàà cyà bushùwà, bashùwashùwàlè, bàvwà nè mpùtá abu, bàlwànganà bwà makenji àbò mabàpèèsha kùdì Nzambi. Nènku mwómò amu, Geronimo ùsanganyìibwamù nè mwanèndè sungasunga wa mu dibòko, mwela ku lubèsè, mwimàne mwaba awu ùtàngila balwànganyi bèndè bàà mvità abu, bàtùùka mashi, bàpùnga nè kufù, kàyì nànsha nè bwanga bwà pènìsiliinà anyì cintu nànsha cimwè, kàyiku nè mùshindù nànsha mukèsè wà kubàmbulwisha to; beena Àmèrikè bashùwashùwàlè, bafila kùdì Nzambi! Kàdi ujuuka pèèbè umubiikila mùdiye muntu mupidyè diitabuuja? Mémè ndi mmubiikila nè muntu mukàlàngà.

¹⁰⁶ Cochise kàvwakù mufwànyine kwikala mwelè byanza muulu mulekèle mvità nànsha. Úkaavwa muntu mukùlákàjì. Kàdi Cilwilu cyà Àmèrikè aci, bwóbò bwónsò bavwàlè bilàmbà abi mwaba awu, kàdi kupàtukabò kuntwaku nè kujingabò kushebeya nyama yà ngombangòle. Bàvwa bàlongolola ngendu yà diya kalemba nyama, ki cyapù cyà Sharpe kwenzaci cingoma cipyacipyà cyà dyasa naaci nyama yà ngombangòle, nè kuyabò kuntwaku è kwambabò nè: “Kaa, mémè’s ndi mwendè dyàkalenga leelù ewu’s,” mwikàle wàsa nyama ayi, mwimànyine ku luseke lwà dikaadikà dyà màshandishì kampànda, anyì lwà ku dikaadikà dyà beena lwendu. Yèyè nè: “Ndi muyàse kí mmíngì kí mmíngì makùmi ànaayi leelù ewu.” Nyama yà ngombangòle makùmi ànaayi, yìvwàku mifwànyine kwikala midìishe cisàmbà cijima cyà ba-Indiens, munda mwà bidimu bibidì anyì bipite apu. Civwàbo bènza naayi ncinyi? Bàyilekela myadija myandanda mu cipèèlà amu. Minyìinyì yàayi yòyì miinè yìvwa yùlakana mu bitùpà byà malaba abi, nè yìnunkisha mu bitùpà byà malaba abi, mibwàbwà yiyìdya.

¹⁰⁷ Pàvwà Indien yèyè ùshebeya nyama wa ngombangòle, kùvwa mushìngà wà cyena-ntèdeleelu. Úvwa wàngata bikonò byèndè, ùbilàma bwà kwenza ngeesu. Bwà munyìinyì wèndè kaayi bàvwa bàwùdya, bàdya too nè munyìinyì wa byàmunda. Bàvwa bàngata munyìinyì wèndè wónsò awu bàwùlebeleja nè bàwànyika. Cisèbà cyèndè bàvwa bàcyànyika, nè bàvwa bènza bivwàlù nè nntentà. Kakùvwakù cintu nànsha cimwè. . .

¹⁰⁸ Kàdi, pàakalwà mutòoke muntwamu, muntu mupidyè diitabuuja kàdi s’ke mutòoke awu. Yèyè kàdi ke musenji webè wa wòò. Nènku yèyè wàkalwa è kushebeya nyama yà ngombangòle ayi, nè kufwìshisha ba-Indiens abu nè nzala.

¹⁰⁹ Muntu yònsò mushùwashùwàlè ewu mmufwànyine kulwà mvità bwà makenji èndè mamupèèsha kùdì Nzambi. Aci’s ndikeji pa dibèndelà dyà Àmèrikè, cyàkenzelabo Indien wa Àmèrikè aci. Twamb’eku twamb’eku, ditùngà’s ndyèndè yèyè.

¹¹⁰ Nuvwakù bafwànyine kwela meeji kaayi bu Japo-. . . Japon, anyì—anyì ní nganyi, bu Russie mwà kulwa, kwambabò nè:

“Pàtukàayi mwaba ewu! Alùkilaayi eku,” nè—nè kutwenzabò twètù nè bânà bèètù balela mutùdi benzé ba-Indiens abu amu? Kàdi, vùlukàayi nè, tudi bakùne, nè patùdi twakulangana apa netwikalè mwà kupòòla. Aci’s ke mukenji wà Nzambi, nudi bamanyè’s. Kùtu cikondo cyà kukùna, nè pashùishe cikondo cyà kunowa. Ngèèla meeji nè aci’s ndyàkabi’s. Èyowàs, mukalenge.

¹¹¹ Mpindyewu cidi cyenzèke ncinganyi? Dimiinu dikooyisha dyà Adàmà adi ndikooyishe nè kakùyi mpatà to dinyangè ditunga. Nutukù bamanyè nè Bible ùdi wàmba nàнку anyi? Nè bwalu yéye mmwenzè cyôci eci, dimiinu dikooyisha dyà Adàmà adi, Nzambi neàbàbutùle. Nudi baswè kubala aci anyi? Tùmônàayi. Ndi naaci cifùnda kaaba aka. Buulùlaayi mu Bwàkabuulwibwà, nshapità wa 11, nèнку netùjandulè cyôci aci. Ndàayi lwà mu Bwàkabuulwibwà, nshapità wa 11, nèнку netùmônè cidi Nzambi mwàmbè bwà bàdi munkaci mwà kubùtula buloba. Nshapità wa 11, nè twàngatàayi mvensà wa 18, ngèèla meeji nè nyéye, 11:18. Ki twètù bàdiku aba.

Nèнку matungà àkafùka munda, ne ciji cyèbè cyàlu (mpindyewu tângilàayi ciji cikolè cyà Nzambi), ne cikondo cyà bafwè, bwà bààmòna mwà kulumbulwishiibwa, nè bwà wèwè wamòna mwà kufila difutu kùdi basadidi bèèbè bapropetà, nè kùdi bansantu, nè kùdi aba bàdi bàciina dínà dyèbè, bwònsò banène nè bakesè; nè bwà kukèngelabi bwà wèwè kubùtula — kubùtula aba bàdi bàbutulà buloba.

¹¹² Nebènzè cinyi? Nebàpoolè cidìbo bakùne. Bushùwà. Panùdi numòna mpèkaatù ùnyeemakana mu misèesu! Mbùngi kaayi, mu dilòòlò dyà dyàlumingu edi, mbùngi kaayi bwà masandi endiibwà mu cimenga eci dilòòlò edi? Mbakàji bùngi kaayi bààshipà mucipù wàbò wa dibàkà, mu kaadisòò kakesè mu buloba kaaba aka, kàdi kàbùkidiibwà nè n’Jeffersonville aka? Mbùngi kaayi bwà mafù matùulà anùdiku nwela meeji nè mmafìdila mulubù mu Chicago emu, mu matùkù makùmi àsàtù? S’mmunkaci mwà binunu makùmi àbìdì nè bitaanu nè binunu makùmi àsàtù ku ngondo, pa kuumusha àdi kàyi mamanyisha bakòòkeshi. Ng’wiskì bùngi kaayi udi munwibwe mu cimenga cyà Chicago emu? Nudi nwelakù meeji nè ncinyi cidi cyènzeka mu Los Angeles mu bufùkù bùmwepelè? Mmisangu bùngi kaayi yidiku Dínà dyà Mukalenge ditèèdiibwe citèèlàtèèlà, mu cimenga cyà Jeffersonville leelù ewu? Mbitàmbe bwimpè mpindyewu, anyi bìvwa bitàmbe bwimpè pàakalwà George Rogers Clark mubànde pa bakè wa mici? Nudi numòna’s, kakùyi mpatà to tukàadi bakooyishe buloba nè bukooyà bwètù, nè Nzambi neàbutulè aba bàdi bàbutulà buloba. Ke cidi Nzambi mwàmbè.

¹¹³ Mwva misangu yònsò ànu ndyàmbedila nè kuvwakù ànu cintu kampànda munda mwànyì emu, citù cinanga kubànda ku mikùna bwà kumòna mùshindù wùtù Nzambi mubilongòlòlè.

114 Ndi nkina, Floride, mùdibo nè mabwè à ngaji makwàtakaja mwàmwa. Nè, kaa, ekèlekèle, s'mbipiciibwe nè mèmè mmòna ngandù yìkùpa mikilà, mu cipèèlà mwàmwa, pamutù pàà kumòna byònsò byà didingidija byàbya nè bintu bìdìbo bènza mu Hollywood abi, nè dibàlakana dyònsò dyàdya, nè misumbà yà bantu bakwàcìke maalà yàya. Nènku, kaa, ekèlekèle, ntu ànu ndyàmbidila nè: “Dìmwè nditùkù! Dìmwè nditùkù!” Èyowà's.

115 Kàdi, vùlukàayi nè, Bible mmutwàmbile, mu Maatàayi nshapità mwi5, nè: “Bapòle nebàpyanè buloba.” Aci's ncyà bushùwà. “Bapòle nè badìpwekèshe nebàpyanè buloba.” Yesù wàkamba nè: “Bapòle mbabènèshiiibwe,” bantu bàà bapwekèle bàdi kabàyi bàteeta bwà kwikala cintu kampàndà cyà cinène menemene abu, “bwòbò nebàpyanè buloba.” Ke cyàkambà Yesù. Èyowà's. Patùdi twakulangana apa bàkaadi babùkooyishe, kàdi Nzambì neàbàbùtùlè; kàdi bapòle nebàpyanè buloba, paanyimà pàà bwòbò humanè kukezudiibwa.

116 Mpindyewu, kaa, ekèlekèle! Mpindyewu, mukàndà wà bwena-cintu ùvwà mujimìne awu wùdi mpindyewu mu byanza byà Mwenawù wa ku cibangidilu, Nzambì wa Bukolè bwònsò. Mukàndà wà bwena-cintu wà buloba, nè wà Mwoyi wà Cyendèlèlèlè, pààkawùjimijà Adàmà apu; dìbà adi byanza byà manyaanu byà Sàtaanà abi kabìvwàkù mwà kuwàngata to, pa nànkù wàkaalukila kùdi Mwenawù wa ku cibangidilu awu, Nzambì Yèyè mwinè. Netùcijandulè, mu katanci kakesè cyànààna emu. Ki Yèyè awu musòmbe pa Nkwasa wa butumbi, mwikàle naawù mu cianza Cyèndè, mukàndà wà bwena-cintu awu. Kaa, aci's cidi cyèntu nè ngùmvwè butèndeledi bùmhwela. Mukàndà wà bwena-cintu ku Mwoyi wà Cyendèlèlèlè, mukàndà wà bwena-cintu mulelèlè wà kawùyi dyela mpatà to bwà Mwoyi wà Cyendèlèlèlè, pààkawùjimijà Adàmà ku lungènyi, pamutù pàà diitabuuja, kwalukilawù ku byanza byà Mwenawù, Nzambì wa Bukolè bwònsò. Cintu kaayi bulenga's wè!

117 Èyo, mwindile's. Cìdiwu wènza ncinyi? Mu byanza byà Nzambì, mwindile dinana dyà bupikudi. Yèyè wàkenza njila bwà bupikudi, Wàkenza njila wa dyalukila, nè dīngà ditùkù Mupikudi awu neikale ne cyà kuwàngatulula. Nudi bamòne kutùdi batàngile aku mpindyewu anyi? Twètù netwànji kutàngila Muntu udi musòmbe pa Nkwasa wa butumbi ewu. Èyo, mwindile dinana dyà bupikudi, bupikudi bwàwù.

118 Mukàndà ewu wà Bupikudi, bwena-cintu ebu, mukàndà wà bwena-cintu mulelèlè wà kawùyi dyela mpatà ewu ncinyi? “Wèwè udi wamba nè, ‘mulelèlè wà kawùyi dyela mpatà?’” Mulelèlè wà kawùyi dyela mpatà mbwena kwamba cinyi? Mbwena kwamba nè mmukenketa mu mùshindù wònsò kwangacila ànu paanyimà kale wàwa too nè ku ntwàdijilu wawù. Ànu bu kaadimata kakesè—ànu bu kaadimata kakesè kàà màyi à mufundu aku mu dindà emu, pààkalengàku bwanga butòokoloji abu, kààkaalukila too nè ku ntwàdijilu. Nè pàkaadi

mpèèkaatù mutonda nè mumatè mu Mashì à Yesù Kilistò, kaa, ekèlekèle, àdi àfla mukàndà wà bwena-cintu mulelèlè wà kawùyi dyela mpatà, àaluja cyàkàbìdì buludi kùdì Mufùki. Wèwè udi ulwa mwànà wa balùme wa Nzambì. Mukàndà wà bwena-cintu mulelèlè wà kawùyi dyela mpatà mmulama mu byanza byà Wa bukolè bwònsò. Kaa, ekèlekèle!

119 Bupikudi bwàwù bùdì bùùmvwija diikala nè cintu mu cyanza cyèbè dikùmbànàngàne nè mikenji dyà mukaabujimà bwà byònsò bàakajimijabò kùdì Adàmà nè Evà abi. Kaa, ekèlekèle! Bìvwa bìkèngela bwà aci kwenzelaci mwena Kilistò mulediibwe cyàkàbìdì cinyi's! Diikala naabù mu cyanza cyèbè dikùmbànàngàne nè mikenji ku mukàndà wà bwena-cintu mulelèlè wà kawùyi dyela mpatà abu adi, mukàndà wà bwena-cintu wà Mwoyi wà Cyendèlèlèlè, mbwena kwamba nè wèwè udi mu cyanza cyèbè nè byònsò byàkajimijà Adàmà nè Evà abi. Yoyòyò! Bwà aci wèwè udi wamba bìshi, mwanèètù? Diikala mu cyanza cyèbè nè bwena-cintu abu's!

120 Adàmà kàvwa mwà kukùmbaja mishingà yà bupikudi to. Paanyimà pàà yéyè mumanè kusangana nè wàkawùjimija, mùvwaye mwenzè mpèkaatù nè muditàpùlùle nè Nzambì, ùkaavwa *elu* luseke lwà cipòngòpòngò aci, nàнку kàvwa mwà kuwùpikula nànsha. Kàvwa ànu mwà kucyènzakù to, bwalu bì—bìvwa bimukèngela bupikudi, yéyè mwinè awu, nàнку kàvwa mwà kucyènza nànsha.

121 Kàdi mikenji yìvwa yìlòmba Cilongo Cipikudi. Mikenji yà Nzambì yìvwa yìlòmba Cilongo Cipikudi. Nwènu baswè kufùnda aci nàнку: “Cilongo Cipikudi,” cipetèlaayi mu Lewitiki 25.

122 Katwàkwikala nè dîbà dyà kukenketa cyòci eci kantu nè kantu to, bwalu, nudi bamanyè's, cyena-bwalu cyònsò—cyònsò ncifwànyine kwangata di—dilòlò dijimà. Nwamònu anyì?

123 Kàdi mikenji yà Nzambì yàkapeta mupinganyi. Mpindyewu, anjì ambàayi tũng bu nè Nzambì kàvwakù mufilekù bwà kwangata mupinganyi? Kàdi dinanga dyàkaMwenzèja bwà kucyènza. Bwalu, muntu kàvwa nè njila wa dyalukidila to, nè kakwèna njila wa dyalukidila nànsha umwe bwèndè yéyè to. Kwèndè kùvwa kujikè. Kàdi ngàsà wa Nzambì wàkatwìlangana nè Cilongo Cipikudi eci mu Mupèrsonà wà Yesù Kilistò. Mikenji yìvwa micilòmbè. Ngàsà kukùmbajayè mishingà yàaci. Kaa, ngàsà udi ukèmeshà, mùshindù mwinè wùdì dîyi adi dyà kalolo's wè! Mikenji yà Nzambì yìvwa yìlòmba mupinganyi ùvwa kàyì bubì bwenza to.

124 Kàdi uvwa kàyì nè bwalu bubì bwenza ki nganyi's? Muntu yònsò ewu ùvwa mulela ku disangila dyà mulùme nè mukàji, ku disangila dyà mulùme nè mukàji, muntu nè muntu. Nènku umwèpelè uvwa kàyì nàнку to, ùvwa mujimije makenji bwà Mwoyi wà Cyendèlèlèlè nè bwà kwikala mfùmù pa buloba.

125 Kaa, pândi ngèèla meeji ku Mufundu awu nè: “Bwalu Wèwè ke udi mutùpikùle è kutwàluja kùdi Nzambi, nènku tudi mwà kukòokesha nè kwikala bamfùmù nè baakwidi pa buloba.” Kaa, ekèlekèle! Cinyi? Cilongo Cipikudi’s! Kaa, muyiiki kaayi wutùdiku bafwànyine kwikala naawù kaaba aka’s wè!

126 Mònaayi, mikenji yìvwa yìlòmba Cilongo Cipikudi bwà kupikula cintu civwà cijimine. Ngàsà ke wàkakùmbaja mushingà awu mu Mupèrònà wà Yesù Kilstò. Cilongo civwa nè cyà kulediibwa mu bukwàbantu.

127 Mpindyewu, mmunyi mutùvwàku twètù mwà kwikala nàнку, pàdibi nè muntu nè muntu udi mulediibwe bikèngela ikalè. . . Nè muntu kanà yònsò uvwa kàyì mwà kumòna nè civwa ncyenzedi cyà disangila dyà mulùme nè mukàji kuntwaku to, èè, yèyè’s mmpofo ànu wetù wa menemene ewu, nwamònu’s, bwalu muntu yònsò uvwa mulediibwe ewu ùvwa mulediibwe kùdi mukàji.

128 Nè Nzambi ùvwa mulòmbè Cilongo Cipikudi, nè Ùvwa nè cyà kwikala muntu. Kaa, ekèlekèle! Cinwikalà mwà kwenza ncinyi mpindyewu? Mikenji yìvwa yìlòmba Cilongo Cipikudi.

129 Mpindyewu, Kàvwa mwà kwangata Mwanjèlò to. Bìvwa bikèngela ikalè nè muntu, bwalu katwèna bulongo nè Mwanjèlò to. Twètù tudi bulongo muntu nè mukwèndè. Kacya Mwanjèlò kàtuku mudishinde nànsha. Yèyè’s nkampànda wa mùshindù mushiilàngàne, ùdi nè mubidi mushiilàngàne. Kacya kàtuku mudishinde anyi cintu nànsha cimwè to. Yèyè mmushiilàngàne.

Kàdi mikenji yìvwa yìlòmba Cilongo Cipikudi.

130 Nè muntu yònsò pa buloba ùvwa mulediibwe ku disangila dyà mulùme nè mukàji. Mpindyewu, kanwènaayikù numòna anyi? S’ke kùdici cifùmìne aku, Ke kùdi mpèkaatù mubangìle’s. Pa nàнку nudi numòna kùdici mpindyewu anyi? S’ki yèyè ulwàlwa awu’s, dimiinu dyènù dyà nyòka adi, dìbwela. Nwamònu anyi?

131 Mpindyewu, mònaayi ne, yìvwa yìlòmba Cilongo Cipikudi. Nè Mupikudi, Cilongo Cipikudi aci, civwa nè cyà kulediibwa ku bukwàbantu. Apa nùнку, aci’s ncutùshìye mukòlò mule nè mwìpì. Kàdi lekèlaayi nkwèlèlèku Mpungi. Dilediibwa dyà kùdi nsongàakàji virgò dyàkapàtula ci—cipeta. Amen. Dilediibwa dyà kùdi nsongàakàji virgò dyàkapàtula Cilongo cyètù Cipikudi. Kàyì mukwàbò to ànu Nzambi wa Bukolè bwònsò mulwè Èmanùwèlè, umwe wa kutùdi. Èmanùwèlè! “Cilongo Cipikudi” cyàkapeciibwa. Nudi numòna’s mùdi Nzambi ùfila mushingà wà dyenza, nè kakùyì cintu nànsha cimwè citùdiku twètù mwà kwenza to. Kàdi dìbà adi ngàsà ùdi ùbwela mu cyalu nè ùbwikila mikenji ayi nè mundidìmbì wèndè, nè ùpàtula cipeta. Amen!

132 Kaa, pawàfikà Kumbèlu! Pangààpetà kazùbù kàanyi kakesè kuntwaku; kàtù Mwanèètù Neville wimba aku. Panùumvwà nwènù bwònsò cintu kampànda kuntwaku, mu dindà kampànda,

cimba nè: “Ngàsà udi ukèmesha! Mùshindù mwinè wùdì dīyì adi dyà kalolo’s, diinè dyàkasùngilà mukèngeledi wa luse bu mèmè ewu!” Nudi nwamba nè: “Butùmbì kùdì Nzambì! Mukùlumpè Mwanèètù Branham mmufike pèndè. S’nyèyè wàwa, nwamònu’s.” Èyowà’s.

Kaa, ngàsà ngutu mulongèshe mwoyi wànyì
 bwà kuciina,
 Ngàsà ngudi muumùshe bwòwà bwànyì;
 Mùshindù mwinè mulenga wàkamwèkà ngàsà
 awu
 Dìbà dīngààkiitabuujà musangù wà kumpàla’s
 wè!

¹³³ Indilaayi twànji ànu kukùfika kàdi nùmonè, mu katancì kakesè emu! Kaa, ekèlekèle! Tàngilààyaaku mpindyewu. Mukàndà awu . . .

¹³⁴ Mukàndà wà Luutà wùdì wùfila cimfwànyì cilenga be cyà cyòcì eci, mùvwà Boàzà . . . Nè Naòmì ùvwa mujimije bìvwà bu byèndè. Nwènù, nudi bamanyè. Nukàadi bangumvwè nyiishapù, kī mmwòmò anyi? Elààyikù byanza muulu pìikalàbi nè nukàadikù bangumvwè nyiishapù. Pa nàнку, nudi bumvwè, nwamònu’s. Bìvwa bikèngela bwà Boàzà kulwayè mupikudi. Nè yèyè nguvwa umwèpelè uvwa mukumbàne. Bìvwa bikèngela bwà kwikalayè cilongo, cilongo cyà mu dīsù. Nè, mu kupikula Naòmì, ùvwa wàngata Luutà. Ùvwa n’Yesù, Boàzà mwikàle cifwànyikijilu cyà Kilistò. Nènku pààkapikulàYè Izalèèlà, Wàkapeta Mukàji-musèla wa bàà Bisàmbà byà bendè. Nàнку dībà adi, nudi numòna’s, bilenga byà dikèma! Tudi naacì pa mukàbà wà mèyì, ndi mutwishiibwe nàнку, apa mu mwaba kampànda, nwènù baswè kuwùpeta.

¹³⁵ Mpindyewu mònaayaaku, mpindyewu ne, Yèyè ùvwa nè cyà kwikala Cilongo aci. Pa nàнку, nudi numòna’s, Mwanjèlò kàvwa mwà kucyènzà nànsha. Muntu kampànda kàvwa mwà kucyènzà nànsha; cìvwa nè cyà kwikala muntu, kàdi kèna mwà kwikala mulediibwe kùdì mukàji to, ku cyenzenedi cyà disangila dyà mulumè nè mukàji to. Pa nàнку, dilediibwa dyà kùdì nsongàakàji virgò, Nyumà Mwímpè wàkabwikila Màriyà nè mundidimbì. Kì bwà cinyì, Yesù kàvwa mwena Yudà to. Yesù kàvwa wa bàà Bisàmbà byà bendè to. Yesù ùvwa Nzambì. Ncyà bushùwà menemene. Mashi Èndè kaàkafùmina ku cyenzenedi cyà disangila dyà mulùme nè mukàji nànsha cimwè to. Yèyè ùvwa Mashi à cijila, mafùka à Nzambì. Nè twètù katwèna basùngila ku mashi à mwena Yudà nànsha, anyi katwèna basùngila ku mashi à bàà Bisàmbà byà bendè to. “Tudi basùngila ku Mashi à Nzambì.” Acì’s ke bilondèshile Bible. Ùdì wàmba nàнку awu. “Tudi basùngila ku . . .”

¹³⁶ Pa nàнку, nudi numòna’s, Yesù ùvwa Nzambì. Yèyè kàvwakù Mupèrsonà mwisàtù, Mupèrsonà mwinàyi, Mupèrsonà mwibìdì

nànsha. Ûvwa Mupèrsonà awu. Ûvwa Nzambi, nwamònu's. Ûvwa Nzambi, Èmanùwèlè. Nzambi wàkatùùluka mufùme mu Butùmbi, kuDibuulula. Ntu munangè kaabwalu aku, kàa Booth-Clibborn, kasàlà kanène, kalenga aku.

Mutùùlùke ùfùmina mu Butùmbi Bwèndè,
kaabwalu kàdì nè mwoyi kashidi,
Nzambi wanyì nè Musùngidi wàkalwa, nè Yesù
ki cìvwà Dìnà Dyèndè.
Mulelela mu cidìilu, mwenyi kùdì Bèndè
sungasunga,
Muntu wa tunynganyinga, binsònjì nè
dipùngà nè lufù.

Kaa, didìpwekesha kaayì dyà milongo,
ùtùtwàdila bupikudi;
Pàvwàbi mu bufùkù bwà mifitu mikolè,
kaaditèkemena nànsha kàmwè kàa
kàmwèka;
Nzambi, wa musinga mukolè, mupòle,
wàkatèka ku luseke dibàlakana dyèndè,
Kwinama bwà kwambisha ne kusungila
musùùkà wànyì.

Éyì mùshindù mwinè wùndì muMunangè's wè!
Mùshindù mwinè wùndì mMukuukwila's wè!
Mupùùyà wànyì, muunya wànyì, Byònsò
byànyì mu Byònsò's!
Mupikudi munène wàkalwa Musùngidi wanyì,
Mufùki munène awu wàkalwa Musùngidi
wanyì,
Nè kaabujimà kwònsò kàa Nzambi
kààkasòmbela munda Mwèndè.

¹³⁷ Ki Yèyè wàkakùmbaja mushingà awu's. Ngàsà wàkapàtula Mupèrsonà wà Yesù Kilistò. Nè twètù tudi tusangana nè, Mukàndà ewu mpindyewu... Nzambi wàkaalabaja ntentà Wendè, kufùmina ku Nzambi, bwà kulwa Muntu. Wàkashintulula cìvwàYe, kuumuka ku Wa bukolè bwònsò, bwà kwikala Muntu; bwà kuvwàla mmwènekèlu wa muntu, bwà Wàmòna mwà kufwà, bwà kupikula muntu. Indìlaayi too nè patwàMumòna, pàvwàku kakùyì "muntu nànsha umwe mukùmbànyine" to. Nwamònu anyi? Éyo.

¹³⁸ Mu Bible, mu Mukàndà wà Luutà, panùdì nuwùbala apu, nenùsanganè nè, muntu wa nàнку awu bàvwa bàmubiikila nè "goel," g-o-e-l. Bàvwa bàmubiikila nè n'goel, anyi, ùvwa mmuntu uvwa mwà kukùmbaja mishingà. Nè goel awu nguvwa nè cyà kwikala mukùmbàne bwà kucyènza, nguvwa nè cyà kwikala nè budìswilè bwà kucyènza, nè cyà kwikala cilongo, cilongo cyà mu dísù, bwà kucyènza.

139 Nènku Nzambi, Mufùki awu, wa Nyumà, wàkalwa cilongo cyètù pàakalwàYe muntu, bwà Wàmòna mwà kwambula mpèkaatù wetù pambidi Pèndè, nè kufuta mushinga, nè kutùpikula bwà kutwàluja cyàkàbìdì kùdì Nzambi. Ki mùdì bwalu nàнку. Ke Mupikudi nyèyè awu's.

140 Kilstò wătùpikùlù mpindyewu. Tudi mpindyewu bapikùdiibwe. Kàdi Yèyè kî mmwânji kunana bìdì bu Byèndè to. Mpindyewu, udi mufwànyine kubèngangana naanyi pa cyôci aci, kàdi anji indilà ànu katanci kakesè cyanàànà, wamònu's. Netumonè. Nwamònu anyi? Yèyè kî mmubinanè to. Nwamònu anyi? PùikalàYe mwangate Mukàndà wà Bupikudi, byònsò bivwà naabi Adàmà nè byònsò bivwàye mujimje abi, Kilstò mmubipikùle. Nè Yèyè ùkaadi mumanè kutùpikula. Kàdi Yèyè kî mmwânji kubyàngata bu Byèndè to; Kèna mwà kucyènza to ànu too nè pa cikondo cikòsa. Nè pashiishe nekùlwe dibìshiiibwa dyà ku lufù, nè pashiishe buloba nebùvwijiibwe cyàkàbìdì bupyabùpyà. Nè pashiishe neàngatè bu Byèndè, bìdì bu Byèndè bìdìYe mupetè pàdìYe mutùpikùle apu, kàdi neàcyènzè pa cikondo cikòsa. Kaa, ekèlekèle!

141 Eci ncyumvwija mu Mukàndà wà Bitampì Mwandamutekètè wutùdì twakula bwà bwalu bwàwù mpindyewu ewu. Èyo. Mukàndà wà Bupikudi, byònsò mbyumvwija emu nùнку. Byònsò bìikalà Kilstò mwà kwenza ku ndekeelu nebàtùbuulwilèbi mu lumingu elu, mu Bitampì Mwandamutekètè, bu Nzambi mwà kutwànyishila. Nwamònu anyi? Èyo. Nebibuuludiibwè. Nènku nebibuuludiibwè, pàalamunyiibwà Bitampì nè bisùuludiibwa bwètù twètù, pashiishe mpatwikalà mwà kumòna cidi ndongamu munène wa bupikudi ewu, nè dîbà kaayi nè munyi mwènjiibwàci. Byònsò mbisokoka mu Mukàndà wà bwalu busokoka ewu apa. Mmutwà bitampì, mukànga nè Bitampì Mwandamutekètè, nè pa nàнку Mwànà wa mùkòòkò ki Umwèpelè Udi mwà kubìlamuna.

142 Mpindyewu . . . (Mfwilaayikù luse.) Tudi bamanyè . . .

143 Mpindyewu, nwènù baswè bwà kutàngila mu Mifundu, nudi mwà kuya mu Yelèmiyà nè kujandula mwómò amu. Pàvwàye—pàvwàye—ùya mu bupika bwà ditunga adi, nudi bamanyè's, wà—wàkasumba kùdì tatwèndè mukwàbò . . . Mwànà wa balume wa tatwèndè mukwàbò ùvwa nè citùpà kampàndà—kampàndà cyà buloba, nè yèyè kwenza, ditwà dyà citampì adi. Nè bu twètù mwà kucyàngata cyònsò . . . Tudi nè cyôci aci kàbìdì mu *Bikondo Mwandamutekètè byà Èkèleeziyà*, bitampì abi nè bikwàbò, mwómò amu.

144 Nudi numòna's, citampì, mu Dipungila Dikùlukulu, cìvwa mùdì mukàndà muvùnga amu, nùнку ewu. [Mwanèètù Branham ùdì ùkwàta mudimu nè mabèjì à mukàndà bwà kuleeja divùnga, ditwà dyà bitampì, nè dikàngula dyà mukàndà muvùnga—Muk.] Nè apa pàvwa bwalu busokoka, nè bwalu busokoka ebu bùvwa

busokoka. Èyo, bùvwa butwìbwe citampì mu nyùngulukilu nè butèèkiibwe emu, bukenji ku *cikampànda-cikansanga*. Pashiishe, bwalu busokoka bùvwa bùlondà bàvwa bàbùjingilè cìvwà bumpyànyi ebu, nè bàlamika apa ku *elu* luseke, bu—bu—bukenji bwà *cikampànda-cikansanga*. Nè kutùngunuka nè kupweka too ne mwàkenzaci movùngu, bwalu bantu kabàvwa ne mikàndà bu *ewu* to díbà adi. Cìvwa mmu movùngu, (mbanganyì bàdi bamanyè aci's?) cìbìikidiibwa ne mukàndà movùnga. Èè, mukàndà movùnga mutwà citampì, nudi bafwànyine kulamuna kusùulula cimwè *apa*, cìvwà ciikàlàngàne bwalu busokoka bwà eci nùнку, nè kucìpaasula kucìkùtulula, nèнку nudi bafwànyine kumòna cìvwà bukenji abu. Nè pashiishe kulamuna cikwàbò kucìkùtulula, nè nudi mwà kumòna cìvwà bukenji abu's.

¹⁴⁵ Nè cintu cyònsò mu kaabujimà Apa M'Bitampì Mwandamutekètè, biikàle nè maalu masokoka à Nzambi kacya ku difùkà dyà dyulu nè buloba wònsò matwàMu bitampì, nè mabuulula kùdi Bitampì bishiilàngàne mwandamutekètè, mu mùshindù wà nè, bu Nzambi mwà kwanyisha, Yèyè ènzèku bwà tükokè Bitampì ebi nè tükèketè mu Mukàndà awu bwà kumòna nè cidì Mwòmò amu ncinyi? Nwamònu anyi? Kaa, ndi ntèkemena nè netwikalè nè cikondo cyà dicyònkómoka's! Mwaba awu bwalu busokoka bwà bupikudi mbutwà bitampì too nè... Mukàndà ewu kawùvwa mwà kwikala mubuulula kumpàlà kwà Mukenji wà mwanjèlò wa ndekeelu to.

¹⁴⁶ Mukàndà movùnga wùdikù. Tuvwa bamanyè nè Wùvwakù. Tudi bamanyè nè Wùvwa mbupikudi. Tuvwa biitabùjje nè Wùvwa mbupikudi. Yelèmiyà mmwambè nè: "Mukàndà movùnga ewu wùdi nè cyà kwikala mulamiibwe..." Panwàcibalà mwaba awu, ki cyàmbàye. Udi nè cyà kulamiibwa mu dibùngù dyà buloba. Nwamònu anyi? Kaa, cintu kaayi bulengaci mwaba awu cìndi mufwànyine kwakulapù mu katanci aka's wè! Mukàndà movùnga ewu wùvwa mulama mu dibùngù dyà buloba, dibùngù divwà musangu kampànda dilwè musunya (butùmbi's wè!), difwè, dibìike ku lufù, nè mulamiibwe mu dibùngù dyà buloba too nè ku cikondo cyà disùmba. Kaa, ekèlekè! Bilenga byà kacya's! Èyo.

¹⁴⁷ Mpindyewu, Mikenji eyi mmilama yònsò too ne ku, dibùngù dyà buloba edi, too ne ku cikondo citèekiibwè cyà Nzambi aci, cyà mùsànjeela wa ndekeelu pa buloba. Ne byònsò bìvwà bantu aba bafwànyikije abi, bàmba ne: "Ndi mumanye ne Cìdikù. Ndi ngùtabuuja ne Cìdikù." Ke kupatatabò naaCì, ne kuCìtwàlabò nè kupàtulabo bintu. Ku diitabuuja bààkaCìitabuuja. Kàdi mpindyewu bàdi ne cyà kutùtwàdilaCì ku dibuuluba, ne ku cyanza cyà Nzambi ku dishindikiibwa. Nzambi ngudi mwambe nàнку. Yèyè ngudi mulayè nàнку's.

¹⁴⁸ Mpindyewu, mpindyewu twánjàayìbì kumòna. Nè mpenyi patùvwà's? Tùyaayi ku mvensà mwi2 mpindyewu. Twàngàci ntàntà mule be bwà mvensà wa kumpàlà, kàdi twánji—

twänjäàyi—twänjäàyi kwangata mvensà mwi2. Mpindyewu, pàmwápa katwákushàála ntántà bule nàнку pa udi ulonda awu to.

Nenku ngákamòna mwanjèlò wa dikàndà ùkòbola ne diyì dikolè nè: Nganyì udi mukumbàne bwà kukangula . . . mukàndà, nè bwà kusùùlula bitampì byàwù?

¹⁴⁹ Mpindyewu, vùlukàayi. Twänjäàyi kubalulula mvensà wa kumpàla awu, bwà twamòna mwà kwangata cyònsò aci pàmwè.

. . . Ngákamòna mu cyanza cyà dyàbalùmè cyà ewu uvwa musòmbe pa nkwasà wa butùmbi . . .

¹⁵⁰ Nzambi! Nganyì mwinè awu? Kakùyì mpatà to Mulami wa ku cibangidilu wa Mukàndà wà Mwoyi awu. Yèyè ngudi muWùlamè. Nzambi ngudi muWùlamè. Pàakajimijà Adàmà, Wàkaalukila kùdì MwenaWù wa ku cibangidilu awu. Wòwò ngwèndè Yèyè.

Nè Yone (mu cikèèna-kumòna) wàkatàngila nè wákamòna mu cyanza cyà dyàbalùmè cyà ewu uvwa musòmbe pa nkwasà wa butùmbi mu—mukàndà mufùnda munda nè paanyimà, mutwà bitampì mwandamutekètè.

¹⁵¹ Nwamònu's, munda! Mpindyewu, patwikalà mwà kulamuna Bitampì ebi, nenwikalè mwà kumòna, Cìdi cyàlukila buludì mu Mifùndu, cyàlukila too nè ku ndekeelu, bwà cyònsò cyà ku Bitampì abi. Cintu cyònsò aci mu kaabujimà, cyònsò pàmwè, bwalu busokoka bwònsò mu kaabujimà, bùdi búsanganyibwa kaaba aka mu Bitampì ebi. Nwamònu anyi? Bwalu nè bwalu busokoka bwònsò bwà Bible bùdi búsanganyibwa mu Bitampì ebi. Nè Bitampì kabyèna mwà kulamunyiibwa kumpàlà kwà díbà adi nànsha. Nèncijaadikè kaaba aka, mu katancì kakesè cyanaàna emu.

¹⁵² Mònaayi's. Mpindyewu, Mukàndà awu, vùlukàayi nè, mmutwà bitampì. Cimwè ncyòci eci, nCyòci eci, Cìtampì eci. Pashiishe Cikwàbò ncivùnga, Cìtampì. Cikwàbò Eci ncivùnga, Cìtampì. M'Mukàndà wà Bupikudi. Nè cintu cyònsò mu kaabujimà, cyònsò pàmwè, ncìdi cyèza Mukàndà awu, nè Wòwò mmutwà Bitampì Mwandamutekètè. Nè, pashiishe, cidì paanyimà, mbwalu mmuvùnga. Bwalu busokoka bwà Cìtampì aci bùdi munda. Nè Bùdi bwàmba ànu nè: "Mubàndi wa pa kàbalù katòòke," anyì nè: "Mubàndi wa pa kàbalù kafiike," nè bikwàbò byònsò, pambèlu apu. Kàdi bwalu busokoka bwà Mukàndà wònsò nkòng awu bùdi mu Bitampì abi, kuumukila ku Genèsè too nè ku Bwàkabuulwibwà. Ndongamu bulubulu wa bupikudi mmubuulùdiibwe mu Bitampì Mwandamutekètè ebi. Kaa, s'ncikondo cyà mushinga's. Nzambi àtùkwàcishèku bwà twaCyùmvwà! Nwamònu anyi?

153 Mpindyewu: “Nè mwanjèlò wa makàndà...” Mpindyewu mvensà mwi2.

...*mwanjèlò wa makàndà*, nè dīyì dikolè, ùkòbola nè: *Nganyi udi mukùmbànyine...* (Mukùmbànyine bwà cinyi?) *Nganyi udi mukùmbànyine bwà kwangata mukàndà wàwa,...*

154 Mpindyewu tudi tujandula. Mukàndà wùdi penyì mpindyewu? Kùdì Mwenawù wa ku cibangidilu, bwalu Wàkajimijibwa kùdì mwànà, mwànà wa balùme wa kumpàla wa Nzambì, mu bukwàbantu. Nènku pààkajimijaye makenji èndè, bwà kutèeleja Sàtaanà, wàkalekela... Wàkenza cinyi? Wàkiitaba lungènyì lwà Sàtaanà pamutù pàà Dīyì dya Nzambì. Mpindyewu, s’tudi bafwànyine kwanji kwimana kaaba aka ndambù’s! Bànà bàà Nzambì mbaswè kwangata cingènyingenyi cyà mu sèminèrè pa Cyôci aci, pamutù pàà Dīyì dya Nzambì. Nwamònu’s, cintu cimwècimwè cyàkenzà Adàmà aci’s, kujimijaye makenji èndè. Nè pààkenzekàci, cyàkaalukila buludi. Kanwènaku mwà kumòna mwaba wùkaadi bikondo abi anyi? Nwamònu anyi? Wààkaalukila buludi kùdì Muwùlami wa ku cibangidilu.

155 Nènku Yone, mu Nyumà, ùsanganyibwa apa mu Dyulu. Mmutùntùmùnyiiibwe mpindyewu, muumùke mu bikondo byà èkèleeziyà, nwamònu’s, wàkamòna bikondo byà èkèleeziyà. Nè pashiishe yèyè wàkatùntumunyibwa, mu nshapità mwi4. Yèyè kwamba nè: “Tàmba kubànda. Nènkuleejè bintu byàlwà.”

156 Nè yèyè wàkamòna Kampànda musòmbe pa Nkwasa wa butùmbi, mwikàle nè Mukàndà ewu mu cyanza Cyèndè, mu cyanza Cyèndè cyà dyàbalùme. Elàngànàpu meeji, mpindyewu. Nènku, dībà adi, mu Mukàndà ewu mùvwa mukàndà wà bwena-cintu bwà bupikudi, ne Wàkatwibwa citampì ne Bitampì Mwandamutekètè.

157 Nè dībà adi Mwanjèlò kampànda kupàtukayè, Mwanjèlò wa makàndà, ùkòbola nè dīyì dikolè nè: “Nganyi uvwa mukùmbànyine bwà kubuulula Mukàndà; bwà kwangata Mukàndà? Nganyi uvwa mukùmbàne bwà kukàngula Bitampì abi? Nganyi uvwa mukùmbàne bwà kubuulula Mukàndà ewu?” Nwamònu’s, Mwanjèlò awu ngwàkacikonka. Yone wàkacimòna. Nè Yèyè wàkamba nè: “Mpindyewu, udi mukùmbànyine nganyi? Yèyè awu...” Kaa, ekèlekèle! Pàmwàpa ní mmémè udi udyùm vwa nùnkù’s, mùshindù ewu. “Kàdi Yèyè awu,” mwàkambà Mwanjèlò, “Yèyè awu...” Ke Mukàndà wà bupikudi ngwòwò *ewu*’s! Ke ndongamu wa bupikudi nyèyè *ewu*’s! Mùshindù wùm wèpelè wuwìkalàku mwà kupikudiibwa ngwòwò *ewu*, bwalu bukenji bwà bwena-cintu bwà bupikudi bwà maulu wònsò nè buloba’s mbwòbò *ebu*! “Yèyè awu àsemenè, Yèyè muswè.” Kaa, ekèlekèle! “Àkulè mpindyewu,

anyì Àpuwè bwà kashidi. Yèyè àseemenè ànanè Mukàndà ewu. Nganyì udi mukùmbànyìne bwà kucyènza?”

158 Ki Yone kwamba nè:

Kakùvwa *muntu nànsha umwe mu dyulu* wàkasanganyibwa mukùmbànyìne nànsha; muntu nànsha umwe pa *buloba* kààkasanganyibwa mukùmbànyìne; muntu nànsha umwe mwinshì mwà *buloba*, ukààvwakù kacya nè mwoyi nè mufwè, kààkasanganyibwa mukùmbànyìne nànsha. Muntu nànsha umwe kàasanganyibwa mukùmbànyìne nànsha.

159 Dibìikila dyà Mwanjèlò awu òvwa ndibìikila dyà bàkeba Cilongo Cipikudi bwà kumwènekaci's. Nzambì mmwambè nè: “Ndi ne mukenji; Cilongo Cipikudi cìdi mwà—cìdi mwà kwikala mupinganyi. Cilongo Cipikudi aci cìdi penyì? Udi ne bukolè bwà kuWàngata nganyì?”

160 Nènku kuumukilaci ànu ku Adàmà, kuyaci too ne ku bàpostòlò bwònsò, ne bapròfeta, ne bikwàbò byònsò, kàdi kakwàkasanganyibwa muntu nànsha umwe to. Mpindyewu, nudi nwamba bìshi bwà aci? “Muntu nànsha umwe mu Dyulu, muntu nànsha umwe pa buloba, muntu nànsha umwe uvwakù ne mwoyi to.” Eliyà ùvwa mwimàne mwaba awu. Mòsà ùvwa mwimàne mwaba awu. Bàpostòlò bwònsò bàvwa biimàne mwaba awu, anyì—anyì bwònsò bàvwà bafwè abu; bantu bwònsò bàà cijila abu, Yobò, beena meeji abu. Muntu ne muntu ùvwa mwimàne mwaba awu, ne kakùvwa muntu nànsha umwe mukùmbànyìne mene bwà kutàngila Mukàndà awu to, katwàmbi mene bwà kuWàngata ne kulamuna Bitampì to.

161 Mpindyewu paapa nè bwònsò aba bàdi bàlwila penyì? Mwèpiskòpò webè ùdi penyì's? Dikùmbana dyètù didi penyì? Katwèna cintu nànsha cimwè to. Ncyà bushùwà.

162 Yèyè wàkalòmba Cilongo Cipikudi bwà kupàtukaci, bu Yèyè mwà kufùdisha. Kàdi Yone wàkamba nè: “Muntu nànsha umwe kàvwa mukùmbànyìne to.”

163 Kì mbwà nè kakùvwakù bantu bàvwà bakùmbànyìne mwaba awu to, mpindyewu, bu mùdi Mwanjèlò kampànda; bu mùdi, cileejilu, tudi bafwànyìne kwamba nè, Ngabùdyèlè, anyì Mikàèlè. Kàdi, vùlukàayi nè, bìvwa bikèngela kwikale Cilongo. Vùlukàayi nè Yone mmwambe mwab'ewu nè: “Kàdi m-u-n-t-u nànsha umwe,” kí m'Mwanjèlò nànsha umwe to, kii m'Musalàfimà nànsha umwe to. Kabàvwakù benze mpèkaatù to, kàdi Bàvwa mu mùshindù mushiilàngàne. Kacya kabàvwakù badishinde to.

164 Kàdi bìvwa bikèngela bwà eci cìikalè Cilongo Cipikudi. “Muntu nànsha umwe,” bwalu kakùvwa nànsha umwe wa kùdìbò mupikula to. “Muntu nànsha umwe kàvwa

mukùmbànyine kuWùtàngila to.” Kaa, to! Ekèlekèle, ekèlekèle! Pa nànkù, byàkakèngela Cìlongo cyà muntu. Ke yèyè kucìlòmba, kàdi Yèyè kààkapetekakù to, mwaba nànsha ùmwè. Kakùvwa muntu nànsha umwe to. Mwèpiskòpò nànsha umwe, mwèpiskòpò wa mutàmbidile nànsha umwe, nsaserdòsè nànsha umwe, balombodi bàà myànzu nànsha bàà mafi, cintu nànsha cìmwè kacìvwa mene...kacìvwa mene nè cijila cikùmbàne bwà kutàngila mene ku Mukàndà awu to. Yoyòyò! Ekèlekèle, ekèlekèle! Aci’s ncikolè cipàngè ne mwà kukola’s, kàdi’s ke cidi Bible mwambè. Mémè ndi ntèela ànu cidi Yone mwàmbè.

Bible mmwàmbè ne Yone “wàkadila mwadi.”

¹⁶⁵ Kabìyì bu mùdi bàmwè bantu bacìlongèshe to. Mwawa munkaci mwà kutèeleja muntu kampàndà ùlongesha cyòci eci musangu kampànda, wàmba ne: “Yone wàkadila mwadi bwalu wàkadisangana kàyì mukùmbànyine to.” Kaa! Muntu kanà yònsò udi mu Nyumà Mwìmpè ewu’s mmufwànyine kumanya bishiilàngàne ne aci, nwamònu’s; mu disonsodiibwa dyà kùdi Nzambì, mmufwànyine kumanya bishiilàngàne ne aci.

¹⁶⁶ Kàdi, Yone “wàkadila mwadi.” Cìndi mémè ngèela meeji ne ncidiye mudidila. Bwalu, bu muntu nànsha umwe kàyì mukùmbànyine ne kàyì mwà kubuulula Mukàndà wà Bupikudi ewu to, bufùki bujimà bìvwa bujìmine.

¹⁶⁷ Mukàndà ngwòwò ewu, mukàndà wà bwena-cintu ngwòwò ewu, nènku neWùfidilbwe kùdi Cìlongo Cipikudi cidi mwà kukùmbanyina byònsò abi aci. Awu’s mmukenji Sungasunga wà Nzambì, ne Yèyè kèna mwà kunyangakaja mukenji Wèndè to, kèna mwà kwela mukenji Wèndè kadyòmbò to, èyowà’s wè. Nwamònu anyi? Nzambì wàkalòmba Cìlongo Cipikudi Cìvwa cikùmbànyine, Cìvwa cikùmbane mwà kucyènza, Cìvwa ne cintu cikumbanyine bwà kucyènza.

¹⁶⁸ Ke Mwanjèlò kwamba nè: “Mpindyewu lekèlè Cìlongo Cipikudi aci cìjuuke citàngile ànu kumpàla.”

¹⁶⁹ Ke Yone kutàngilayè. Ke kutàngilayè pa buloba bujimà. Kutàngilayè mwinshì mwà buloba. Kàdi kakùvwa muntu nànsha umwe to. Mwaba awu, bufùki ne byònsò bìvwa bijìmine. Mu bushùwà bwà bwalu, Yone kwasa mwadi. Byònsò bìvwa bijìmine.

¹⁷⁰ Mwadi wèndè awu wàkanènga ànu kasunsa kàmwè, kùmba kujika. Pashiishe ke umwe wa ku bakùlù abu kujuukayè, kwamba ne: “Kùdidi to, Yone.” Kaa, ekèlekèle! Mwadi wèndè wàkanènga ànu kasunsa kàmwè cyanààna.

¹⁷¹ Yone kudyambidilayè nè: “Kaa, ekèlekèle, Muntu mwinè awu ùdi penyì? S’ke bapròfetà aba biimanè mwaba awu; bàvwa balediibwe ànu mùmvwà mémè mulediibwe amu’s. Ke beena meeji abu biimàne mwaba awu’s. Kùvwa kwimàne...Kaa, kakwènakù muntu nànsha umwe kaaba aka anyi?”

172 “Ndi muswè Muntu udi mukùmbàne bwà kucyènza. Ndi muswè Muntu udi mwà kupikula.”

173 Ne yèyè kààkapeteka to, ke Yone kukùtula mwadi. Kaa, byònsò bìvwa bijìmine; ki kudilayè bujindajinda. Nènku yèyè—yèyè ùvwa mubungàme, bwalu byònsò, bufùkì bujimà, byònsò bikaavwa biyè, bu bòbò kabàyi mwà kupetakù muntu kampànda nànsha. Butùmbì kùdì Nzambi’s wè! Bwòbò kabàyi mwà kupeta muntu udi mwà kukùmbanangana ne mishìngà ayi to, mwaba awu . . . muntu yònsò ewu, ne buloba bujimà ne bufùkì, bìvwa buye. Kaa, byònsò bikaavwa bidishinde. Makenji à—à—à bupikudi, makenji à—à Mwoyi wa Cyendèlèlè, Bukènkè, makenji wònsò aa àvwa mamananà kujimija, ne kakùvwa muntu nànsha umwe uvwa mwà kufuta musinga awu to. Ke Yone kubangayè kudila mwadi, bwalu muntu nànsha umwe kàvwa mukùmbànyine to, ne muntu nànsha umwe kàvwakù mufwànyine kutàngila mene Mukàndà awu to. Kaa, byàkakèngela muntu. Yone wàkaasa mwadi, bwalu muntu nànsha umwe kàvwakù mwà kucyènza to, ne byònsò bìvwa bijìmine.

174 Ke kulwaku dîyi kampànda difùmina kùdì umwe wa ku bakùlù, uvwa mwimàne munkacì mwà Bifùkùibwa binaayi abi ne cilwìlu cinènè cyònsò cyà mu Dyulu aci, kwambayè ne: “Kùdidi to, Yone.” Kaa, ekèlekèlè!

175 Ngàsà wa Nzambi’s wè!

176 “Kùcìbuluki nànsha, Yone. Lekèlè kudila. Bwalu Ntambwe wa cisàmbà cyà Yudà, Muji ne Mùtòlokù wà kùdì Davidì, Yèyè wàcìmunu.”

177 *Kucìmuna* mbwena kwamba ne “kulwà mvità yà bibula ne, kàdì kutàmba bukolè.” Kaa, ekèlekèlè! Mu budimi bwà Getsèmànè, pàakamatà Mashi mumpàla Mwèndè, Ùvwa munkacì mwà kucìmuna. Nwamònu anyi? Yoyòyò! Nwamònu anyi?

178 “Ntambwe, ne Muji wà Davidì, wàcìmunu, wàtàmbe bukolè.”

179 Ànu bu Yakòbò, mwikale munyengyanganyi wa mwaba wàbèndè. Kàdì pàakatwilanganàye ne Mwanjèlò, wàkakwàta ndèndèndè. Kàdì Mwanjèlò kuteeta kumulamuna. Kwambaye ne: “Ncyèna—ncyèna ànu nKulekela uya to.” Wàkalamata too ne pàakapètàyè cìvwàyè ukeba aci. Ne dìnà dyèndè dyàkashintuluka, kuumuka ku *munyèngyanganyi wa mwaba wà bèndè*, mbwena kwamba ne “mudingyanganyi.” Ku cinyi? Ku “mwànà wa mfùmù ne Nzambi,” *Izàlèlèlè*. Wàkacìmuna.

180 Nènku Ntambwe wa cisàmbà cyà Yudà ewu wàkacìmuna. Yèyè ne: “Kùdidi to, Yone. Bwalu Ntambwe wa cisàmbà cyà Yudà, Muji wà Davidì, wàcìmunu. Yèyè ukaadi mucìmunè. Ùkaadi mucyènzè. Kwajiki, Yone.” Yoyòyò! Kaa, kaa, ekèlekèlè! Yèyè wàkapàtula cisukudi cìdì cyàluja mpèkaatù buludi ku

byanza bitote ne bukooya bìvwà . . . ne lungènyì lwèndè, bìvwà bimukooyishe, bikooyishe muntu's. Èyowà.

¹⁸¹ Kàdi pàakakùdimukà Yone bwà kutàngila, wàkamòna Mwànà wa mùkòòkò. Dishùilangana kaayipù ne Ntambwe's wè! Wàkamba ne: "Ntambwe wàcimunu." Nwamònu's, cyàkàbìdì, ndi mwà kukwata mudimu ne cyòci aci aci, Nzambì usokoma mu bupwekèle. Kwambayè ne: "Kùdi Ntambwe." Ke mfùmù wa nyama awu. "Ntambwe mmucimùne." Cintu cyà dikàndà ditàmbe cìdiku's n'ntambwe.

¹⁸² Nkaadiku mulààlèlèlè mu meetu mu Àfrikè mwàmwa, kuumvwa mùtù g—girafe yìdila. Ne—ne nzevu munène, wa bukòlè awu, ne mibanga yèndè kacya myela muulu ne: "Wííi, wííi, wííi." Ne kuumvwa nyama yà—yà—yà cisuku yà mu cipèèlè yèla mikunda mikolè, yà mifwànyine kuumisha mashi. Ne bi—bijàngàlálà, mu mùshindù . . . Nènku Billy Paul ne mèmè tuvwa badyolwèle paanshì mu kaaba kakesè kàà kale kabwikidija ne bisààlàsààlà byà micì. Kàdi kuumvwila, mu ntàntà mule ne mwaba utùvwà awu, ntambwe ùkungula, nènku bintu byònsò mu cipèèlè amu kupùwabì. Too ne bijàngàlálà kulekelabi didila. Mfùmù ùdi wàkula. Kaa, kaa, kaa, kaa, ekèlekèle!

¹⁸³ Neinwambidì, apu's ke pàdì màngumba ne mpatà bimata mu malaba. Bintu byònsò bìdì bishààla mu cinyàanyà pàdì Mfùmù wàkula. Ne *Ewu* m'Mfùmù, s'ke Dìyì Dyèndè adi. Kaa!

¹⁸⁴ Yèyè kwamba ne: "Yone, kutacishikù meeji to. Lekèlè kudila. Lekèlè kucibuluka, Yone. Ndi neebè mwab'ewu mmu cikèènà-kumòna; ndi munkacì mwà kukuleeja cintu kampànda. Ne ndi mumanyè ne udi mucibùlùke yònsò, bwalu, nudi bamanye's, kakwèna cintu nànsha cimwè cyà kupikula to, byònsò mbiye; kakwèna muntu nànsha umwe udi mufwànyine kukùmbaja dilòmba adi to. Kadi Ntambwe wa cisàmbà cyà Yudà . . ."

¹⁸⁵ Nudi bamanye's, wa Yudà . . . Tuvwa bacilleeje, ku mboodì eku, nudi bamanye's. Cisàmbà cyà Yudà, dyàci dibèndelè, dìvwa n'ntambwe's.

¹⁸⁶ Vùlukàayi ne, ntambwe, ne—ne ngombe, ne . . . ne bikwàbò, mutù wà muntu awu, ne bikwàbò. Ne bwòbò bindile, Baselèfimà abu, Dìyì adi; pàvwà bwònsò, Maakò, Maatàayi, Luukà, ne Yone, bwònsò biimàne banyùngùlùkile Mukàndà wà Byenzedi.

¹⁸⁷ Ki mèmè kuumvwa muntu kampànda wàmba, mwambi kampànda munène, wàmba ne: "Mukàndà wà Byenzedi wùdi ànu mudimu wà cibàndilu cyà biibaki."

¹⁸⁸ Cìvwa m'Mwonji wà mvinyò wà kumpàla ùvwàku Èkèleeziyà wa cijila mupàtule. Uh-huh! Èyowà's, mukalenge. Kàdi wòwù mupàtule mukwàbò, newikiale ànu wà mùshindù awu, kàbìdì. Èyowà's, mukalenge! Wèwè udi ne ndambù wa mvinyò misomeka, nènku yìdi munkacì mwà kukwàma bimuma byà mpùsù. Bìvwa bikèngela kwikalaci bimuma byà orange. Kàdi . . . Nwamònu anyi? Pàdì Mvinyò awu—Mvinyò awu

ùpátula ànu ditàmbà Dyèndè kàbìdì, neDìikale ànu menemene difwànàngàne ne dyà kucibangidilu adi.

¹⁸⁹ Ne Maataàyi, Maakò, Luukà, ne Yone, Èvànjeeliyò ayi yìdì miimàne mwaba awu yilama Cyòci aci. Lungènyi lwà muntu; bukolè bwà ntambwe; mudimu wà ngombe; ne lubilu lukolè lwà nkashàmà . . . anyì mukankù's wè. Èyowà, Èvànjeeliyò yìdì miimàne mwaba awu! Cinyi? Nudi bavùlùke patùvwa bacyakùle anyi? [Disangisha didi dyàmba ne: "Amen."—Muf.] Cidi mu *Bikondo Mwandamutekètè byà Èkèleeziyà*.

Mpindyewu kwambayè ne: "Ntambwe wa cisàmbà cyà Yudà."

¹⁹⁰ Bwà cinyi wa mu Yudà? "Éyi Yudà, mwedi wa mikenji kàakuya kumpalà kwèndè to, pankaci pàà binù byèndè, too ne pààlwà Shìlò. Kàdi Yèyè neàpàtukilè mu Yudà."

¹⁹¹ "Ne Ntambwe, cimfwànyi cyà cisàmbà cyà Yudà, wácimunu. Wātāmbi bukolè."

¹⁹² Kàdi pàakakènzakanayè bwà kumòna kùvwà Ntambwe awu ùsanganyiibwa, kumònayè Mwànà wa mùkòòkò. Bwalu bwà dikèma, ùkèba Ntambwe kàdi ùmòna Mwànà wa mùkòòkò. Mukùlù wàkaMubiikila ne n'Ntambwe. Kàdi pàakatàngila Yone, wàkamòna Mwànà wa mùkòòkò: "Mwànà wa mùkòòkò mwenze bu Wakashiibwa kacya ku difùkà dyà dyulu ne buloba." Mwànà wa mùkòòkò mwikàle mushipa. Cìvwa ncinyi? Mwànà wa mùkòòkò awu ùvwa ncinyi? Ùvwa ùmata mashi, mutàpa mpùtā. "Mwànà wa mùkòòkò ùvwa mushipa awu, kàdi ùvwa cyàkàbìdì ne mwoyi." Ne Ùvwa ùmata mashi. Kaa, ekèlekèle!

Mmunyi mùdì mwà kutàngila Aci, balùmyànà wa yààyà, kàdi kushààla ngènzàmpèkààtù?

¹⁹³ Mwànà wa mùkòòkò kajuukayè. Mukùlù awu kwambayè ne: "Ntambwe wácimunu, Ntambwe wa cisàmbà cyà Yudà." Nènku Yone kutàngilayè bwà kumòna Ntambwe, kadi ke Mwànà wa mùkòòkò ulwàlwa awu's, ùzakala, Mashi pambidi Pèndè, ne mpùtā. Yèyè mmucimùne. Wèwè's uvwa mufwànyine kumòna ne Ùvwakù mu mvitā. Ùkaavwa mumanè kushipiibwa, kàdi Ùkaavwa cyàkàbìdì ne mwoyi.

¹⁹⁴ Yone kàvwa mwànji kutàbaleela Mwànà wa mùkòòkò ewu kwònsò aku to, nudi bamanyè's, mwaba ewu. Kàvwa mutèèdiibwe kwònsò aku to. Mwaba nànsha ùmwè Kàvwa mutèèdiibwe to. Yone kàvwa muMumònekù to, mu Maulu mwònsò amu, pàvwaye ùtàngila apu. Kàdi's ki Yèyè ulwàlwà ewu.

¹⁹⁵ Mònaayi mwaba wàkapàtukilàYe. Ùvwa mufùmine penyi? Ùvwa mufùmine ku Nkwasa wa butùmbi wa Taatù, kùvwàYe musòmbè kacya ànu wàshipiibwa ne kubiishiibwa ku lufù cyàkàbìdì. "Yèyè wàkabiika ne kusòmba ku dyàbalumè dyà Nzambì, mwikàle ne mwoyi kashidi bwà kwenza

dyakwilangana.” Amen. Wākabiika ku lufù, leelù ewu, bu Mwakwidyanganyi, ne Mashi Èndè Sungasunga, bwà kwakwilangana bwà dipanga dyà bantu. Mpindyewu, s’ke Yéyè awu úndì ngèeyemena. Úcivwa ànu mubwikila ne bwanga butòokeshi, butòokeshi bwà difwilangana luse ku mpèkaatù abu’s.

¹⁹⁶ Yone kutàngilayè Mwânà wa mùkòòkò awu, ne Mwânà wa mùkòòkò awu ùvwa umweka ànu bu ne Ùvwa mushipiibwe. Ke pashiishe kumònayè ne Yéyè ùvwa mutàpiibwe mpùtá, ne mukòsa, ne muzaajiibwe, ne ùzonza mashi. Mwânà wa mùkòòkò ùmata mashi, ke cyàkenzekà ncyòci aci. Kabyènakù bikèmesha anyi, mwàkakèngelabi bwà Mwânà wa mùkòòkò mupwekèle kwangatayè kaaba kèètù? Ke kumònayè Mwânà wa mùkòòkò awu. Kupàtukayè.

¹⁹⁷ Yone kàvwa muMumòne to, bwalu Ùvwa mwalùkile buludì mu Cyendèlèlè, mwikàle mene wàkwilangana; ne ùleeja ne aba bàvwà balwè kùdì Nzambi, mwinshì mwà mulàmbù wà mashi à bimpàngà byà ngombe, ne à mbùji, mulàmbù wà mupinganyi, Yéyè pèndè. . .Bwalu, aba bàakaciitabuujà abu, bààkaMufunkuna. Ne Mashi kaàvwa manji kwela paanshì to, pa nànkù Yéyè ùvwa mwaba awu bwà kubàtòokeshi. Yéyè ùvwa mwaba awu bwà kukutòokeshi wèwè ne mèmè.

¹⁹⁸ Nènku, Éyì Nzambi, ndi ntèkemena ne Yéyè ùdipù dilòlò edi. Bwà ngènzàmpèkàatù yònsò, Mwânà wa mùkòòkò wàkashiipiibwa. Mmunyì mùdì Yèhowàh mwà kumòna cingà cintu cidi kaciyi Mwânà wa mùkòòkò wa ùmata mashi awu mwimàne mwaba awu’s!

¹⁹⁹ Nènku Mwânà wa mùkòòkò wàkapàtuka mu cikèènà-kumòna aci mpindyewu, bu Ukaavwa mushebeya. Mònaayi ne, ngùfùmina ku Nkwasa wa butùmbi wa Taatù. Kaa, anjì elàayiibi meeji’s! Yéyè, mmupàtukile penyi, bwà kubwela mu cikèènà-kumòna eci’s? Yéyè mmufùmine mu Butùmbi, mùdìYe musòmbèle ku dyàbalùme dyà Nzambi. Wàkaasa lwendu, mutàngile kùdì Yone, upàtukila mu Butùmbi.

²⁰⁰ Kaa, kí ncifwànyinekù kwikala cintu cyà butùmbi bu meeji ètù à bubì aa, dilòlò edi, mwà kwikala matèekiibwe ku luseke ntàntà bule bukùmbàne bwà kuMwitaba, nènku Yéyè mmufwànyine kwasa lwendu kwambwila ànu mu Butùmbi mwàmwa, dilòlò edi, bwà kulwa kuDìmanyisha kùdì yònsò wa kunùdì!

²⁰¹ Mwânà wa mùkòòkò munkaci mwà kwasa lwendu ùmukila ku Butùmbi, bwà dyakwilangana, èyo, bwà kunana mpindyewu byà bupikudi Bwèndè! Vùlukàayi ne, Yéyè ùvwa mu mudimu Wèndè wà butwàngaji kale ewu. Kàdi, vùlukàayi ne, Bitampì ebi bidi pabwìpì ne kukàngudiibwa, ne Mwânà wa mùkòòkò mmufùmine mu mwaba wà cijila wà Nzambi, wàkaasa lwendu mutàngile ànu kumpàla.

202 Indilaayi too ne patwàfikà kuntwaku, dîbà òm̀wè adi, kwangata “citupà cimwè cyà dîbà” aci cidi ciikale cinyàànyà aci’s. Mwaba wà cijila wùkaadi wùfwima mìshì. Kakùcyèna kàbìdì dyakwilangana to. Mulàmbù mmuumùke. Cikaadi Nkwasa wa Cilumbulwidi. Kakùcyènapù kàbìdì Mashì to, bwalu Mwànà wa mùkòòkò mudìbwikìle Mashì awu mmumanè kwasa lwendu. Kwindidi too ne pa diinè dîbà adi to. Nudi bavùlùke mu Dipungila Dikùlukulu anyì? Pàvwà ànu mashi kaàyì pa nkwasa wa ngàsà apu, cìvwa nclumbulwidi; kàdi pàvwà ànu mashi miikàlepù, kùvwa luse. Kàdi pààkuumuka Mwànà wa mùkòòkò, bwalu kutùuka’s!

203 Yèyè ùvwa cinyì? Ùvwa Mwakwidyanganyi. Kì mmùngà muntu to! Ngambilaayaaku mwaba ùdì Màriyà mwà kwenza dyakwilangana dîbà adi’s. Ncinyì cìvwà Màriyà mwà kulàmbula? Ncinyì cìvwà François Munsantu mufwànyìne kulàmbula, Assise Munsantu, anyì ní nganyì, ne Cecilia Munsantu’s wè, anyì muntu mukwàbò kanà yònsò ewu? Kacya Yone kàtukù mwanjì kumòna bansantu cinunu bafùmìne ku mudimu wà butwàngaji to. “Yèyè wàkamòna Mwànà wa mùkòòkò, Mwànà wa mùkòòkò uvwa mushipa awu, ùmata mashi.” Bùngì bwà bansantu bààkashipiibwà abu; bàvwa bwònsò bacikùmbànyìne, yònsò wa kùdìbo. Ànu mwàkamba mwíbì ku nkùrusè ne: “Tudi benze mpèkaatù, ne tudi bakùmbànyìne cyòcì eci. Kàdi Muntu ewu kèna ne cidiYe mwènzè nànsha cimwè to.” Yèyè ke Muntu umwèpelè uvwa mukùmbànyìne.

204 Ki Yèyè ulwàlwa ewu, ùumukila ku mwaba wà dyakwilangana. Yèyè ulwàlwa bwà cinyì mpindyewu? Mutàngilaayi! Kaa, kaa, kaa, ekèlekèle!

205 Yone ùvwa ùdila mwadi. Byònsò—byònsò abi bìdì penyì? Cùikalà mwà kwenzeka ncinyì?

206 Yèyè ne: “Kùdidi to, Yone,” mwàkambà mukùlù awu. “Ki Ntambwe ulwàlwa ewu. Yèyè ke Uvwa mucimùne.” Pààkatàngilàye, ke Mwànà wa mùkòòkò ulwàlwa ewu, ùmata mashi, wàkashipiibwa awu.

207 Cyònsò cìdì cishebeya cìdì cimata mashi. Nudi bamanye’s, ncishipiibwe. Muminu wèndè mmupimba, anyì cikampànda. Ùdì ne mashi pambidi pèndè pajimà.

208 Ke Mwànà wa mùkòòkò ulwàlwa ewu, mwikale mushipa. Ke kulwaYe, kaa, ekèlekèle, (cinyì?) bwà kunanaYè bupikudi Bwèndè. Amen. Kaa! Kaa! Ndi . . .Kwenakù ànu udyùmvwa ànu bu wa kuya mu ditumba mwàmwa, kusòmba paanshì ne kudilàkù ndambù anyì? Ke Mwànà wa mùkòòkò ulwàlwa ewu, mucikàle ànu ùmata mashi. Yone . . .Kakùvwakù cintu nànsha cimwè kuntwaku to; bantu bwònsò bàà bamanyìke bikolè bàvwa biimàne myaba yònsò, kàdi kakùvwa nànsha umwe wa kùdìbo uvwa mwà kucyènza to. Pa nànku, ke Mwànà wa mùkòòkò

ulwàlwa ewu, mpindyewu. Matùkù Èndè a dyakwilangana àkaadi majikè, matùkù à butwàngaji.

²⁰⁹ Apu mpiikalà Mwanjèlò ewu mwà kwimana mwaba awu. Wèwè indilà too ne patwàbwela mu Bitampì. “Ne cikondo kacayàkwikalakù kàbìdì to.” Ncyà bushùwà. Ne “cyàbibìdì cimwè cyà dîbà cyà cinyàànyà aci.” Tàngilàayi numòne cidì cyènzeka mu cyàbibìdì cyà dîbà cyà cinyàànyà aci, mu cikondo cyà Citampì cyà Mwandamutekètè aci, dilòòlò dyà dyàlumingu dilwalwà edi, bu Mukalenge mwà kwanyisha.

²¹⁰ Ûdi ùpàtuka (cinyi?) bwà kwangata makenji Èndè mpindyewu’s. Kaa, ekèlekèlè! Ùpàtuka bwà kwangata makenji Èndè! Mpindyewu, Yèyè ùkaavwa mwènzè mudimu wa Cilongo. Ùvwa mutùluluke, mulwè Muntu, mufwè. Wàkenza mudimu wà Cilongo wà bupikudi, kàdi kàvwa mwanji kunana makenji Èndè to. Mpindyewu Yèyè ùdi ùbwela mu cyalu bwà kunana makenji Èndè, (tàngilàayi numòne cidì cyènzeka) kaa, ekèlekèlè, àvwàba baMushipèele, bwà muvwàYe mulwè Cilongo cyà muntu, bwà kufwà pa kaaba kèndè, bwà kumupikula. Kàdi, mukùlù awu ùvwa mubingè pàakambàye ne Yèyè ùvwa “Ntambwe,” nwamònu’s. Mukùlù wàkaMubiikila, wàmba ne: “Ntambwe.” Bwalu, Yèyè ùvwa Mwànà wa mùkòòkò, Mwakwidyanganyi, Mwànà wa mùkòòkò ùmata mashi, kàdi mpindyewu Ùdi ùpàtuka bu Ntambwe. Matùkù Èndè à dyakwilangana àkaadi majikè.

²¹¹ “Ewu udi mukooyike àtungunukè ànu ne kwikala mukooyike. Ewu udi mwakàne àtungunukè ànu ne kwikala mwakàne. Ewu udi wa cijila àtungunukè ànu ne kwikala wa cijila.” Cintu aci ncikànga. Kaa, mwanèètù! Dîbà adi ncinyi? Dîbà adi ncinyi?

²¹² Nènkù, vùlukàayi ne, cìlwalwa mu cikondo cyà mwandamutekètè cyà èkèleeziyà, piikalà maalu masokoka à Nzambì ne cyà kukàngudiibwa. Mpindyewu tàngilàayi ne ntèmà yònsò. Eci ncintu cinùdì ne cyà kuumvwa. Mpindyewu, Yèyè ùvwa wènza mudimu Wèndè wà butwàngaji, mwikàlè wàkwila mwena kwitabuujà. Munda mwà bidimu binunu bibidì Yèyè ùkaavwa mwàlukilemù, Mwànà wa mùkòòkò. Mpindyewu Yèyè ùdi ùpàtukila mu Cyendèlèlèlè, bwà kwangata Mukàndà wà bwena-cintu, ne kulamuna Bitampì, ne kubuulula maalu masokoka. Ndîbà kaayi adi’s? Ku cikondo cyà ku nshìikidilu.

²¹³ Nudi nucyùm vwa anyi’s? [Disangisha didi dyàmba ne: “Amen.”—Muf.] Èyo, netùtungunuke dîbà adi.

²¹⁴ Mpindyewu, kulamuna Bitampì ne kubàsùl wila maalu masokoka wònsò, kùdì mwanjèlò wa mwandamutekètè, mwena Mukenji ùdì ne cyà kubuulula maalu masokoka wònsò à Nzambì. Maalu masokoka à Nzambì àdi àsanganyiibwa mu Bitampì Mwandamutekètè ebi. Nwamònu anyi? Ke cyàkambàYe apa

ncyôci aci. Maalu masokoka wônsò àdi àsanganyiibwa mu Bitampì Mwandamutekètè ebi.

215 Ne Mwânà wa mùkòòkò ùdi ùpàtuka mpindyewu, ùmukila ku diikala Mutwàngaji pankacì pàà Nzambi ne bantu. Yèyè ùdi ùshààla Ntambwe. Nènku pàdiYe ùshààla Ntambwe, Ùdi wàngata Mukàndà. S'ke makenji Èndè awu's. Nzambi mmuWulame, bwalu busokoka abu, kàdi mpindyewu Mwânà wa mùkòòkò nyèyè ulwàlwa awu's.

216 Muntu nànsha umwe kàvwa mwà kwangata Mukàndà awu to. Wùcidi ànu mu byanza byà Nzambi. Paapà nànsha umwe, nsaserdòsè, cyônsò cìdi cifwànyine kwikalakù aci, kabèèna mwà kwangata (to) Mukàndà awu's. Bitampì Mwandamutekètè kî mbibuulula to. Nwamònu anyi?

217 Kàdi pàdi, Mutwàngaji awu, pàdi mudimu Wèndè mwenjùbwe bu Mwakwidyanganyi, Yèyè ùdi ùlwa. Nènku Yone. . .Mukùlù awu kwambayè ne: "Yèyè n'Ntambwe." Ke Yèyè kupàtuka. Mutàngilaayi Yèyè. Kaa, ekèlekèle! Nwamònu anyi? Ùdi ùpàtuka bwà kwangata Mukàndà, mpindyewu tàngilaayi, bwà kubuulula maalu masokoka à Nzambi, bìdi bakwàbò bacinkile, mu bikondo byônsò byà cyena màngumba ebi.

218 Nwamònu's, pashiishe, mwanjèlò wa mwandamutekètè. Piikalàbi ne Mukàndà ewu, maalu masokoka, n'Diyi dya Nzambi, bikèngela bwà mwanjèlò wa mwandamutekètè ikale mupròfetà, bwà Diyi dya Nzambi kulwadi kùdiye. Ní mbansaserdòsè, ní mbaapaapà, anyi ní ncinyi cikwàbò, kabèènakù mwà kuCìpeta to; Diyi kadyèna dilwa ku bàà nànkù to. Diyi dya Nzambi ditu dilwa ànu kùdi mupròfetà nkàayèndè, misangu yônsò. Maalàkì 4 ngudi mulayè nànkù. Nènku pàpàtukàyè, ùvwa mwà kwangata maalu masokoka à Nzambi, kùvwa ekèleeziyà ne cyà kwikala mu cimvundù mu màngumba wônsò ne: "Ne kwalujulula Diitabuuja dya bânà kùdi baataatù." Ne pashiishe cilumbulwidi cyà buloba neciikale mwà kukùma, ne buloba nebwikale mwà kwoshiibwa. Ne pashiishe baakàne bàvwa mwà kwendela pa butù bwà beena lwonji, mu Bukalenge bwà bidimu cinunu.

219 Nudi nucyùmva mpindyewu anyi? [Disangisha dìdi dyàmba ne: "Amen."—Muf.] Èyo.

220 Bakwàbò bàkaavwa bacinkile, mu cikondo cyà cyena màngumba. Kàdi, nwamònu's, yèyè ùdi ne cyà kwikala muntu ewu, mwanjèlò wa mwandamutekètè wa. . .Bwàkabuulwibwà 10:1-4 ùdi. . .Mwanjèlò wa mwandamutekètè ùdi ne maalu masokoka à Nzambi mamupèèbwe, ne ùjikija maalu masokoka wônsò àvwa mashìya awu, munda mwà bikondo byà cyena màngumba.

221 Mpindyewu nudi mwà kumòna bwà cinyi ncyèna ndwisha bânà bèètù bàdi mu dingumba abu to. Bwalu ndongolwelu wa

dingumba! Kabèèna, kabyèna bikèngela bwà bwôbò kuteeta kuCimanya to, bwalu Cyôci aci kí ncifwànyine kubuuludiibwa to. Aci's cidi bilondèshile Dìyì. BààkaCìcinkila, ne kwelabo meeji ne Civwa kuntwaku, nè ku diitabuujà bààkendelaKù, kàdi mpindyewu nCijaadikiibwe bushùwà menemene. Amen. Kaa, ekèlekèle, Mufundu kaayipu—kaayipu's wè!

²²² Mpindyewu tàngilàayi. Pashiishe n'Yèyè, Mwànà wa mùkòòkò, udi wangata kaaba Kèndè kàà bu Mfùmù aku, pàdi bansantu Bèndè bàlwa kuMwasa cifulu cyà butùmbi ne: “Mukalenge wa mukalenge, ne Mfùmù wa bamfùmù.” Nwamònu anyi?

²²³ Nwamònu's: “Cikondo cyàjiki.” Bwàkabuulwibwà 10:6: “Kakùcyèna kàbidi cikondo to.”

²²⁴ Mònaayi ne, kùdi “nsèngu mwandamutekète” pa Mwànà wa mùkòòkò ewu. Nukààvwaku bamòne aci anyi? “Mwikale ne nsèngu mwandamutekète.” Tudi bafùmìne ànu ku dicimòna's. *Nsèngu* mbwena kwamba ne “bukolè,” bwà nyama. Nènku, mònaayi ne, Yèyè kàvwa nyama to, bwalu Wàkangata Mukàndà mu cyanza cyà dyàbalùmè cyà Ewu uvwa musòmbe pa Nkwasa wa butùmbi awu. Nwamònu anyi? Mònaayi's. Kaa, ekèlekèle!

²²⁵ Ngèèla meeji ne mvwa mucifunde mwaba kampànda; kaa, bwà kulamuna Bitampì, ne kusùùlula mukàndà, mukàndà wà bwena-cintu, ne—ne Mukenji bwà mwanjèlò wa ndekeelu. Nènku Ùdi wàngata kaaba Kèndè kàà Mfùmù. Ke cidiYe ùpàtukila mpindyewu bwà kwenza aci's.

Mpindyewu tàngilàayi ne, pàdiYe ùpàtuka: “Nsèngu mwandamutekète.”

²²⁶ Mpindyewu, pààkamònaye Mwànà wa mùkòòkò ewu, Yone ùvwa muMutàngile, Ùvwa—Ùvwa ùmwèka ànu bu nè Yèyè ùvwa mushebeya, ùmata mashi. Ne Yèyè mmufùmìne ku Cyendèlèlèlè, ne Wàlekedì bwà kwikala Mutwàngaji.

²²⁷ Dìbà adi sambilaaku Màriyà mwònsò mùdi muswè amu's! “Kakùvwa muntu nànsha umwe mu Dyulu, ne pa buloba, anyi muntu nànsha umwe, cifùkùibwà mwaba nànsha wùmwè, mufwànyine kucyàngata to.” Yone wàkadila too ne mwadi bwà bwalu abu. Kaa, wèwè mulundà wanyì mwena Kàtòlikè, kwèna mwà kumònakù aci anyi? Kùsambidi muntu mufwè kampànda to.

²²⁸ Mwànà wa mùkòòkò s'ke Mutwàngaji umwèpelè. Nwamònu anyi? Yèyè ke Wàkapàtuka awu. Kàdi mpindyewu cyàkenzàYe ncinyi's? Ùvwa panyimà apa wàkwilangana, too ne mùdi Mashi Èndè mafutè cibawu bwà muntu ne muntu. Nènku Mwànà wa mùkòòkò, mpindyewu, mmumanyè cidi cifunda mu Mukàndà. Pa nànku, Yèyè ùvwa mumanyè kacya ku difùkà dyà dyulu ne buloba ne mènà àbò àvwa munda Amu, pa nànku Yèyè mmwimàne paanyimà apa ne mu-. . .ne—ne, kàdi, mwènze mudimu wà Mutwàngaji mùshindù ewu too ne. . .mudimu wà

butwàngaji, too ne pìikalà muntu yònsò udi mufùndiibwe mu Mukàndà awu mupikùdiibwe, nènku kumba kùjika's. Kàdi mpindyewu Yèyè ùdi ùpátuka. Nwamònu anyi? Yèyè wàkenza mudimu Wèndè wà Cilongo. Yèyè ùdi byònsò. . . Nudi bamanyè cìvwà mudimu wà Cilongo anyi? Bwà kufila bujaadiki kumpàlà kwà bakùlù. Nudi bavùlùke mwàkavùlùlà Boàzà cisàbaatà cyèndè, ne bikwàbò's? Yèyè mmwenzè byònsò ebi mpindyewu.

²²⁹ Mpindyewu Yèyè ùdi ùlwa bwà kwangata Mukàj'Èndè-musèla. Amen. Ùdi ùlwa mpindyewu bu Mfùmù. Ùdi wènda ùkèba Mukalenge-mukàjì Wèndè. Amen. Amen. Mu Mukàndà emu ke mùdi munsokòntù wààCì mujimà, mujingila wònsò, ne Bitampì Mwandamutekète. Kaa, mwanèètù! Bitampì Mwandamutekète, bindile bwà kulwaYè. Mònaayi's.

²³⁰ Twàngatàayi bimfwànyì ebi. Èè, tucidi ànu díbà citèemà jaajaaja. Tudi ne mèbà àsàtù anyi mapite apu, bwà kuya. Tudi ne . . . twànjàayi ànu. . . Sàtaanà mmutùngùnùke ànu ne kungambila ne bantu abu bàkaadi bàcyòke, nànkù ndi ngèèla meeji ne ke mùdibi. Kàdi twànjì—twànjì twàngatàayi eci, nànsha bìshi.

²³¹ “Nsèngu mwandamutekète” yìvwa ng'èkèleeziyà mwandamutekète, nwamònu's, bikondo mwandamutekète byà èkèleeziyà, bwalu's ke cìvwà dikubiibwa bwà Mwànà wa mùkòòkò. CìvwàYe ùkùba naaci makenji Èndè pa buloba cìvwà mMusùmbà wà bantu mutùma kùdi Nzambi bàvwa bàkùba; nwamònu's, lusèngù lùvwà pa Mwànà wa mùkòòkò alu's.

²³² “Mèsù mwandamutekète” ke baamisànjeelà mwandamutekète bàà bikondo mwandamutekètè byà èkèleeziyà. “Mèsù mwandamutekètè,” beena lùmònò mwandamutekètè.

²³³ Nudikù baswè kufùnda ndambù wa Mifùndu anyi? Twànjàayibi ànu kuyitàngila tùng. Nudi nwamba ncinyi, nudi ne díbà bùngì bukùmbàne anyi? [Disangisha didi dyàmbe ne: “Amen.”—Muf.] Èyo. Tùyaayi mu Zekàayi, Mukàndà wà—wà Zekàayi, katanci kakesè cyanàànà, nènku netù—netùbalè ndambù wa cyòci eci.

²³⁴ Ncyèna—ncyèna muswè kunulama ntàntà mupitèpìte bule pa bintu ebi to. Nènku—nènku ndi. . . Kàdi, nànsha nànkù, ncyèna muswè bwà nwènù kucìpangila to. Ncinganyì cìkwàbò cìdi ne musinga kutàmba cyòci eci? Èyowà. Ncinyi cìkwàbò. . . [Mwanèètù wa balùme kampàndà ùdi wàmbe ne: “Mwanèètù Branham?”—Muf.] Cinyi? [“Kwèna upima abi to.”] Kakwèna cintu nànsha cìmwè cìdi ne musinga kutàmba Mwoyi wà Cyendèlèlè bwà muntu to. Nènku tudi ne cyà—tudi ne cyà kucyùmvwa eci mpindyewu, ne—ne kwikala batwìshìibwe ne tudi tucyùmvwa. Èyo. Èyo, mukalenge.

²³⁵ Nènku mpindyewu tudi baswè kubala Zekàayi nshapità mwi3. Ngèèla meeji ne aci's mmwòmò, mpindyewu, Zekàayi

3. Netwikale ànu mwà kwangata bimfwànyì ebi mwaba ewu, piikalàbi ne ndi ne Mifundu yànyì mifunda's. Mwawa ànu ngèèla mbilà mu mwaba wònsò amu, mu mappingaja emu, pàngàakalengà bwalu ebu. Pa nàнку ncyèna—ncyèna ànu mumanyè ní ndi muwùpetè mu wòwò, anyi to. Ndi ntèkemena ne ndi nawù. Zekàayi 3, tùmònèbi ní cìdi. . . Ndi ne 89 kaaba aka, kàdi cìdi ne cyà kwikala 8 too ne ku 9. Èyo. Èyo. Ndi mumanyè ne kacýèna mwà kwikala 89 to. Zekàayi 3:8 ne 9.

Tèèlejà mpindyewu, Éyì Yoshùwà mwakwidi munène, wéwè, ne beena dyèbè bàdi basòmbe neebè aba, bwalu mbantu bàdìbo bàkèma: bwalu, mònaayi, néntwalè musadidi wanyì DITAMBÀ (Kilistò).

Bwalu mòna ne dibwe dîngàadijà kumpàlà kwà Yoshùwà adi; pa (dibwe) dibwe dîmwèpelè nepiikalè mèsù mwandamutekète: (mèsù mwandamutekète), mòna, nènzolèpù cimfwànyì, mùdi mwàmba MUKALENGE wa bilwilu, . . . Nèngùùmushè bubì mu ditùnga mu ditùkù dîmwèpelè.

236 Mpindyewu túbuululàayi mu Zekàayi 4:10, 4:10. Tèèlejàayi.

. . . udi mudyombole ditùkù dya tuntu tukèsè (Nzambi mu bupwekele, nwamònu's)? bwalu nebàsanke, ne . . . kumòna cipiminu mu byanza byà Zoròbàbèlè mwena . . . ne mwandamutekète abu; aa s'ke mèsù à MUKALENGE, àdi àtwa eku ne eku kwà buloba bujimà.

237 “Mèsù mwandamutekète.” Mèsù mbwena kwamba ne “kumòna.” Kumòna mbwena kwamba ne “bapròfetà, beena lùmònò.” Mwànà wa mùkòòkò ewu ùvwa ne nsèngu mwandamutekète, ne pa lusèngu ne lusèngu lwònsò ùvwa ne dísù: “mèsù mwandamutekète.” Ncinyì aci? Kilistò ne Mukàj'Èndè-musèla; bikondo mwandamutekète byà èkèleeziyà. Mwòmò amu mùvwa bapròfetà mwandamutekète bàakapàtukà, beena lùmònò mwandamutekète, mèsù. Pa nàнку, wa ndekeelu ùdi ne cyà kwikala mwena lùmònò. Èyo.

238 Mònaayi ne, Yèyè kí nnyama to. “Yèyè wàkangata Mukàndà mu cýanza cyà dyàbalùmè cyà Ewu uvwa musòmbe pa Nkwasa wa butùmbi awu.” Ùvwa Nganyì awu's? Mwenawù—Mwenawù Sungasunga, Mwenawù wa ku cibangidilu awu, uvwa ne Mukàndà wà Bupikudi mu cýanza Cyèndè cyà dyàbalùmè awu. Nèнку Mwanjèlò nànsha umwe, Kampànda wa Banjèlò nànsha umwe, cintu cikwàbò nànsha cimwè, kacivwa mwà kwangata kaaba aku to. “Ke Mwànà wa mùkòòkò uvwa umata mashi ewu kupàtukayè ne kwangata Mukàndà mu cýanza Cyèndè.” Yoyòyò! Cívwa ncinyì's? Mwanèètù, eci kàdi's ke cintu cyà citàmbe kutùmbuka cyà mu Mifundu. Cyenzedi civwà ní Mwanjèlò, ní ncintu nànsha cimwè, kaciyìku mwà kucýènza to. “Nèнку Mwànà wa mùkòòkò kulwa ne kuWàngata mu cýanza cyà

dyàbalùmè cyà Ewu uvwa musòmbe pa Nkwasa wa butùmbi awu.”

²³⁹ Ncinyi ciinè aci? Mpindyewu Ùdi wà Mwànà wa mùkòòkò. Amen. Mikenji ya Nzambi yivwa yilòmba. Yèyè ke Udi muWùlame. Mukenji wà Nzambi wùvwa wùlòmba Cilongo Cipikudi. Ke Mwànà wa mùkòòkò kupàtuka, muWùkwate ne: “Mémè ndi Cilongo cyàbò. Mémè ke Mupikudi wabò. Ndi mpindyewu. . . Ndi mbààkwila bwòbò, ne mpindyewu ndi mulwè bwà kunana makenji àbò bwà bwalu bwàbò.” Amen. Ke Umwèpelè nyèyè awu. “Ndi mulwè bwà kunana makenji àbò. Mu cyòci aci, bàdi ne bukenji ku byònsò bidì bijimìne mu cibùlà, ne mémè ndi mufutè musinga.”

²⁴⁰ Kaa, mwanèètù! Yoyòyò! Aci kaciyènakù cyènza ne ùdyùmvwè bilenga mu nyumà anyi? “Kì nku byenzedi bimpè bitùdi bènzè to, kàdi nku luse Lwèndè.”

²⁴¹ Kaa, anjì indilà kakesè! Nè bakùlù abu ne bikwàbò byònsò bààkabanga kukùpa bifulu byà butùmbi, ne bantu bàà myànzu mitùmbùke kubanga kubùnguluka mu buloba, nwamònu’s.

Muntu nànsha umwe, muntu nànsha umwe kàvwakù mufwànyine kucyènza to.

²⁴² Nènku Yèyè kubànda buludi too ne ku dyàbalùme dyà Nzambi, ne kwangata Mukàndà mu cianza Cyèndè, ne kunana makenji Èndè. “Ndi mubàfwile’s. Mémè ndi cyàbò Cilongo Cipikudi. Ndi. Mémè ndi Mutwàngaji. Mashi Aànyi àkeediibwa panshì. Ngàlu Muntu. Nè ndi mwenzè cyòci eci bwà kwangatulula Èkèleeziyà awu cyàkàbidì, Yèyè ùngààkadyànjila kumòna kumpàlà kwà difùkà dyà dyulu ne buloba awu. Mvwa muCipàngàdike. NgààkaCyàkula, Cìvwa mwà kwikalakù. Nènku kakùvwa muntu nànsha umwe uvwa mukùmbàne bwà kuCyàngata to, kàdi Ngààkapweka bwà kucyènza, Mémè mwine. Mémè ke Cilongo cyàbò. Ndi mulwè cilongo.” Ne Yèyè ngudi wangata Mukàndà awu. Amen!

²⁴³ Kaa, Nganyi udi mungindile Kuntwaku dilòlò edì awu’s? Yèyè awu Nganyi’s, èkèleeziyà, udi mwindile Kuntwaku’s? Ncinyi cìkwàbò cìvwàku cìfwànyine kukwindila Mwàmwa’s? Cilongo Cipikudi aci’s! Kaa, èkèlekèlè! Dìyi kaayi dyà dilenga be, anyi cyenzedi’s wè!

²⁴⁴ Mpindyewu Yèyè ùdi ne mukàndà wà bwena-cintu mulelèlà wà bupikudi. Yèyè ùdi Naawù mu cianza Cyèndè. Butwàngaji mbwenjìbwè mpindyewu. Yèyè ùdi Nawù mu cianza Cyèndè. Vùlukàayi ne, Ùvwa mu cianza cyà Nzambi, dìbà dyònsò, kàdi mpindyewu Ùdi mu cianza cyà Mwànà wa mùkòòkò. Mpindyewu tàngilàayi. Mukàndà wà bwena-cintu wà bupikudi, wà bufùki bwònsò, wùdi mu cianza Cyèndè. Nènku Yèyè’s mmulwè kuWùnana bwà kuWàngatulula, kàbidì, bwà bukwàbantu. Kì nkuWàngatulula bwà Banjèlò to. KuWùnana bwà kuWàlujila bantu, bàkaWùpèeshabo abu,

bwà kubàvwija cyàkàbìdì bânà bàà balùme ne bàà bakàjì bàà Nzambi; kubààluja ku budimi bwà Edènà, byònsò byàkajimijàbo abi; bufùki bujimà, micì, mwoyi wà nyama, bikwàbò byònsò. Kaa, ekèlekèle!

²⁴⁵ Aci kacyènakù cìnùfikisha ku didyùmvwa bilenga anyi? Yoyòyò! Mvwa ndyàm̀bidila ne mvwa mucyòke, kàdì ncyèna ndyùmvwa nànkù mpindyewu to. Nwamònu anyi? Míngà misangu ntu ngèèla meeji ne nkààdì—nkààdì ngènda nkùlakaja bikolè be bwà kuyiisha, ne pashìishe mfika ku dimòna cintu kampànda cyà mùshindù awu, kàdì ndi ngèèla meeji ne ndi cyàkàbìdì nsongàalùmè. Èyowà. Uh-huh. Hum! Cidi cikwenzela cintu kampànda. Nwamònu anyi?

²⁴⁶ Bwalu ndi mumanyè nùnkù ne, kùdì Muntu Kampànda Muntwamu amu mungindile. Kùdì Muntu kampànda wàkafuta mushinga wùmvwà mèmè ncìyi mufwànyine kufuta to. Ncyà bushùwà. Yèyè ngwàkacyènza bwànyì mèmè, Charlie. Wàkakwenzelacì. Wàkacyènzela bukwàbantu bwònsò nkòòng. Nènku mpindyewu n'Yèyè ùlwàlwa ewu bwà kunana makenji Èndè à bupikudi. Kuànana bwà nganyi? Kì mbwèndè Yèyè mwinè to; bwètù twètù. Yèyè ngumwe wetù. Yèyè ke cilongo cyètù. Kaa, ekèlekèle! Yèyè's m'Mwanèètù. Yèyè s'ke wanyì Musungidi. Yèyè s'ke wanyì Nzambi. Yèyè s'ke cyànyì Cilongo Cipikudi. Yèyè s'ke cyònsò cidiku. Bwalu mèmè ewu mvwa kwikala cinyì kabùyi Bwèndè, anyi ncinyì cìmvwà mufwànyine kwikala kabùuyi Bwèndè? Pa nànkù, nwamònu's, Yèyè s'ke Byònsò byànyì. Ne Yèyè mmwimanè Mwaba awu bu cilongo cyètù. Nè mpindyewu Yèyè ùdì munkacì mwà kutwàkwila, kuulu kwaka too ne patùdì twakulangana apa. Nènku mpindyewu Yèyè ùdì ùpàtuka wàngata Mukàndà wa Bupikudi, bwà kunana makenji Èndè, à cyàkatwenzelàYe aci.

²⁴⁷ Mbafwè. Yesù wàkamba ne: “Ewu udi ungiitabuuja Mèmè, nànsha byòbì ne mmufwè, kàdì neikalè ne mwoyi. Ewu yònsò udi ne mwoyi ne ungiitabuuja Mèmè kàadyàkufwàku to. Ewu udi udyà mubidi Wànyì ne ùnwa Mashi Àànyì ùdì ne Mwoyi wà kashidì, ne Nèmmubiishè ku lufù ku ditùkù dyà ndekeelu.”

²⁴⁸ Nànsha byòbì ne, yèyè mmulààle tulù mu cilù cyà kumpàlà, ciibìdì, ciisàtù, ciinâyì, ciitànù, ciisambòmbò, anyi cyà mwandamutekètè, kwònsò kwàlààdilàye tulù aku. Cyènzekà ncinyì? Mpungi wa Nzambi neàdilè. Mpungi wa ndekeelu awu neàdilè bikolè, musangu ùmwèùmwe ùdì mwanjèlò wa ndekeelu ùfila Mukenji wèndè ne Citampì cyà ndekeelu cikàngùdìibwe awu. Mpungi wa ndekeelu awu neàdilè, ne Mupikudi ùdì ùpàtuka bwà kwangata bintu bipikula Byèndè, Ekèleeziyà Wèndè, musukula ne Mashi awu.

²⁴⁹ Mpindyewu, kaa, bufùki bujimà bùdì bùsanganyibwa mu cyanza Cyèndè mpindyewu, pa yèyè pàdì ndongamu mujimà wa bupikudi mutwìbwe citampì kùdì Bitampì mwandamutekètè

bìdì kabìyì byumvwika to, mu Mukàndà wàkangatàYe ewu. Mpindyewu tàngilàayi. “Ne Yèyè nkàayendè ngudi mwà kuWùbuulwila ewu yònsò udiYè muswè awu.” Yèyè ùdi Nawù mu cyanza Cyèndè, nwamònu’s. Mpindyewu, Yèyè mmulayè ne neciikale pa diine dībà adi, mpindyewu, bwalu Wòwù mmutwibwe citampì kùdi Bitampì Mwandamutekètè byà bwalu busokoka, Mukàndà wà Bupikudi. Mpindyewu tàngilàayi. Bu mùdi mpindyewu . . .

²⁵⁰ Balundà bàanyi, mwya munwambile ne, nènùlekèlè nupàtukè pa dībà mwandamukùlù ne citùpà, kàdi ndi muumùshe mabèji matwè ku àsàtù anyì ànaayi kaaba aka, bwà kufika ku cyòci eci. Pa nànu ndi muswè . . . Nkàadi mumanè kupita panyimà pàà dībà citèemà. Bwà nwamòna mwà kwalukila màalabà.

²⁵¹ Kàdi mpindyewu mu Mukàndà ewu wà Bitampì mwandamutekètè, wà bupikudi, ùvwa Mwànà wa mùkòòkò mwangàte, munda Mwèndè Yèyè mwine, ùvwa ànu Umwèpelè Uvwa mwà kucyènza. Ki Yèyè kuWàngacila ku cyanza cyà dyàbalùmè cyà Éwu uvwa musòmbe pa Nkwasa wa butùmbi awu, mpindyewu, bwà kunana bupikudi Bwèndè, bwà kunana makenji Èndè. Bwà kunana, bwànyì mèmè ne wèwè, ku cyàkatùpikwilàYe aku, bwà, nwamònu’s, kwalukila ku byònsò byàkajimijà Adàmà mu budimi bwà Edènà abi. Mmutùpikule bwà kutwàluja ku cyòci aci.

²⁵² Mpindyewu ne Mwànà wa mùkòòkò, ne Mukàndà mu byanza Byèndè, tudi badilongòlòle bwà kulòmba ngàsà Wendè ne luse kutùdi, bwà kutùkàngwila Mukàndà wà Bitampì Mwandamutekètè, nè kutwànyishila bwà kutàngila paanyimà pàà ridò wa cikondo, katanci kakesè cyanàànà. Kaa, ekèlekèle! Mònaayi pàakangatàYe Mukàndà awu, mukàndà wà bwena-cintu, mutwà citampì, (bwejàayi aci ànu mu meeji ènù mpindyewu), ne kulamuna Bitampì byà bwalu busokoka, kubisokolola, kubitwàla kùdi Bèndè, nwamònu’s, bwònsò bà ku bapikula Bèndè abu.

²⁵³ Mpindyewu, patwàlenga cyòci eci mu Bitampì, netwàlukilè kuntwaku bwà kumòna misùùkà yìdì mwinshì mwà cyoshelu ayi, yèla mbilà ne: “Mukalenge, too ne dībà kaayi, too ne dībà kaayi?”

²⁵⁴ Kàdi’s ki Yèyè ewu bu Mutwàngaji, pa cyoshelu: “Ànu bwà katanci kakesè cyanàànà, too nè piikalàkù bakwàbò bàdi ne cyà kukènga bu nwènu.”

²⁵⁵ Kàdi mpindyewu Yèyè ùdi ùfùmina apa, ku Citampì cyà ndekeelu eci. Yèyè kàcyèna kabìdì Mutwàngaji to. Ùdi Mfùmù mpindyewu. Kàdi cìdiYe wènza ncinyi? PiikalàYe Mfùmù, bikèngela Ìkalè ne bantu. Ne bantu Bèndè ngaba bàdiYe mupikule, ne kabèena mwà kulwa kumpalà Kwèndè pàdiYe kàyi mwànji kwangata makenji à bupikudi to. Nè mpindyewu

Ùdi ùpàtuka, ùumukila ku Mutwàngaji; kùvwà lufù lutwèle mu lukita, Ùdi ùpàtuka ne makenji. Amen.

256 “Ne nànsha aba bàdì ne mwoyi ne bashààle too ne ku Dilwa Dyèndè abu, kabààdyàkupangisha aba bàdì balààle to. Bwalu mpungi wa Nzambi neàdilè, ku mpungi wa ndekeelu awu.” Pàdi Citampì cyà ndekeelu cilamunyiibwa, ne piikalà mwanjèlò wa mwandamutekète munkaci mwà kufila Mukenji wèndè ne: “Mpungi wa ndekeelu neàdilè, ne bafwè mu Kilistò nebàbiikè. Ne twètù bàdì ne mwoyi ne bashààle netwàngaciibwè muulu pàmwè naabò, bwà kutwilangana Nèndè mu mpeepèlè.” Ùdi ùnana’s! Mmupàtùke mpindyewu bwà kunana bìdì bu Byèndè—Byèndè.

257 Tàngilàayi’s! Tàngilàayi eci’s! Ekèlekèle! Kulamuna Bitampì, kubuulula maalù masokoka. Wàkabibuulwila (penyi?) ku cikondo cyà ndekeelu cyà èkèleeziyà, cìmwèpelè cìdì ne mwoyi. Bikwàbò abi mbilààle tulù.

258 Yèyè wàkamba ne: “Yèyè mulwe mu cilù cyà kumpàla, cilù ciibìdì, cilù ciisàtù, ànu nànkù too ne ku cilù cyà mwandamutekète.” Mu cilù cyà mwandamutekète, kwàkapàtuka dîyi di—ditùma, anyì dibìikila ne: “Mònaayi, Mubàki nyàwù ùlwa!”

259 Ne pààkenzàbo nànkù, virgò mukùtàkàne awu, èkèleeziyà yà ku dìnà ayi, yèyè ne: “Kaa, udi mumanyè’s, ndi—ndi ngèèla meeji ne ndi muswè kwikala ne Nyumà Mwîmpè awu.” Nukàadi bamòne ba-Presbytériens ne ba-Épiscopaliens anyi? Nukàadikù bumvwè Mukenji wànyì mu Phoenix, kùdì bantu bàdì biimàne kuntu kwàka abu, mu *Dîyi* ne pààpa, bàmba . . . ? Èè, mbwalu kaayi ebu ne mufùndi ewu’s, wàmba ne: “Taàtù wa Bunsantu *Kampànda*”? Pààbì, Bible mmwàmbe ne: “Kanùbìikidi muntu nànsha umwe ne: ‘Taàtù,’ mùshindù awu to.” Nwamònu’s, bàdì mu tulù pàmwè naabò, ki bwalu abu’s, kàdi pààkapàtukàbo e kwamba ne: “Èyowà, tudi twitabuujà.”

260 Mukàjì kampànda ùvwa ùfùma ku dibìikila mukàjì mukwàbò, wàmba ne: “Udi mumanyè’s, mèmè ndi Épiscopalienne.” Yèyè ne: “Ndi—ndi—ndi mwakùle mu myakulu, ditùkù adi. Ngèèla meeji ne ndi mupetè Nyumà Mwîmpè, kàdi, wàlama’s, kwàmbedi muntu nànsha umwe to.” Mèmè ndi ngèèla aci mpata bikolè. Udi mufwànyine kwikala mwakùle mu myakulu. Kàdi, paùdì utwà muntu Kapyà, mmunyi mwàshààlàyè mupùwe? Ncyà bushùwà. Nwamònu anyi? Nwamònu anyi? Kwèna mwà kwenza nànkù to.

261 Nudikù mwà kudifwànyikijila Peetèlò, ne Yakòbò, ne Yone, ne bakwàbò abu mu cibambalu cyà kuulu amu, bàmba ne: “Kaa, tudi bapetè Nyumà Mwîmpè mpindyewu, kàdi pàmwàpa mbîmpè tùshaalè ànu bapùwe’s”? Mwanèètù, ku màdidiishì, ku biibi, ne bikwàbò byònsò, kupàtukàbò, e kubwela mu mùsèèsù,

bènza maalu bu musumbà wà bantu bakwàcike maalà. Ke Nyumà Mwimpè mulelèlà nyèyè awu's.

262 Kàdi, nudi numòna's, virgò mukùtakàne awu kèna ùpeta kantu nànsha kàmwè to, twamb'eku twamb'eku. Uh-huh. Ncyà bushùwà. Nènku vùlukàayi ne, pàakayàbo bwà kuteeta kusumba Maanyi apu, vùlukàayi ne, Mifundu kayèna yàmba ne bàkaÀpeta to.

263 Kàdi pàvwàbo pambèlu bàteeta bwà kuÀsumba, kulwakù cyonà. Cyàkenzekà ncinyi? Baavirgò bwònsò bàvwà balàale tulù abu, bàakabiika ku tulù ne kulongolola myèndù yàbò: "ne bàakabwela ku Didyà dyà dilòòlò." Ncyà bushùwà anyi?

264 Ne bakwàbò abu bàakashààla bwà cikondo cyà Dikènga dinène, cyà bushùwà: "Myadi, ditwà dyà mikèmù, ne disumakaja dyà mènù." Aci's ke èkèleeziyà, kî m'Mukàji-musèla to; èkèleeziyà.

265 Mukàji-musèla wàkabwela. Kùdi dishiilangana dinène pankaci pàà èkèleeziyà ne Mukàji-musèla. Èyowà's, mukalenge! Uh-huh. "Wàkabwela ku Didyà dyà Dibanji." Kaa, mònaayi's, balùmnyana wa yààyà!

266 Bitampì byàkalamunyiibwa (bwà cinyi?) mu cikondo cyà ndekeelu cyà èkèleeziyà, bwà kubuulula Malelèlà aa. Bwà cinyi? Mwànà wa mùkòòkò wàkacibula Bitampì ne kubibuulwila Èkèleeziyà Wèndè, bwà kusangisha bantu Bèndè bwà Bukalenge Bwèndè. Mukàj'Èndè-musèla, nwamònu's! Kaa, èkèlekèle! Yèyè mmuswè kutwàla bantu Bèndè kùdiYe mpindyewu.

267 Ncinyi aci's? Bàpàtukila mu difwènkenyà dyà buloba, mwìnshì mwà mbù, mu biina bile, mu mwaba ne mwaba wònsò, mu—mu myaba wa mîdimà, mu mpàlàdiizò, kwònsò kùdibo mwà kusanganyibwa aku. Yèyè neàbiikilè, ne bwòbò nebàndamunè. Amen! Amen! Yèyè neàbiikilè, ne bwòbò nebàndamunè.

268 Wàkalwa bwà kwangata bantu Bèndè. Wàkabuulula mìnsokontù Yèndè, ne kuYimònabò. "Ne cikondo kacicyènakù kàbìdì to," pa dîbà adi. "Cikondo ncimane kujika." Nkujikè. Èyo.

269 Ùdi ùmuka mu Nkwasa wa butùmbi, bwà kwikala Mwakwidyanganyi, bu Mwànà wa mùkòòkò mushebeya; bwà kwikala Ntambwe, Mfùmù; bwà kufikisha bàà pa buloba ku Cilumbulwidi, aba bàdì babènge Mukenji Wèndè abu. Yèyè kaciyèna Mutwàngaji to.

270 Nwavùlukaayi dilongesha dyà Dipungila Dikùlukulu mpindyewu, patùkaadi tulwijakaja apa. Pààkuumukà mashi mu nkwasà wa ngàsà, cyàkalwa cinyi? Nkwasa wa cilumbulwidi.

271 Nènku pàdì Mwànà wa mùkòòkò, mushebeya awu, wàsà lwendu ùfùmina mu Cyèndèlèlè, ùmukila mu Nkwasa wa butùmbi wa Taatù, ne wàngata makenji Èndè, cìvwa n'Kwasa wa Cilumbulwidi. Pashiishe kulwaYè, kàyi Mwànà wa mùkòòkò to,

kàdi Ntambwe, Mfùmù, nènku Ûdi ùbìikila Mukalenge-mukàjì Wèndè bwà kulwa kwimana ku luseke Lwèndè.

²⁷² “Kanwèna bamanyè nè bansantu nebàlumbulwishè buloba anyi?” Danyèlè wàkamba ne: “Cilumbulwidi cyàkatwàdija, ne mikàndà yàkabuuludiibwa; ne binunu dikumi kuvudija ku misangu binunu dikumi byà cinunu byàkaMukwàcila mudimu,” Mfùmù ne Mukalenge-mukàjì. “Ne pashìishe Mukàndà mukwàbò wàkabuuludiibwa, wùvwà Mukàndà wà Mwoyi awu,” aci’s mbwà èkèleeziyà. Nènku Mukalenge-mukàjì ne Mfùmù bàvwa biimane mwaba awu.

²⁷³ Ànu mwàkambà dyelangana dyà meeji dyà mwendeshi wa ngombe:

Makèèlèlè dilòòlò pámvwà mulààle mu mpàtà,
Mémè kulèèngameena mìtootò mu maulu,
Ke mémè kudikonka ní kùdikù mwendeshi wa
ngombe kampànda
Udikù mwà kutùntumunyiibwa kuya
dyàmwàmwà dyà kalolo adi’s.

Kùdi njila kampànda uyààya ku Mwaba ùdi
ùkenka, wà disànkà awu,
Kàdi’s nkajila kafìike, kabùlàkàne, ke
mwàmbambàbo,
Kàdi mwalàbàle udi ulombola ku kabùtù awu
Mmwasà makunji ne ùbàlakana too ne ku
ndekeelu.

Bàdi bààkula bwà mukwàbò Mwena cintu
munène,

²⁷⁴ Yèyè’s ùdi wàkula mu myàkù yèndè yà bulami bwà bimunà.
Bu nwènù mwà kwikalakù badìsangàne mu dikùngwila dyà
nyama, nùnkù’s nudi mwà kucyùmvwà citòòkèshìibwe tòò.

Bàdi bààkula bwà mukwàbò Mwena cintu
munène,
Nènku Yèyè awu kacya kàtukù muyìkùngwije
mipitepìte to, ke mwàmbambàbo,
Yèyè neàlongolòlè ànu misangu yònsò mwaba
bwà ngènzàmpèkààtù
Wikala mwà kutùntumunyiibwa mu kajila
kalulàme, ne kabùlàkàne aku.

Bàdi bàmba ne Yèyè kààdyàkukulekelakù to,
Ne Yèyè mmumanye cyenzi cyònsò ne
ditàngila dyònsò;
Bwalu, bwà dikùbiibwa, mbìmpè twìkalekù
batwìbwe cimanyinu,
Biikàla ne dìnà dyètù pa Mukàndà Wèndè
munène wà dibadikila awu.

Bwalu bàdi bàmba ne nekwènzeke dikùngwila
dinène,
Piikalà bendeshi bàà ngombe mwà kwimana
bu twànà twà ngombe katùyì baa mamwätù,
Bwà kutwibwa cimanyinu kùdì babàndì bàà pa
tùbalù bàà cilumbulwidi, (Bapròfeta abu ne
beena lùmònò abu.)
Bàdi kacya biimana ne bamanye cimanyinu ne
cimanyinu cyònsò.

²⁷⁵ Wèwè mwà kwikalakù mu dikùngwija kampànda dyà nyama,
kumòna mùdì mfùmù mwimane mwaba awu, ne babàndì bàà pa
tùbalù abu, bènda bàtwa ngendu mu cisumbù cyà ngombe amu's.
Yèyè's neàmòne cyèndè cimanyinu cìpita, neàvinyè mfùmù awu
dìsù. Ne mfùmù neàcimòne, ne kunyùkisha mutu's. Apu mpùnda
wendè awu ùdì ùbwela buludi, ùnyùnguluka, ùnyùngulukila
ngombe ayi, ucyùnga musumbà wà nsengu mùshindù awu, ne
ùpàtula yèndè yèyè ngombe pambèlù's. Nwamònu anyi?

Bàdi bàmba ne nekwènzeke dikùngwila
dinène,
Ne bendeshi bàà ngombe nebiimane bu twànà
twà ngombe katùyì baamamwätù,
Biikala batwibwe cimanyinu kùdì babandì bàà
pa tùbalù bàà cilumbulwidi,
Bàdi kacya biimana ne bamanye cimanyinu ne
cimanyinu cyònsò. (Nwamònu anyi?)

²⁷⁶ Ke kwambayè ne:

Ngèela meeji ne nèngiikalè bu lukùngùlù lwà
nyama lupàmbùke,

Ànu muntu udi mupiiishiibwe bwà kufwà, kàyì mutwà
cimanyinu to, yèyè, bàdi bàmwenza nsupù, nwamònu's.

Wikala mwà kuumushiibwa mu musumbà wà
bantu bàà ku musòkò,
Pàälwà Mfùmù wa babàndì bàà pa tùbalù abu.

²⁷⁷ Nudi numòna ne Nganyi Awu's? "Mfùmù wa babàndì bàà pa
tùbalù." Ki Mwànà wa mùkòòkò nyèyè awu, kùdì baamisànjeela
mwandamutekètè bàdi kacya biimana ne bamanye cimanyinu ne
cimanyinu cyònsò. Nwamònu anyi? Hum!

²⁷⁸ Mònaayi ne, ki Yèyè ulwàlwa ewu's. Muumùke mu Nkwasa
wa butùmbi, bu Mwakwidyanganyi, bu Mwànà wa mùkòòkò
mushebeya; bwà kulwa Ntambwe, Mfùmù, bwà kubweja buloba
bujimà mu Cilumbulwidi, bùdì buMubènge abu's. Cilongo cyètù
Cipikudi dībà adi ùdì Mfùmù kumutù kwà byònsò. Bwà cinyi?
Yèyè ùdì ne mukànda wa bwena-cintu wà bupikudi. Byònsò
abi mbitèèka mu cianza Cyèndè. Ndi ne disànkà dyà mùndì
muMumanyè. Nwamònu anyi?

279 Dìbà adi ùdi ùnana bumpyànyì Bwèndè; aci's ke Èkèleeziyà awu's, Mukàji-musèla. Ùdi ùMunana.

280 CidìYe wènza ncinyì dìbà adi? Ùdi ùjikijangana ne mulwishi Wendè, Sàtaanà. Ùdi ùmukùpa mu Dijiba dyà Kapyà, ne bwònsò bàvwà basonsodiibwe kùdì Sàtaanà abu, bwà kubenga Diyì Dyèndè dyà bupikudi.

281 Yèyè ùdi Mfùmù mpindyewu. Luse lùcidi ànu pa Nkwasa wa butùmbi. Kùdyombolukù dyèsè Dyèndè to. Nwamònu anyi? Babàndì bàà pa tùbalù mbamanyè ànu ne wèwè udi nganyi.

282 Nènku, mpindyewu, mulwishi Wendè awu, udi muMupè lutàtù munda mwà bidimu binunu bibìdì awu, ùfuuna ne: “Ndi mwà kwenza naabù cìndì muswè. Ncidi ànu naabù. Mbàanyi. Mémè. . . Mbajìmije mukàndà wà bwena-cintu kale wàwa.”

283 Kàdi Yèyè's n'Cilongo Cipikudi. Yèyè mmwàmbè ne Ùdi paanyimà apa munkacì mwà kwenza dyakwilangana mpindyewu. Kàdi dǐngà ditùkù. . .

Yèyè ùdi wàmba ne: “Nèmbèlè mu lukità.”

284 Kàdi Yèyè wàkambila Èkèleeziyà ne: “Nènnùpàtùlè.” Nwamònu anyi? “Kàdi, dyàmbedi, bikèngela ngiikalè Mwakwidyanganyi.”

285 Mpindyewu Yèyè udi ùpàtuka, ùfùmìna mu Cyendèlèlè kale wàwa, uumuka ku Nkwasa wa butùmbi wa Taatù, kùvwàYe musómbe bu Mwakwidyanganyi. Mpindyewu Ùdi ùlwa bwà kwikala Mfùmù, kaa, bwà kukòkkesha matùnga wònsò ne dikombo dyà cyamu cifiike. Cilumbulwidi nciwàdije. Kaa, mwanèètù, Cilongo Cipikudi cyètù nciikwàte cyònsò. Ncyà bushùwà. Èyowà's, mukalenge.

286 CidìYe wènza ncinyì? Ùdi wèla mulwishi awu kadyòmbò, Sàtaanà. “Mbàanyi mémè mpindyewu. Ndi mubàbìishe mu lukità.” Nè Ùdi wàngata beena mashimi bwònsò, ne banyangakaji bàà Dìyì abu, ne bwònsò bàà mùshindù awu abu, pàmwè ne Sàtaanà, ne ùbàbutula mu Dijiba dyà Kapyà. Bwèndè mbutùke bwònsò, mpindyewu. Ùbàkùpa mu Dijiba dyà Kapyà. Kaa, ekèlekèlè!

287 Nudi bamanyè mùdì bwalu anyi? Ndi muswè—ndi muswè kwamba cintu kampànda mwaba ewu bangabanga nè twètù kujikija. Nènku pashiishe netù—netù—netùlwijakaje. Mònaayi's. Tukàadi bapwèke ku mvensà wa 7 mpindyewu. Kàdi kuumukila ku mvensà wa 8, too ne ku wa 14, ndi muswè bwà nùmonè cidì cyènzekà.

Byònsò bìvwà *mu dyulu abi*, ne byònsò bìvwà pa *buloba abi*. . .

288 Tèèlejàayi ànu eci cyanàànà. Ngǎnjì ànu kucibala mpindyewu's. Ngèèla meeji ne mbifwànyine kwikala bímpè bu mémè ànu mwà kucibadila buludi mu Mukàndà, ku mvensà wa 7, nwamònu's. Nènku tǎngilàayi mvensà mwif.

Nènku ndi—nènku ndi mmòna, ngâkatàngila, ne, mònayyi ne, munkaci mwà nkwasa wa butùmbi ne kùdì bifùkùbwà binaayi abi, ne munkaci mwà bakùlù, mùvwa mwimàne Mwànà wa mùkòòkò bu mumana kushebeya, mwikàle ne mitù mwandamutekètè. . . anyi nsèngu mwandamutekètè (ki cìndì muswè kwamba) ne mèsù mwandamutekètè, (twáfùmu ku dicyùmvwija), bìdì Nyumà mwandamutekètè yà Nzambì mitùma pa buloba bujimà.

²⁸⁹ Nwamònu's, bikondo mwandamutekètè byà èkèleeziyà, baamisànjeela mwandamutekètè bàvwà balame Kapyà kàvwà kàlàkuka aku's. Nwamònu anyi? Eyo.

Nènku kulwayè (Mwànà wa mùkòòkò awu) ne kwangata mukàndà mu cyanza cyà dyàbalùme cyà ewu uwa musòmbe pa nkwasa wa butùmbi awu—musòmbe pa nkwasa wa butùmbi awu.

²⁹⁰ Mpindyewu tângilàayi. Ne pààkenzàYe cyòci aci, tângilàayi nùmonè cyàkenzekà's. Nwènu bàdì bàmba bwà cyanga's wè! Mpindyewu edi's ke dilamuna dyà Bìtampì abi menemene, dyenzeka. Netùbwele mu "cyàbìbìdì cìmwè cyà dìbà cyà cinyàànyà," ànu paanyimà menemene pàà cyòci eci. Tângilàayi eci, nènku netùbwelemu. Netùjikijè eci, mu dyàlumingu dilwalwà edi dilòòlò, kaaba aka mene. Nènku tèèlejàayi ne ntèmà mpindyewu. Nudikù anyi? Ambàayi ne: "Amen." [Disangisha didi dyamba ne: "Amen."—Muf.] Tèèlejàayi ne ntèmà's, cyàkenzekà pààkenzàYe cyòci eci.

²⁹¹ Pàvwà bufùki bwònsò munkaci mwà kutwà mikèmu; kakùvwa muntu nànsha umwe mumanye cyà dyanza to, ne Yone ùvwa ùdila mwadi. "Ke Mwànà wa mùkòòkò ulwàlwa ewu, wènda tamakatamaka!" Ne Mukàndà ewu wùvwa mu byanza byà—byà Mwena cintu wa ku cibangidilu awu, bwalu muntu wàkadishinda ne wàkaWùjimija. Nènku kakùvwa muntu nànsha umwe mukùmbàne bwà kuWàngata, kàbìdì to, bwà kupikula buloba; nànsha nsaserdesè, paapà, cintu nànsha cìmwè, bu mungàmbì. "Kàdi Mwànà wa mùkòòkò awu wàkasemena!" Kàyi Màriyà, kàyi munsantu *kampànda*, anyi munsantu *kansanga* to. "Mwànà wa mùkòòkò kuseemena, ùmata mashi, mushebeya, e kwangata Mukàndà mu cyanza cyà dyàbalùme cyà Ewu uvwa musòmbe pa Nkwasa wa butùmbi awu." Nènku pààkamònàbo ne kùvwa Mupikudi; ne misùkà yònsò—yònsò yìvwà mwìnshì mwà cyoshelu ayi, pàvwà Banjèlò, pàvwà bakùlù, pààkacimònà bintu byònsò, pàdì cyòci eci cyenzèke. Nànsha nànkù, bìdì bisanganyibwa mu matùkù àcilwalwà. Dilòòlò edi Yèyè m'Mutwàngaji, kàdi Udi ùlwa ku cyòci eci. Tângilàayi.

Nènku pààkamanàye kwangata mukàndà awu, bifùkùbwà binaayi abi ne bakulù makùmi àbìdì ne

bànaayi abu bàakapòna panshì kumpàlà kwà Mwànà wa mùkòòkò, bìkale yònsò wa kùdìbo ne nzènzè, ne mpànzá yà ngólò myúle ntèntè ne mánànanshì, àdì miikale masambila à bansantu.

²⁹² Abu ke bwòbò bàdì mwinshì mwà cyoshelu, bàkaadi basambile, kùkaadi ntàntà mule. Nwamònu's, bàvwa basambile bwà bupikudi, basambile bwà dibiikà dyà ku lufù. Nènku ke bakùlù aba—aba munkaci mwà kupòngolola masambila àbò kumpàlà kwà. . . Bwalu, mpindyewu tudi ne Mwinyàmpalà, tudi ne Cìlongo mu Dyulu, cidi cipàtùke bwà kunana bìdì bu Byàci.

Ne bàvwa bimba musambu mupyamùpyà, bàmba ne: Wèwè udi mukùmbànyine kwangata mukàndà awu, ne kubuulula bitampi byàwù: bwalu wèwè uwu mushebeya, ne mutùpikùle bwà Nzambi wetù (tàngilàayi) ku mashi èbè mu cifuku cyònsò, . . . mwakulu, nè cisàmbà, nè ditùnga dyònsò;

Ne mutùvwijè bamfùmù nè baakwidi bwà Nzambi wetù, nènku twètù netùkòòkeshè pa buloba.

²⁹³ Bàvwa bàjinga kwalukila. Kàdì's mbwòbò aba munkaci mwà kwalukila, bwà kwikalabò bamfùmù ne baakwidi.

²⁹⁴ Butùmbi kùdì Nzambi's wè! Ndi ndyumvwa bìmpè mukùmbane mwà kwakula mu myakulu. Tàngilàayi. Tàngilàayi numòne. Èyo. Mbyenze bu ne ncyèna ne mwakulu mukùmbane ùndì mwà kuMutùmbisha naawù's, bìdì binkèngela ùmwè ùndì ncìyì nànsha mumanyè to.

²⁹⁵ Mònaayi ne: "Nènku ngàkatàngila. . ." Tèèlejàayi eci.

Nènku ngàkatàngila, ne ngàkumvwa dìyì dyà banjèlò bààbàngì. . .

²⁹⁶ Tèèlejàayi cyanga cidi munkaci mwà kutwibwa's wè! Pàakamònbò Mwànà wa mùkòòkò awu ùlwa kwangata Mukàndà wà Bupikudi awu, misùukà kwelayi lubilà lukolè. Netùfikèkù. Byònsò, bintu byònsò, bakùlù bàakapòna paanshi. Bàakiicikija masambila à bansantu. Cinyi? Kwàkaleejibwa Cìlongo bwètù twètù. Bàakapòna kutwà mpàla paanshi. Nè kwimbabo musambu, kwambabo ne: "Wèwè udi mukùmbànyine, bwalu Wèwè wàkashipiibwa!" Tàngilàayi numòne cidi. . . Kàdì tàngilàayi Banjèlò aba's!

Nènku ngàkatàngila, ne. . . kuumvwa dìyì dyà banjèlò bààbàngì lwà mu nyùngulukilu wa nkwasà wa butùmbi ne bifukùbwa ne bakùlù: ne búngì bwàbò bàvwa binunu dikumi bavudija ku binunu dikumi, . . . byà binunu; (Yoyòyò! Mònaayi's!)

Bàmba ne dìyì dikolè nè: Mwànà wa mùkòòkò ke udi mukùmbànyine yèyè wàkashipiibwa awu bwà kupeta bukolè, ne mabanji, ne lungènyì, ne dikàndà, ne luumù, ne butùmbi, ne mabènesha.

297 Ncyanga kaayi cidi munkaci mwà kutwibwa mu Dyulu, pàdi Mwàna wa mùkòòkò awu ùlombola, ùshiya mu kaaba kàà dyakwilangana aku, bwà kulwa apa bwà kwangata bìdi bu Byèndè's!

298 Nudi bamanyè's, aci kàdi kulenga Yone. Yèyè ùvwa ne cyà kwikala mumòne dìnà dyèndè difùndamù. Pààkalamunyiibwa Bitampì abi, ùvwa ne cyà kwikala mùmvwè disànkà dyà menemene. Tèèlejàayi cyàkambàye.

Ne cifùkiùbwà cyònsò cidi mu dyulu, ne pa buloba, ne mwinshì mwà buloba, . . . bu mùdi . . . munda mwà mbù, ne bwònsò bàdi . . . mu byòbi abi, bàdi mu byòbi abi, bàkangumvwa mèmè, ngamba ne: Mabènesha, . . . luumù, . . . butùmbi, . . . bukolè, bikalè kùdi ewu udi musòmbe pa nkwaswa wa butùmbi, ne kùdi Mwàna wa mùkòòkò bwà kashidi . . . (Amen! Amen, ne amen! Kaa!)

Nè bifùkiùbwà binaayi abi kwambabi ne: Amen. Ne bakulù makùmi àbìdi ne bànaayi abu bàakapòna paanshì ne bààkakuukwila ewu udi ne mwoyi kashidi ne kashidi.

299 Nwènu bàdi bàakula bwà ditwà dyà cyanga, nwamba bwà cikondo kampànda, pààkapàtukà Mwàna wa mùkòòkò awu! Nwamònu's, Mukàndà wùdi mene mutwibwe citampì mu Dyulu, maalu masokoka ng'àdi matwà citampì.

300 Wèwè udi wamba ne: "Dìnà dyànyì dìdimù anyì?" Ncyèna mumanyè to. Ndi ntèkemena ne dìdimù. Kàdi, byòbi nànkù, dyàkafùndiibwa mu Mukàndà kumpàlà kwà difùkà dyà dyulu ne buloba.

301 Kàdi cintu cyà kumpàla, cìvwà cìleeja bupikudi abu, kulwakù Mwàna wa mùkòòkò uvwa mushipa kacya ku difùkà dyà dyulu ne buloba awu. È kwangata Yè Mukàndà awu, (butùmbi's wè!) kukangula Mukàndà, ne kutùula Bitampì abi; ne kuWùtuma pa buloba, kùdi mwanjèlò Wendè wa mwandamutekètè, bwà kuWùbuulwila bantu Bèndè! Ki bwalu mbwòbù abu's. Kaa, ekèlekèlè! Cyàkenzekà ncinyi? Mbilà mikolè, mbilà, ma-àlèluuyàh, balaaba maanyì, bukolè, butùmbi, dimweneshiibwa!

302 Nènku mukùlumpe Yone, uvwa mwimàne mwaba awu awu awu, mwanèètù wa balùme, mumònàngàne nè mwadi! "Mòna's," mwàkambàye, "bintu byònsò mu Dyulu, bintu byònsò pa buloba, ne byònsò mu mbù, kungumvwabi ngèèla lubilà lukolè ne: 'Amen! Amen! Mabènesha, luumù, ne ngulu, ne bukolè, bìikalè kùdi Ewu udi ne mwoyi kashidi ne kashidi.'"

303 Nwènu bàdi bàakula bwà cikondo cyà disànkà, pààkalamunyiibwa Bitampì abi's wè! Yone uvwa ne cyà kwikala mwòshemù dísù nè mumòne dyàmwàmwà dya ridò wa cikondo, wàmba ne: "Ke Yone nyàwù's." Kaa, kaa!

304 Ûvwa ne disànkà dyàbûngì, mu mùshindù wà ne wàkamba ne: “Bintu byònsò mu Dyulu.” Ûvwa ne cyà kwikala mwele mbilà cyà bushùwà, kí mmwómò anyi? “Bintu byònsò mu Dyulu, bintu byònsò pa buloba, bintu byònsò mwinshì mwà buloba, cifùkùibwa cyònsò, bikwàbò byònsò, byàkangumvwa ngàmbe ne: ‘Amen! Mabènesha, ne butùmbi, ne lungènyi, ne bukòlè, ne ngulu, ne mabanji, mbyèndè Yèyè.’” Amen!

305 Bwà cinyi? Pààkalwà dibuulula, dyà ne Mwànà wa mùkòòkò, Mupikudi, Cìlongo cyètù, mmwalukile ùumukila ku Nkwasa wa butùmbi wa butwàngaji ne mupàtùke mwab’ewu bwà kwangata bintu Byèndè.

Àbidì aa Mwànà wa mùkòòkò neàngate
Mukaj’Èndè-musèla bwà kwikalaye kashidi
ku luseke Lwèndè,

Cìlwilu cijimà cyà mu Dyulu necìdisangishè;
Èyì, necìkale cintu cyà butùmbi kumòna,
bansantu bwònsò bavwàle bitòòke kabàyi
katòba;

Nènku ne Yesù netùkòòkeshè Cyèndèlèlèlè.

Kaa: “Lwà ùdyè,” Mukòkeshi ùdi ùbìkila,
(Ùdyè Diyì!) “Lwà ùdyè.”

306 Kaa, ndi—ndi—ndi mpanga myákù yà dyamba’s, nwamònu’s.

“Lwà ùdyè, lwà ùdyè,”

Udi mwà kudyà kucyònkomoka ku mèèsà à
Yesù díbà kanà dyònsò, (Mpindyewu’s! Kàdi
pàdìYe ùumuka kakwèna dítèkemena nànsha
dìmwè to.)

Yèyè Wakadiisha misumbà, kwandamuna màyi
mvinyò awu,

307 Ewu wàkamba, ne: “Ewu udi ungiitabuuja Mèmè, byenzedi bíNdi ngenza yèyè neàbyènzè pèndè.” Kaa, ekèlekèlè! Ewu wàkalaya bintu ebi mu matùkù à ndekeelu awu. Ewu wàkamba bintu ebi awu’s. Ewu udikù mpindyewu mu cikondo cyà dibuulula dyà bintu ebi biikàle bimanyishiibwa. “Lwà ùdyè.” Kaa, kùCìpangidiku to, mwanèètù wanyi.

Mpindyewu twinyikàayi mitù yètù bwà katanci kakesè cyanààna.

308 Mààlabà dilòòlò, ku ngàsà wa Nzambì, tudi tuteeta bwà kulamuna Citampì cyà Kumpàla aci, bu Nzambì mwà kutùlamwinaCì bwà twàmònabi civwà dibuulula edi, “disokoka kacya ku difùkà dyà dyulu ne buloba.”

309 Kumpàla kwà twètù kwenza nànkù, mulundà wanyi ngènzàmpèkààtù, anyi cidimba cyà civùmvù cyà èkèleeziyà, udi wèwè ànu ne buumambàlà mu èkèleeziyà kampàndà, anyi kwèna ne buumambàlà? Nènku wèwè mwikàle ànu ne buumambàlà cyanààna, kakwena dishiilangana menemene bu

wêwè kùyi naabu to. Bidi bikukèngela Dilediibwa. Udi ne cyà kulwa ku Mashì. Udi ne cyà kulwa ku cintu kampànda cidì ànu cikùpula mpèkaatù, mu mùshindù wà kakùciyìku dimuvùluka to.

³¹⁰ Pawikalà kùyi mwànji kudilongolola to, kàbìdì, bwà kutuutakeena ne Mwànà wa mùkòòkò mu mpeepèlè's! Ne ku bukolè bumpèèsha ku mudimu muntùma naawù, mufidiibwe kùdì Nzambi wa Bukolè bwònsò, ne bungoomekela kùdì Mwanjèlò, Dikunji dyà Bukènkè, ndi nkutùmina díyì, mu Dìná dyà Yesù Kilistò! Kùteeci bwà katwilangana Nendè ànu ne buumambàlà bwà diswa kampànda dyà èkèleeziyà wa buloba ebu to.

³¹¹ Lwàkù, pàcidì Mutwàngaji, bwà ku dyànyì dimanya, muciiakàle ànu pa Nkwasa wa butùmbi apa, mwikàle wàkwilangana. Bwalu, nekùlwe ditùkù diwàswà kulwa, kàdi kakwàkwikalà Mutwàngaji to. Bwalu twètù bamòne dībà ditùdì ne mwoyi edi, mu cikondo cyà mwandamutekète cyà èkèleeziyà, ne maalu masokoka à Nzambi ènda àlwa cidìwo eci, ne Nyumà wa Nzambi mushindika ùleeja bintu byònsò byàkalayàYe mu matùkù à ndekeelu abi, ndībà kaayi dicidì dishààle's? Mulundà wanyì ngènzàmpèkaatù, lwàkù's.

³¹² Mukalenge Yesù, mèbà àkaadi ènda àpita. Dībà didi mwà kwikalà mene dipite kutàmba ne mutùdì twètù twela meeji. Ne tudi ne disànkà dyà kumòna dībà edi dìseemena. Ndībà ditàmbe kwikalà dyà butùmbi dikaadiku bàà pa buloba bamanyè, bwà mwena kwitabuuja. Kàdi, bwà mudyombodi yéyè, ndībà dyà dibungama ditàmbe didi mwà kwikalakù. Kakwèna mwà kupeteka myàkù mu alfàbè, malèètà bwà kwenza myàkù, yidì mwà kwamba patòòke lutàtù ne kanyinganyinga kàdi kindile kumpàla eku. Nènku anyì kakwèna myàkù yidì mwà kufwimbibwa, mu alfàbè wetù ewu, bwà kwamba patòòke mabènèsha àdì mindile kumpàla kwà mwena kwitabuuja.

³¹³ Taatù, kùdì mwà kwikalà bàmwè, dilòòlò edi, mwab'ewu kabàyi ne ditèkemena nànsha. Pààbò biikàle bantu bàà meeji's. Nènku mpindyewu Mashì wòwò ànu maciikàle pa Nkwasa wa Luse, Mwànà wa mùkòòkò àpatukèku mu Nkwasa wa butùmbi, àye ku mwoyi wàbò, dilòòlò edi, ne àbàbuulwilè ne mbajimine. Nènku nè byanza bìmata Mashì abi, àmbe ne: "Lwàkù, pàcidìku dībà dyà kulwa apa."

³¹⁴ Ndi ndàmbula Mukenji, Mukalenge, ne disambila dyànyì edi, mu byanza Byèbè. Enzà cyònsò cy'Udì muswè aci, Taatù, mu Dìná dyà Yesù.

Ne mitù yètù miinyika.

³¹⁵ Wêwè kùyi mukùmbàje dilomba edi ne cidì cilòmbiibwe eci, wêwè ànu mweyèmène èkèleeziyà webè awu, kakùvwakù cintu nànsha cimwè civwà cifwànyine kupikula to; wêwè mweyèmène dyakwilangana dyà munsantu kampànda, wêwè ucidì ànu

mujimine; pawikalà mweyèmène midimu yèbè yà byanza, cintu kampànda cyúdi mwenzè, byenzedi bimpè, udi mujimine; pawikalà mweyèmènène mu—mu disambila dyà mamwèbè, anyi bwakànè bwà mamwèbè, tatwèbè; pawikalè mweyèmène aci, udi mujimine. pawikalà mweyèmène disaluka kampànda, njiyà kampànda ya pabwàyi, disaluka kampànda, dyà dyakula dyà mu myakulu, anyi dijà dyà maja, piikalàbi ne aci ke cyònsò cyúdi mweyèmène, ne kùyi Mumanyè Mwànà wa mùkòòkò awu, pàa nkàâyebè, kùyi muMumanyè to, díbà adi ndi nkutùmina díyi kumpàlà kwà Nzambi nè: Longòlòlà cintu aci mpindyewu ne Nzambi.

³¹⁶ Munda mwà mwoyi wèbè amu, sambila. Nènkú shààla ànu mupwekèle, bwalu Nzambi mmusokòme mu bupwekèlè. Nudi bavùlùke ne, Bible mmwambè ne: “Búngi bwònsò bwà bààkiitabuujà abu bàakasàkidiibwa.”

³¹⁷ Nènkú patùdi tukusambidila apa, ndi ntèkemena ne wèwè newàngatè (dyèbè) dipàngadika dyà Cyendèlèlè adi ne: “Mukalenge, nèngàmbè ne: ‘Eyowà!’” Nènkú *dipàngadika* ditu “dibwe.” Kàdi dibwe didi ne dikwàcisha kaayi kakùyi musongi wa mabwe udi mwà kudìsonga, bwà kupèèsha nzùbu lukebu, bwà kukùmbanangana ne nzùbu awu? Díbà adi, lekèlè Nyumà Mwimpè àkusongè àkuumusha ku cyúdi aci, bwà wèwè kwikala cìdi cìkèngela wèwè kwikala. Wèwè mwikàle ànu cidimba cyà èkèleeziyà cyà cyumàkàne; pawikalà ngènzàmpèkààtù; cyònsò cyúdi aci; pawikalà kùyi ne Kìlistò, kùyi ne Nyumà Mwimpè to, Nzambi àkupèèshèku ditalala, dilòòlò edi.

³¹⁸ Mpindyewu, Mukalenge, ne didyèlà dyà meeji dyònsò mùndìku pàanyi mwà kulwa, ne bi—bilondèshìle dyànyi pàanyi dimanya dyà Mifùndu, nyèwù ndwa mpindyewu ne aba bándi muKulàmbùle, ne Díyi aba. Ndi ne dyeyemena, Mukalenge, dyà ne Díyi ndipetè mwaba Wàdi mu mwoyi wà bantu, dilòòlò edi.

³¹⁹ Kwòkò kwikalekù bà nànkú awu mwab’ewu bàdi kabàyi bamanyè, anyi kabàyi ku ne ditwìshiiibwa adi dyà Bwikadi bwà Nyumà Mwimpè bwà kalolo busòmbèle mu nsòmbelu wabò to; mu mùshindù wà ne, biiji, anyi dibènga kucyùka myandà, anyi citù, anyi cintu kampànda cyumùshe Cintu cinène aci kùdibo, ne cibàpangishe mwà kufikaKù; anyi twitabàayi kampànda, anyi—anyi—anyi disaluka kampànda, dibàpangishe kalolo kàà bwobùmwè bwà Nzambi aku; cibàshùile kaaba mpindyewu’s wè!

³²⁰ Ne bwà Mwànà wa mùkòòkò, Cìlongo cyà Mashì, cyà cijila cìdi cyumùkile ku Nkwasa wa butùmbi aci, cipìcile mu Makènkè àdi kaayi ùmvwika à mu tujila twà mu Nkwasa wa butùmbi wa Nzambi awu, ncipàtùke bwà kunana bumpyànyi Bwàci! Nzambi, enzàku, dilòòlò edi, bwà kuMwakidilabò. Swàkù bwà dipàngadika dyònsò dyàngaciibwa kakùyi tuseku to, ne swàkùkù bwà badilekelele ànu kùdiYe Yèyè udi mwà kubasonga ne

kubapèèsha mmwènekelu wa bânà bàà balùme ne bàà bakàji bàà Nzambi.

³²¹ Mpindyewu, mu disambila dyà kadiyì tuseku to, ndi ngenza nùнку ànu mu mùshindù wùndì ndyumvwa mulombòdìibwe bwà kucyènza. Mu cikondo cyà kacyì tuseku to, kumpalà kwà Nzambi, mùdiYe muDìjaadìke kùdi. Ne wèwè kùvwa mwena Kilistò to, anyi kùvwa citùdì tubùkila ne. . . Kì mmu—kì mmu—mmu—mmukashàadi wa mu d̄ingumba to, kadi ndi njinga kwamba mwena Kilistò muledìibwe cyàkàbìdì. Kadi kakùyì tuseku to udi witabuuja ne Mukenji mmulelèlè, ne udi witabuuja kakùyì tuseku to ne udi mwà kusungidiibwa ànu ku ngâsa wa Nzambi. Ne udi witabuuja bushùwà ne Yèyè ùdi munkaci mwà kwakula ne mwoyi wèbè mpindyewu. Nènku udi muswè kuMwitaba, ne udi mudilongòlòle bwà Dìyì Dyèndè bwà—bwà kukumushadi ku cyùdì aci, ne kukuvwijadi civwà cikèngela bwà wèwè kwikala aci. Udiku mwà kujaadika cintu cìmwècìmwè aci, pa kwimanyina kuulu anyi? Pùikalà muntu awu kaaba aka, ne ùjinga kwenza cidi cìkù-. . . cidi cìkùmbana mu byònsò aci, imanyine kuulu's.

³²² Taatù wa mu Dyulu, ncyèna mumanyè cikwàbò cyà dyenza to ànu kutèèla Dìyì Dyèbè. Ke bantu aba biimàne kuulu, biikàle badyùmvwè ne kabèèna bàsanganyibwa mwaba ùvwà ùkèngela kwikalabò to, badilongòlòle bwà Dyambwibwa edi, bwalu didi mwà kwenzeka kumpalà kwà Citampì cyà Kumpala kukàngudiibwaci kutùdì.

³²³ Nènku, Taatù, ndi mbàsambidila. Ndi—ndi, mémè bu musadidi Webè, ndàmbula disambila edi kùdì Mwakwidyanganyi munène, Kilistò. Pàdibo bàsambila apa, ndi ndàmbula disambila dyanyi pàmwè naabò, pa Nkwasa wa butùmbi wa mubanga wa Nzambi, mwaba ùdi Mulàmbù wà Mashì wùsanganyibwamù dilòlòlò edi. Ne pa d̄ibà kanà dyònsò mmufwànyine kujuuka mu Nkwasa wa butùmbi awu, bwà kulwa kunana bìdì bu Byèndè, d̄ibà adi kakwàkwikala kàbìdì luse to; ncilumbulwidi pa cyòci.

³²⁴ Enzàku, Mukalenge, bwà ne bantu bàdì bajuukile panshì, bàdì biimànyine kuulu aba; mu myoyi yàbò, biikàle bàtonda, ne baswè kulekela bwà Nyumà wa Nzambi àbàfwimbè, ne àbàsongè, ne kubapèèsha mmwènekelu wa mabwe àdì ne mwoyi, kubàbweja mu Nzùbu wa Mukalenge Nzambi. Enzàku nàнку, Taatù. Nyèwù mbàlàmbula Kùdì mpindyewu.

³²⁵ Ne Wèwè wákamba ne: “Ewu wânjikula Mémè kumpalà kwà bantu awu, Mémè nēmmujìkùlè kumpalà kwà Taatù Wanyì ne Banjèlò bàà cijila.” Nènku mpindyewu Wèwè udi musòmbè mwaba awu, mu bwikadi bwà bwònsò, dilòlòlò edi. Kadi's mbòbò aba biimàne, biikàle bàKujìkula. Nènku, Mukalenge, pùikalà aci cìfùmina paanshì pàà mwoyi wàbò, ànu mùdibi bulelèlè ne Dìyì dyà Nzambi ndyà cyà bushùwà emu, Udi mpindyewu munkaci

mwà kubààkwila's, ne ubiitaba mu—mu bipaapu byà ngàsà ne luse byà Mashì àdì akezula à Mwànà wa mùkòòkò wà mulàmbù. Ne bwòbò nebiikalè Bèèbè, mu Dìnà dyà Yesù Kilistò. Amen.

³²⁶ Mpindyewu, nwènù bàdì bàmòna bantu bàdì biimàne kuulu aba, nsongààlùmè wa citende ewu udi ànu *mwab'awu*, ne bàdì biimàne kuulu aba, nwènù bàvwa badyumvwe ne mpèkaatù yònsò ne dipiishiibwa mbyumuke abu. Ndi muswè ànu nùjuukilèku kuulu, bàmwè bàà kunùdì bàdì pabwìpì naabò abu. Bàlabulaayikù ku cyanza, nwamba ne: “Mwanèètù wa balùme, nènkusambidilè. Mwanèètù wa bakàji, ndi nkusambidila.” Bàlabùlaayiku ànu ku cyanza cyanàànà, nwamba ne: “Nzambì àkubènèshè.” Nènku mpindyewu bikwàbò abi mbilààdìle ku cyanza cyà Wa Bukolè bwònsò. Wèwè udi wamba ne: “Mémè nènsembilè, ne nèngènzè cyònsò cìndi mwà kwenza aci bwà kukukwacisha mu Bukalenge bwà Nzambì.”


. . . kaa, ùbiikila leelù ewu,
Kaa, Yesù ùdì ùbiikila, Ùdì ùbiikila ne dinanga
dyònsò leelù ewu.

³²⁷ Nudi baMunangè anyì? Yéyè kí mmulenga wa dikèma anyì? Kaa, citùvwà bafwányìne kwenza ncinyì katùyi ne Eci? “Muntu kààkwikala ne mwoyi ànu ku dyàmpà nkààyadi to; kàdì ku Dìyì dyònsò dìdì dipàtukà mukana mwà Nzambì, nkwikalà muntu nè mwoyi's.” Kaa, ndiishaanyi mémè, Mukalenge, ànu nè Dìyì.

³²⁸ “Kanùlekedì bwà kudisangisha pàmwè, bu mùdì ngiikàdilù wà beena bupidyà nànsha, nè nangàangà munùdì nutàmba kumòna Ditùkù dyènda dìseemena.”

³²⁹ Bu Nzambì mwà kwanyisha, mààlabà dilòòlò, ku ngàsà wa Nzambì, Nènditàcishè, ne byònsò bìdì munda mwànyì, bwà kuMulòmba bwà kwakwil- . . . kwakwilangana, bwà bwalu busokoka bwà Bitampì ebi, pààlamunyiibwàbi apu, biikale mwà kukòbola Dìyì dyà Nzambì kùdì bantu.

Too ne pàngààtwilanganà neenù, Nzambì ikalè neenù!

³³⁰ Nènku mpindyewu ndi ngààlujila mwanèètù wa balùme wa ngiikàdilù mulenga ewu disangisha, Mwanèètù Neville, mpaasàtà. Mbanganyì bàdì banangè Mwanèètù Neville? [Disangisha dìdì dyàmba ne: “Amen.”—Muf.] Mpindyewu, twètù bwònsò tutu bamunangè. Seemèna kumpàla eku, Mwanèètù Neville. Mwanèètù Neville, Nzambì àkubènèshè, mwanèètù wa balùme. 

63-0317E Mbwelelu Pankaci Pàà Bikondo Mwandamutekètè
Byà Èkèleeziyà Nè Bitampi Mwandamutekètè
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org